

## IEREMIA

*Iehova ese Ieremia e boiria*

<sup>1</sup> Ieremia, Hilkia natuna, hahelaǵa taudia Anatoto ai, Beniamina tanona ai, e nohova edia oreatauna ta, ena hereva.

<sup>2</sup> Iehova ena hereva na ia dekenai e kau, Iosia Amon, Iuda pavapavana, ena nega ai, ena lohia laǵanina ihagwauta-toina lalonai;

<sup>3</sup> ma e kau Iou, Iehoiakim Iosia, Iuda pavapavana, ena nega ai, ela bona Sedekia Iosia, Iuda pavapavana, ena lohia laǵanina ihagwauta-tana dokona, ela bona hua iha-imana ai Ierusalem tau-dia e ǵuidia.

<sup>4</sup> Iehova ena hereva na egu ai e kau, eto:

<sup>5</sup> Sinamu bogana ai do asina hadudumu negana ai na dibamu,

bona do so vara negana ai na hahelagamu;  
bona na duanaimu, peroveta tauna ai baola,  
basileia idau-idau ediai.

<sup>6</sup> Bena lau nato, Ğaubada Iehova e, a itagu, lau na asi dibagu ede baina hereva toma, badina be lau na tauhau mo.

<sup>7</sup> A Iehova ese e haere henigu, eto:  
Basioto “Lau na tauhau mo”;

badina be dekediai baina siaimu taudia  
iboudiai ediai baola,  
bona baina haǵanilai henimu herevadia ba  
gwaurai.

<sup>8</sup> Idia garidia basio gari,  
badina be lau na oi ida, bena baina harohomu  
mauri.

Iehova na e herevamu.

**9** Bena Iehova ese imana e toia roro, udugu e daua toho. Bena Iehova ese e hereva henigu, eto:

A itaia, egu hereva na udumu ai vada na atodia,

**10** a itaia, hari dina ai vada na haginimu,

bese idau-idau bona basileia idau-idau daediai,

ba butu oho bona ba ġigī dobi,

ba hahebua tari bona ba hahedarere,

ba hagini-hagini bona ba hadohado totona.

**11** Iehova ena hereva egu ai ma e kau, eto, Ieremia e, dahaka o itaiamu! Bena lau nato, Sakada\* auna rigina ta na itaiamu.

**12** Bena Iehova ese ma e hamaorogu, eto, O itaia balahenimu, badina be lau ese egu hereva na balaia henimu, anina baina karaia totona.

**13** Iehova ena hereva na nega iharuana ai egu ai e kau, eto, Dahaka o itaiamu? Bena lau nato, E daidaimu urona na itaiamu, bona lahi iha-hemetaina na mirigini kahana ai.

**14** Bena Iehova ese e hamaorogu, eto, Mirigini kahana amo dika baine daidaia dobi, ina tano e noholaiamu taudia iboudiai latadiai.

**15** Badina be Iehova na e tomu, A itaia, mirigini kahana basileiadu besedia iboudiai na boiridi-amu; bena idia na baema, ta ta ese ena terono ena terono bae haginidia, Ierusalem ikoukoudia raka-vareaidia ai, bona e haheġeġea daemu maġudia iboudiai hevaira-henidia ai, bona Iuda hanuadu iboudiai hevaira-henidia ai.

\* **1:11** “Sakada” na au huahua ta ladana, Heberu gado ai. A reġena mia heġereġere herevana ta be “sokede”; ia anina be “balaia henı”.

**16** Bona egu hahemaoro herevadia na idia lata-diai baina gwaurai, edia kara dika iboudiai ikaradia ai e rakatanigu dainai. Idia ese muramura mai bonadia vada e gabu, dirava idaudia ediai, bona idia sibodia imadia amo e kara ġaudia vada e toma henidia diho.

**17** A oi na emu rami ba heksilaia; ba tore isi, na haġanilaimumu herevadia iboudiai ba hamaorolaidia. Kudoumu basine hetaha idia daidiae, lau ese idia vairadiai oi kudoumu baina hahetahaia na garina.

**18** A itaia, hari dina ai lau ese hanua aukana bona auri au-tubuana bona auri-laboralabora maġudia heġereġeredia ai baina halaomu, tano idoinai ilodu-henina bona Iuda tanona pavapavia dia bona lohiadia bona ena hahelāga taudia bona ena taunimanima iboudiai iloduhenidia totona.

**19** Idia ese bae tuari henimu; to basie hadareremu, badina be lau na oi ida, bena baina hamaurimu. Iehova na e herevamu.

## 2

### *Iehova ese Israel e gwau henia*

**1** Iehova ena hereva na egu ai e kau, eto,

**2** Aola, Ierusalem taudia vairatuhutuhudia ai ba hereva, baoto, Iehova ini e gwau tomamu:  
Emu lalokau eregabemu negana ai

bona emu uraheni emu headava matamata  
negana ai

na lalo taomu;

tano ġaġaena ai, ġau ta asie hadoa tanona ai,  
oi ese lau murigu ai o rakava.

**3** Una negana ai Israel na helāga Iehova ena,  
ena taboro anidia roboadia.

E ani taudia iboudiai e kerere,  
 bena dika na latadai e kau.  
 Iehova na e herevamu.

**4** Iakob besena e, bona Israel besena iduhudia  
 iboudiai, Iehova ena hereva a kamonai.

**5** Iehova ini e gwau tomamu:  
 Senemui ese dahaka kerere egu ai e davaria,  
 bena e rakatanigu, dauha ela?

Idia ese āgau asi namodia e āgavadia,  
 bena taunimanima asi namodia ai e hahelao.

**6** Idia asieto, Iehova be edesenai ai?  
 Aigupto amo e hakauda lasi  
 bona tano āgāena ai e hakauda,  
 tano kaukauna, tano mai guridia,

ranu-mase bona dibura-masemase tanona,  
 ta ese se rakaia hanaimu bona ta ese se noho-  
 laiamu tanona,

Diravana be edesenai ai?

**7** Lau ese aniani momo tanona lalonai na hakau-  
 mui vareai,  
 ena au-huahua bona ena āgau namodia ba  
 moalelai totona.

A umui o raka vareai negana ai egu lano o  
 hamiroa,  
 bona lau ahugu emui ai na āgau dika-  
 rohorohona ai o halaoa.

**8** Hahelaāga taudia asieto, Iehova be edesenai ai?  
 Taravatu e āgau karalaimu taudia na asi dibadia  
 lau;  
 lohia taudia na egu ai e kerereva;  
 peroveta taudia na Baal ladana ai e perove-  
 tava,  
 bona āgau asi anidia e gavadiava.

- 9** Taunabunai, Iehova na e tomu:  
 Lau na doini na habadelaimuimu,  
 bona garamui danu do baina habadelaidia.
- 10** Badina be ba hanai, Kupro kone-tanodia ai ba  
 itaia,  
 eiava ba hesiai lao Kedara, ba tahua namon-  
 amo;  
 ba itaia, kara inihetomana nega ta ai e vara  
 eiava.
- 11** Bese ta, ena be edia dirava na dia  
 momomokakani,  
 to bema bolodia a?
- A lauegu orea taudia ese hairaidia vada e boloa,  
 ġau asi anina vada e bololaia.
- 12** Guba e, ina na ba dara-dokolaia,  
 ba lalaġalaia, lalomui bae ġaġae.  
 Iehova na e herevamu.
- 13** Badina be egū orea taudia ese dika rua vada e  
 kara:  
 lau, mauri ranuna helohilohina, vada e  
 rakatanigu,  
 bona sibodia edia ranu guridia vada e tara,  
 e parara guridia, ranu na idia lalodai basine  
 mia.
- 14** Israel na hesiai tauna a? Ia na hesiai iġuidia ai e  
 vara a?  
 Matona, dahaka dainai damuga ai vada ela?
- 15** Ieona ese vada e ġou henia,  
 vada e ġou badabada.
- Ena tano vada e havahua;  
 ena hanua vada e heġġi dobi, asi inoholaidia  
 ta.
- 16** Ina danu, Memefisi bona Tapanese taudia ese  
 oi kwaramu tubuana vada e hapararaia.

- 17 Iehova, emu Dirava, ese dala ai e hakaumu negana ai o rakatania,  
 una dainai ina na oi sibomu latamu ai vada o hadihoa, ani?
- 18 Harihari Nilo sinavaina ranuna i'inuna totona Aigupto o laomu  
 be dahaka namona ba davaria?  
 Eiava Eufrate sinavaina ranuna i'inuna totona Asuna o laomu  
 be dahaka namona ba davaria?
- 19 Emu kara dika ese matamu baine hakania,  
 bona emu raka-muri ese baine sisiba henimu.  
 Ba diba bona ba itaia, Iehova, emu Dirava,  
 irakatanina na ġau dikana bona iditana.
- Ğaubada Iehova Sabaota e tomu,  
 Lau igari-henigu na oi lalomu ai se miamu.
- 20 Badina be idau nega ai emu maduna o hak-waidua,  
 bona emu iġui o hamotu,  
 oto “Hesiai karadia basina kara”.  
 Oibe, ororo badadia iboudiai doridia ai,  
 bona au mauridia iboudiai henudiai,  
 oi o toma dihova, ariara hahinena na heto.
- 21 Ĝau tamona lau ese na hadomu, abi-hidi vinena,  
 vine korikorina uhena.  
 Edeheto oi na vada o vara dika,  
 uda vinena ai vada ola?
- 22 Ena be muramura amo bona sopu momo amo  
 ba hehuri,  
 to emu kerere mirona na doini vairagu ai mia.  
 Ğaubada Iehova na e herevamu.
- 23 Ba hereva diba a, baoto “Lau na asina miro,  
 Baal muridiae asinala” a?  
 Emu dala koura ai ba itaia;

- ba diba ede vada o kara toma.  
 Oi na kamelo natuna e tau maurimu na heto,  
<sup>24</sup> eiava uda donikina hahinena, tano ġaġaena  
     ai e noho manadamu ġauna, na heto;  
 ena heġaima ai lai e ha-iruamu,  
     bona ena heġahusi ai daika ese baine rua?  
 Itahuna ai ta basine hekwarahi,  
     ena nega ai idia ese bae davaria.  
<sup>25</sup> Aemu ba nari, asi tamakamu basio raka;  
     gadomu ba naria, basio ranu mase.  
 A oi oto: Asi dalana,  
     badina be dirava idaudia vada na ura henid-  
         dia,  
     bona idia baina ġavadia.
- <sup>26</sup> Henao tauna e davariamu negana ai e  
     hemaraimu na heto,  
     Israel taudia na unu bae hemarai toma,  
     idia bona edia pavapava bona edia lohia,  
     edia hahelaġa taudia bona edia peroveta tau-  
         dia danu.  
<sup>27</sup> Badina be idia ese au ta e hereva heniamu, e  
     tому  
     “Oi na tamagu”,  
 bona nadi ta e hamaoroamu, e тому  
     “Oi ese o havaragu”.  
 Badina be vada e gini muri henigu,  
     asie vaira henigu;  
 to edia hekwawanai negana ai e tomamu  
     “A tore isi ba hamaurimai”.
- <sup>28</sup> A emu dirava sibomu o kara ġaudia,  
     be edesenai ai?  
 Bema ihamaurimu mai dibadia emu hekwak-  
     wanai negana ai,  
     idia hari bae tore isi;

badina be, Iuda e, emu hanua na momo  
heğereğerena,  
emu dlrava danu unu e hoho tomamu.

**29** Iehova na e tomu:

Dahaka dainai o maumauraigumu?  
Iboumui ai ese vada o dağedağe henigu.

**30** Natumui vada na hahisidia na asi anina,  
idia na matadia asie kani;  
umui sibomui emui dare ese emui peroveta tau-  
dia vada e aladia,  
e gadoamu leonana na heto.

**31** Ina uru taumui e, Iehova ena hereva ba ka-  
monai;

Israel enai lau na tano ġaġaena  
eiava dibura-masemase tanona a?

Benaini, dahaka dainai egu orea taudia na e tomu  
“Ai sibomai; ai na basia vasi lou” a?

**32** Hane-ulato ta ese ena herahera ġaudia baine  
lalodia boio diba, a?

Eiava headava matamata hahinena ese ena  
dabua basine laloa a?

A lauegu orea taudia ese  
nega momo herea vada e lalogu boio.

**33** Nahuamu o tohoa namonamomu emu mata-  
bodaga karadia ai,  
taunabunai hahine dikadia danu emu dala  
vada o hadibalaидia.

**34** Bona emu dabua ai danu  
ogoġami taudia, asi edia kerere taudia, rara-  
dia vada e miamu,  
a rumu idarena ai asio davaridia.

Ini ġau iboudiai na latamu ai,

**35** to o tomu “Lau na asi egu kerere;

ena badu na egu amo vada eme heabi oho  
ani?"

A itaia, lau ese baina hahemaoro henimu,  
oto "Asi egu kerere" dainai.

<sup>36</sup> O loa kava loa kavamu,  
emu dala o ha-idaua louloumu;  
Aigupto ese baine hahemaraimu,  
Asuria ese e hahemaraimu na heto.

<sup>37</sup> Ina danu, imamu na kwaramu ai heatona ai ba  
raka oho,  
badina be o abidadama henidiamu taudia na  
Iehova ese vada e dadaraidia,  
bona idia ese namomu basie habadaia.

### 3

<sup>1</sup> Iehova na e tomu:

Tau ta ese adavana bema hadihoa,  
bena una hahine ese bema raka tania  
bona tau ta ma bema adavaia,  
adavana gunana ese ma bema lou henia a?

Una tano basinema miro bada a?  
Oi na vada o mata bodaga tatau momo ediai;  
bena lau dekegu ai ba lou mai a?

<sup>2</sup> Ba gaga isi, ororo nemuka-nemukadia ba itadia!  
Edena gabu ai oi na tau ta ida asio eno bou?  
Dala isedia ai vada o helai, tatau vada o naridia,  
Arabia hahinenetano āgāena ai na heto.  
Emu mata-bodaga karadia amo  
tano vada o hamiroa.

<sup>3</sup> Taunabunai, batugu vada e helao ahu,  
bona hadohado negana ai medu se diho;  
āgau tamona bagumu ita-itana na ariara hahinenetano  
baguna na heto,  
so uramu ba hemarai.

<sup>4</sup> Ina harihari vada o boi henigu, ani,

oto, Tamagu e! Kekenigu ai o hetura henigu.  
 5 Baine badu ela bona hanaihanai,  
     bona lalona baine siahу ela bona dokona a?  
 A itaia, vada o hereva vaitani,  
     to vada o kara dika mai goadamu idoinai.

*Iehova ese Israel bona Iuda e sisiba henidia*

6 King Iosia ena nega ai, Iehova ese e hereva henigu, eto, Una kara hebeatai besena, Israel, ena kara vada o itaia a? Ia na ororo badadia iboudiai e dara daeva, bona au mauridia iboudiai henudiai elava, urluseni ai lebulebu karadia e karava.

7 Bena lau nato “Ina idoinai baine ha-orea muri-nai ia ese baine lou henigu”; a ia na se lou mai, tadikakana koikoina Iuda ese karana e itaia.

8 Ia ese e itaia, una kara hebeatai besena Israel ena heuda-hanai karadia iboudiai daidiae lau ese na hadihoa bona hekoho revarevana na henia; ġau tamona ia tadikakana koikoina Iuda na se gari, a ia danu ela, eha lebulebu.

9 lenai lebulebu na ġau pipikina dainai, ia ese tano e hamiroa, nadi bona au ediae lebulebu.

10 Ĝau tamona, ia tadikakana koikoina Iuda ese ina idoinai e itaia, to lau dekegu ai se lou mai mai lalona idoinai ida, a mai koikoina ida ema. Iehova na e herevamu.

11 Bena Iehova ese e hereva henigu, eto, Kara hebeatai besena Israel ena kerere vada eme hed-inarai na taina maraġi, a koikoi besena Iuda ena kerere na bada.

12 Aola, ina hereva na mirigini kahana ba gwaurai henia, baoto:

Iehoya na e tomu:

Kara hebeatai besena Israel e, a lou!  
 Iehoya na e tomu:

Mai badugu ida basina hağeremu,  
 badina be lau na mai hebogahisigu;  
 lau na basina badu hanaihanai.

<sup>13</sup> Iehova na e tomu:

Emu kerere a gwaurai hedinarai mo;  
 Iehova, emu Dirava, o dağedağe henia,  
 bona idau taudia ida o eno bou au mauridia  
 iboudiai henuidiai,  
 bona lau gadogu so kamonai henia,  
 vada ba gwaurai hedinarai.

<sup>14</sup> Iehova na e tomu:

Kara hebeatai memeromui e, a lou;  
 badina be biagumui na lau.  
 Lau ese baina abimui, hanua ta amo ta,  
 bona iduhu ta amo rarua,  
 bena Siona ai baina hakaumui dae.

<sup>15</sup> Lau ese iregumui taudia baina henimui, na  
 lalo namo henidiamu taudia; bena idia ese aonega  
 bona lalo-parara amo bae ubumui.

<sup>16</sup> Iehova na e tomu, Tano ai ba vara rohoroho  
 bona ba hutuma negana baine kau ai,unu dinadia  
 ai idia ese Iehova ena taravatu mauana basie  
 herevalaia lou. Basie laloa une, basie laloa tao,  
 basie henanadailaia, bona ta ma basine hekara  
 lou.

<sup>17</sup> Una negana ai Ierusalem na bae gwauraia  
 Iehova ena terono; bona bese iboudiai na ienai  
 bae hebou Iehova vairanai, Ierusalem ai; bona  
 sibodia edia lalo-hadai dikadia iğavadia ai basie  
 hetoahu.

<sup>18</sup> Unu dinadia ai Iuda besenə na Israel besena  
 ida bae tami hebou, bona mirigini tanona amo  
 baema bou, senemui na henidia tanona na ma bae  
 mai henia.

- <sup>19</sup> Lau na laloa natugu bogaragidiai baina atomu,  
     bona tano namona baina henimu, tano mai  
         hairaina,  
     basileia iboudiai edia e hereadiamu tanona.  
 Bona na laloa danu oi ese boma gwauraigu “Tam-  
     agu”,  
     bona lau igavagu amo basioma raka siri.
- <sup>20</sup> Iehova na e tomu:  
     Israel besena e!  
 Momokani, kara hebeatai hahinena ese adavana  
     e dihotaniamu na heto,  
     oi ese vada o kara hebeatai henigu.
- <sup>21</sup> Ororo nemuka-nemukadia ai gado ta e heka-  
     monaimu,  
     Israel garana edia taitai bona edia noinoi;  
 badina be edia dala vada e hagagevaia,  
     Iehova, edia Dirava, vada e laloa boio.
- <sup>22</sup> Kara hebeatai memeromui, a lou mai;  
     emui kara hebeatai amo baina hamaurimui.  
 A itaia, ai na a vasimu,  
     badina be oi na Iehova, emai Dirava.
- <sup>23</sup> Momokani, ororo ese e koimaimu,  
     bona lebulebu karadia ororo badadia ai ese e  
         dibağanimaimu.  
 Momokani, Israel ihamaurina be  
     Iehova, emai Dirava, enai.
- <sup>24</sup> A eregabemai negadia amo hari hemarai  
     ğanya ese tamamai edia hekwarahi anidia  
     iboudiai vada e hadonodia: edia mamoe  
     seridia bona edia boromakau seridia, natudia  
     mamaruanedia bona natudia hahinedia danu.
- <sup>25</sup> Emai hemarai ai baia hekure; emai hemarai  
     ese baine ğovamai ahu; badina be ai ese Iehova,

emai Dirava, vada a kara dika henia, ai bona tamamai danu, eregabemai negadia amo ema bona ina dina; bona Iehova, emai Dirava, gadona asia kamonai henia.

## 4

<sup>1</sup> Iehova na e tomu:

Israel e, oi na boma lou,  
lau dekegu ai ba lou mai.

Emu ġau dika-rohorohodia na vairagu amo boma  
abi oho,  
bona basioma daradara.

<sup>2</sup> Momokani ai bona hahemaoro ġoevaġoева ai  
bona kara maoromaoro ai boma gwau  
hamata,  
boma toma “Iehova e maurimu heġereġerena”,  
benā basileia idau-idau na sibodia bae hahenamo  
ia dainai,  
bona ia bae imodaia.

<sup>3</sup> Badina be Iehova ese Iuda taudia bona  
Ierusalem inoholaina taudia na ini e hamaorodia  
tomamu:

Emui vahu tanona ba ruaia,  
au ginigini gabudia ai basio hadohado.

<sup>4</sup> Iuda taumui bona Ierusalem inoholaina taumui  
e,  
sibomui ba haheperitome Iehova enai,  
peritome ai lalomui ba hahelaġadia,  
egu badu ġaraġara na lahi na heto baine lasi na  
garina,  
bena baine ara, asi tauna ta ese baine ha-  
bodoa,  
emui kara vada e dika dainai.

*Iuda bae daea*

**5** Iuda ai ba gwauraia, bona Ierusalem ai ba gwauraia hedinarai, baoto:

Tano heğeğemadai ai kibi ba hiriria;

ba boi lolo, baoto “A hegogo, baitala,  
hanua mai mağudia lalodiae”.

**6** Pepe ba duduia isi Siona enai,

ba heau, mauri ba tahuia, basio halahe.  
badina be hahedika na mirigini kahana amo na  
mailaimu,

bona hahebua-tari badana danu.

**7** Leona na uda hedoma-hedomana vada e rakata-nia,

basileia ihabua-taridia tauna vada e tore isi;  
ena gabu amo vada e raka lasi,  
emu tano ihavahuna totona;  
emu hanua na bae heğigi dobi,  
asi inoholaidia bae mia.

**8** Ina dainai puse dabuadia ba rio,

ba tai, ba tai lolololo;  
badina be Iehova ena badu ġaraġara na  
ita eda amo se heabi oho.

**9** Iehova na e tomu, Una dina ai hanua pavapava  
bona hanua lohiadia edia boga-auka baine  
ore; hahelaġa taudia bae gari dikadika bona per-  
oveta taudia bae hoa bada.

**10** Bena lau nato, Ĝaubada Iehova e, oi na ina bese  
bona Ierusalem hanuana vada o koidia vaitani,  
ani, oto “Vada ba namo”; ġau tamona, dare ese be  
aladiamu.

**11** Una negana ai ta ese ina bese bona Ierusalem  
hanuana baine hamaorodia, baineto, Lai siahuna  
na tano ġaġaena ororodia nemuka-nemukadia  
amo e maimu, egu bese natuna hahinena e toa  
heniamu, dia itapona eiava ihaġoevana totona.

- 12** A lai badana na daigu ai e maimu. Harihari lau ese hahemaoro ai na hereva henidiamu.
- 13** A itaia, ia na duba na heheto e tubu e maimu, ena kariota na koe-hirihiri na heto; ena hosi na hara  a herea, idia ese ugava e hereadiamu;  
madi ihabaida, vada ta dika vaitani.
- 14** Ierusalem e, lalomu ena dika ba huri oho, ba mauri helaoreana; emu lalo-hadai dikadia na lalomu ai bae mia  
ela bona edena nega ai?
- 15** Badina be gado ta Dan amo e herevamu, bona Efraim ororona amo hahedika e gvauriamu.
- 16** Beso idau-idau ba sisiba henidia, ia na e maimu; Ierusalem ba gwaurai henia, baoto:  
Hanua idaena taudia na tano daudau amo e maimu,  
Iuda hanuadiahone henidiamu.
- 17** Tano igimana taudia na heheto e ginia he  e, badina be ia ese vada e gwau edeede henigu.  
Iehova na e herevamu.
- 18** Emu dala bona emu kara ese  
ina kara na latamu ai vada e hadihoa.  
Ina na oi irevamu, vada eme idita;  
oi lalomu korikorina ai vada e vareai.
- 19** Lalugu e, lalugu e, hisihisi ese e gugubagumu!  
Kudougu e!
- Kudougu na e hetaha dikadikamu,  
udugu basina hakapua diba;  
badina be kibi regena na kamonaimu,  
bona tuari honena danu.
- 20** Dika ta dika ta latanai e kaum,  
ela bona tano idoinai vada e vahu.  
Asi vanahana egu kalaga e hegigi rohorohomu;

- asi vanahana egu seseahu e heabi ohomu.
- 21** Pepe baina itaia ela bona edena nega ai?  
 kibi reğena baina kamonai ela bona edena  
 nega ai?
- 22** Badina be egu bese taudia na kakavakava,  
 idia na asi dibadia lau;  
 idia na lalo-duhu memerodia,  
 asi edia lalo-parara.
- Kara dika ikaradia mai dibadia,  
 a kara namo ikaradia na asi dibadia.
- 23** Tanobada na itaia, vada e vahu bona asi anina;  
 guba na itaia, ia na asi diarina.
- 24** Ororo badadia na itadia, idia na e tabubu-  
 tabubu,  
 bona ororo marağidia e heude-heude.
- 25** Na roha lao, tau ta asina itaia,  
 bona atai manudia iboudiai vada e roho boio.
- 26** Na roha lao, nomu tanona na itaia, vada e ġaġae,  
 bona hanuana iboudiai vada e heġiġi dobi,  
 Iehova vairanai, ena badu ġaraġara vairanai.
- 27** Badina be Iehova ini e gwau tomamu: Tano  
 idoinai baine hahevahura; to basina havahuraia  
 vaitani.
- 28** Ina dainai tanobada baine taitai,  
 bona atai ai guba baine dubaduba;  
 badina be lau vada na hereva bona lalogu vada na  
 hadaia,  
 basina helalo kerehai bona lalogu basina  
 haloua.
- 29** Hosi tauna bona peva tauna reğedia dainai,  
 hanua iboudiai taunimanimadia na e heau  
 maurimu;

uda hedoma-hedomadia ai e heau vareaimu, haga  
 nadidia ai e dara daemu;  
 hanua iboudiai e heautanidiamu, lalodai tau  
 ta se nohomu.

<sup>30</sup> Oi, vada e negemu daure hahinemu e,  
 emu lalo-hadai be dahaka bena dabua  
 kakakakana o hahedokilaiamu;  
 bona *gold* heraheradia o heraldaimu,  
 bona matamu na umu amo o habadamu?  
 Asi badina sibomu o hahairaimu;  
 e ura henimuva taudia ese e dadaraimumu,  
 idia ese emu mauri iabi-ohona dalana e  
 tahuamu.

<sup>31</sup> Badina be taitai ta na kamonai,  
 e hekamonaimu hahinenena ena tai na heto,  
 natuna roboana e havaraiamu hahinenena ese  
 hisi e animu na heto;  
 Siona natuna hahinenena ena tai,  
 e lağā dae lağā daemu, bona imana e toi ro-  
 romu,  
 e tomu “Lau madi ihabaigu,  
 roroma taudia vairadai na mase reamu”.

## 5

### *Ierusalem bona Iuda edia kara dika*

- <sup>1</sup> Ierusalem ariaradia ai ba heau lao ba heau mai,  
 ba itaia bona ba haeroa.  
 Ena ariara lalodaii ba ita hetahu-hetahu,  
 tau ta ba davaria eiava lasi,  
 e hahemaoro ġoеваġoevamu bona hereva  
 momokanina e tahuamu tauna;  
 unu amo ena dika bama gwau tao.
- <sup>2</sup> Ena be e tomamu “Iehova e maurimu  
 heġereġerena”,  
 to e gwau hamata koikoimu.

- 3** Iehova e, oi matamu ese kara momokanina e  
tahuamu, ani?  
 Oi ese vada o harahudia mase,  
 a lalodia asie hisihisi;  
 oi ese vada o aladia ore,  
 a mata-hakani asie ura.  
 Idia ese vairadia e ha-aukadia,  
 vairadia na nadi-aukadia na heheto,  
 a idia na asie ura bae helalo kerehai.
- 4** Bena lau nato: Ini na ogogami taudia mo,  
 lalodia na asie pararamu;  
 badina be Iehova ena dala na asi dibadia,  
 edia Dirava ena taravatu danu asi dibadia.  
**5** Lohia dekedia bainala, baina hereva henidia;  
 badina be idia na Iehova ena dala dibadia,  
 edia Dirava ena taravatu danu dibadia.  
 A idia iboudiai ese danu maduna auna vada e  
 hakwaidua,  
 bona iğuidia vada e hamotudia.
- 6** Taunabunai, uda amo leona ta ese baine aladia  
 mase;  
 tano ǵagaena amo sisia daǵedaǵena ta ese baine  
 habuadia tari.  
 Taiga ta ese edia hanua e bani henidiamu,  
 bae raka lasi taudia iboudiai na ia ese baine  
 daredia patapata;  
 badina be edia kara dika na momo,  
 edia raka-muri na bada.
- 7** Emu dika na ede baina gwaua tao toma?  
 Oi natumu ese vada e rakatanigu,  
 dirava koikoidia ladadia ai vada e gwau  
 hamata.  
 Bogadia na hakunuva negadia ai,

idia na e heuda hanaiva,  
ariara hahinedia edia rumai e didi vareaiva.

<sup>8</sup> Idia na hosi mamaruanedia,  
bogadia e kunumu bona taudia e lokalokamu,  
ta ta dekena tauna dekena tauna adavadia e  
tubebe henidiamu.

<sup>9</sup> Iehova na e tomu:  
Unu ġau daidai davadia basina henidia a?  
Bese unuhetomana latanai dava basina atoa  
a?

<sup>10</sup> Ena vineimeana ba rakaia hanai, ba havahua,  
a basio havahuraia vaitani;  
ia rigina ba padadia oho,  
badina be idia na dia Iehova ena.

<sup>11</sup> Badina be Israel iduhuna bona Iuda iduhuna na  
egu ai vada e hebeatii vaitani.  
Iehova na e herevamu.

<sup>12</sup> Idia ese Iehova e herevalaia koikoi, eto:  
Gau ta basine karaia;  
dika ta ita eda ai basine kau,  
dare bona doe basita mamidia.

<sup>13</sup> Peroveta taudia na lai kavakava ai bae hahelao,  
hereva momokanina na dia idia ediai.  
Unu bae halou henidia toma.

<sup>14</sup> Taunabunai Dirava, Iehova Sabaota, na ini e  
gwau tomamu:  
Ina hereva vada e gwauraia dainai,  
a itaia, egu hereva na lahi ai baina halaodia oi  
udumu ai,  
bona ina bese na au rakuraku ai baina halaoa,  
beni lahi ese baine aradia ore.

<sup>15</sup> Israel besena e, a itaia,  
bese ta na dauha amo baina mailaia umui  
latamui ai.

Iehova na e herevamu.  
 Una bese na e hesiriuhanaimu besena,  
     ia na bese gunana;  
     ia na gadona asi dibamu besena,  
         bae hereva negadia ai lalomu basine parara.

**16** Edia diba pauana na gara hekehona na heto;  
     idia iboudiai na goada-dikadika taudia.

**17** Emu taboro bae ha-oreea,  
     bona emu aniani gaudia danu;  
 natumu mamaruanedia bona hahinedia bae ha-  
     oredia,  
     bona emu mamoe seridia bona emu boro-  
         makau seridia danu;  
 emu vine bae haoredia,  
     bona emu suke audia danu;  
 emu hanua aukadia, o abidadama henidiamu  
     hanuadia, na  
     dare ai bae habuadia tari.

**18** Iehova na e tomamu: To unu dinadia ai lau  
 ese basina ha-oremui vaitani.

**19** Bena emu bese taudia baeto “Badina be da-  
 haka Iehova, eda Dirava, ese ini kara iboudiai  
 rla eda ai vada e kara?” negana ai, oi ese ba  
 hamaorodia, baoto “Umui ese vada o rakatanigu,  
 bona emui tano lalonai dirava idaudia isiaidia  
 vada o lao henihenigeregena, umui ese danu idau  
 tano, dia emui tano, lalonai idau taudia isiaidia do  
 ba lao henihenigeregena”.

**20** Iakob iduhuna ai ina hereva ba gwauraia,  
     Iuda tanona ai ba gwauraia hedinarai, baoto:

**21** Asi lalomui bona asi daramui taumui e, a ka-  
     monai,  
     mai matamui, to asio heitamu;  
     mai taiamui, to asio kamonaimu.

- 22** Iehova na e tomamu:  
 Asio gari henigumu a?  
 Lau vairagu ai asio heude-heudem a?  
 Lau ese kone na atoa, davara hetoana,  
 davara ilao-ahuna, baine mia hanaihanai  
 ġauna,  
 davara ese basine hanaia diba ġauna.  
 Ena be hurehure na e heabi isimu, to basie kwal-  
 imu diba;  
 ena be kone ai e poumu, to basie hanaia diba.
- 23** A ina bese taudia lalodia na a'auka, bona mai  
 gwau-edeededia;  
 idia na vada e raka siri, dauha vada ela.
- 24** Lalodia ai idia na asie tomu:  
 Iehova, eda Dirava, garina baita gari;  
 ia ese medu e henidamu, negana korikori ai,  
 lahara medudia bona guitau medudia;  
 bona vada e duanaidia taboro puradia ai baela  
 puradia na  
 ia ese e badinadiamu, eda.
- 25** Ini na emui kara havara ese emui amo vada e  
 abi oho,  
 bona emui kara dika ese namo na emui amo  
 vada e laoa ahu.
- 26** Badina be kara dika taudia na egu orea taudia  
 bogaragidiai e nohomu;  
 bona idia na e komumu, manu ibani-henidia  
 taudh na heheto.
- Idia ese rikiriki e atoamu,  
 taunimanima e abidiamu.
- 27** Edia rumu na kara dibaka ai e honumu,  
 bosea na manu ai e honumu na heto;  
 taunabunai idia na vada e lohia, vada e taġa,  
**28** taudia vada e bada bona vada e raho namo.  
 Edia kara dikadia na asie hamaragidiamu;

asie hahemaoro ġoevaġoевamu;  
 ihareha idurudia asie goadalaiamu,  
 bona e dabumu taudia ahudia korikori asie  
 gimadiamu.

<sup>29</sup> Iehova na e tomu:

Ini ġau daidiae matadia basina hakanidia a?  
 Bese inihetomana latanai  
 dava basina atoa a?

<sup>30</sup> Hoa bada bona gari bada ġauna ta na  
 tano ai vada e vara:

<sup>31</sup> peroveta taudia na e peroveta koikoimu,  
 bona edia hahedua heġġereġeredia ai hahelaġa  
 taudia na e lohiamu;  
 bona egħi oreja taudia na e uramu unu baine heto,  
 a nega dokona baine kau ai be ede ba kara  
 toma?

## 6

### *Ierusalem bona Iuda bae dika*

<sup>1</sup> Beniamina taumui e,

    Ierusalem bogaragħina amo a heau mauri!

Tekoa ai kibi ba hiriria,

    Bete-hakerereme ai pepe ba duduia isi!

Badina be hahedika na mirigini kahana amo e  
 hedinarai e maimu,

    bona hahebua-tari badana danu.

<sup>2</sup> Hane namo, aboni-noho hahinena, baine alaia,  
 Siona natuna hahinena baine alaia mase.

<sup>3</sup> Mamoe ireġudia taudia mai edia seri ida na ia  
 ivaira-henina baema,  
 edia kalaga bae hagħnidia, bae ġeġea ahu,  
 edia mamoe bae ubudia, ta ta ena gabu ena  
 gabu ai.

<sup>4</sup> Tuari a haheġġaeġaea, ia iħadikana;

- a tore isi, dina tubua ai baita daea.  
 Madi ihabaida, ado e rahimu,  
     dina na e kerekereku.
- <sup>5</sup> A tore isi, hanuaboi ai baita daea,  
     ena lohia rumadia baita habuadia tari.
- <sup>6</sup> Badina be Iehova Sabaota na ini e gwau tomamu:  
     Ena au ba hagaridia,  
     tano ba larebaia dae, Ierusalem hevaira-  
     henina ai.  
 Ina hanua na matana bae hakania;  
     ia lalonai na hahehis i karadia mo.
- <sup>7</sup> Ranu gurina ese ranuna e hamatamataia na  
     heto,  
     ia ese ena kara havara unu e hamatamata  
     tomamu;  
 dağedäge bona hahebua-tari karadia reğedia na ia  
     lalonai e hekamonaimu,  
     gorere bona bero na vairagu ai nega idoinai.
- <sup>8</sup> Ierusalem e, nahuamu a tohoa,  
     emu ai lalogu baine dika na garina,  
     baina havahumu bona tano değedeğena-rahu  
     ai baina halaomu na garina.
- <sup>9</sup> Iehova Sabaota na ini e gwau tomamu:  
     vine huahuadia kwabudia e buruki oremu na  
     heto,  
     Israel kwabukwabudia ba burukidia ore;  
 vine huahuadia igogodia tauna na heto,  
     oi imamu ese rigina baine darahua lou.
- <sup>10</sup> Daidia baina hereva henidia bona baina sisiba  
     henidia,  
     bae kamonai helaoreana?  
 A itadia, taiadia na hehekou,  
     idia na asi kamonai dibadia.

A itadia, Iehova ena hereva na e ġonaġonalaiamu,  
asie moalelaiamu.

**11** Taunabunai lau na Iehova ena badu ai na hon-  
umu,  
ihalahelaina ai na hesikumu.

Taunabunai ariara ai memero kekeni latadiai ba  
bubua diho,  
bona eregabe taudia edia hegogo latadiai  
danu;

tau mai adavana ida bae abidia hebou,  
taunimanima badadia bona burukadia danu.

**12** Edia rumna haida bae henidia,  
edia uma bona adavadia danu;

badina be lau ese imagu baina toia roro,  
tano inoholaina taudia ihadikadia totona.  
Iehova na e herevamu.

**13** Maraġina ela bona badana,  
iboudiai ese mata-ġaniġani karadia e gugu-  
laimu;

bona peroveta tauna ela bona hahelaġa tauna,  
iboudiai e kara koikoimu.

**14** Egu orea taudia berodia vada e haġoevadia  
lamai-lamai,  
eto “Maino, maino”,  
maino do lasi negana ai.

**15** Kara dika-rohorohona e karaia negana ai,  
idia na e hemarai a?

Idia na asie hemarai, lasi ona lasi vaitani;  
hemarai mamina na asi dibadia.

Taunabunai, e ketomu taudia bogaragidiai bae  
keto;  
matadia baina hakanidia negana ai idia na  
bae henege daure.  
Iehova na e herevamu.

- 16** Iehova ini e gwau tomamu:  
 Dala badidiae ba gini, ba roharoha;  
 dala gunadia ba henanadailai;  
 bena lao dalana namona ba davaria, ia lalonai ba  
 raka,  
 bona laumamui edia lagā-ani ba davaria.  
 A idia eto “Ai na ia lalonai basia raka”.
- 17** Gima taudia na duanaidia, umui igimamui;  
 nato “Kibi regēna ba hakala henia”.  
 A idia eto “Ai na basia hakala”.
- 18** Bese idau-idau e, a kamonai!  
 Hebou taumui e, ba diba dahaka na ediae  
 baine vara.
- 19** Tanobada e, a kamonai! A itaia!  
 Lau ese dika na havaraiamu ina bese taudia  
 latadiai,  
 idia sibodia edia lalo-hadai huahuadia;  
 badina be egu hereva na asie hakala henidia,  
 bona egu taravatu na vada e dadaraia.
- 20** Anina be dahaka egu muramura mai bonana na  
 Sieba amo e mailaiamu,  
 eiava kane\* namona tano daudauna amo?  
 Emu ġole-oho boubou ġaudia na asina abidia  
 daemu,  
 bona emu boubou karadia na asina moale-  
 laidiamu.
- 21** Taunabunai, Iehova na ini e gwau tomamu:  
 A itaia, hetutuhi ġaudia na ina bese taudia  
 vairadiai baina atodia,  
 idia ihahetutuhidia.
- Tama bona natudia na bae hetutuhi hebou;  
 rumtauna mai turana ida bae mase hebou.

---

\* **6:20** “Kane” na Heberu taudia edia muramura mai bonana ta.

**22** Iehova ini e gwau tomamu:

A itaia, bese ta na mirigini kahana amo e  
maimu;  
basileia badana ta na e tore isimu,  
tanobada kahadia daudau-hereadia ai.  
**23** Idia ese peva bona io na imadia ai e abimu,  
idia na e dağedağemu, bona asie  
hebogahisimu;  
reğedia na davara guruna na heto.

Siona natuna hahinemu e,  
idia na hosi ai e guimu, e heğaeğäemu,  
tau ta na tuari dainai e heğaeğäemu na heto,  
oi ihadikamu totona.

**24** Ita ese harina vada ta kamonai,  
a imada na asi goadadia;  
hisihisi bada-hereana ese e gugubadamu,  
hahine ta ena hekamonai hisina na heto.

**25** Basio raka lasi tano paka ai,  
bona dala ai basio raka,  
badina be inai tauna na mai darena ida e loamu,  
bona gari bada ese e ġeġeda ahumu.

**26** Egu bese natuna hahinemu e,  
puse dabuadia ba rio,  
kahu ai ba hekui-hekui;  
ba taitai, natuna vara-edéana e taitailaiamu na  
heto,  
herohe-ahu idita hereana;  
badina be hahebua-tari tauna ese  
baine hatakuda.

**27** Lau ese hidi-hidi tauna bona hahetoho tauna  
ai vada na halaomu egu orea taudia bogaragidiae,

edia dala ba dibadia bona ba hididia totona.  
**28** Idia iboudiai na e gwau ede-edé dikadikamu,

- hahebade koikoi herevadia e loalaidiamu;  
 idia na auri bona auri labora-labora,  
 iboudiai na e kara koikoimu.
- <sup>29</sup> Lahi ihiririlaina ġauna ese lahi e hahururuamu,  
 e vevemu aurina na lahi ai e veve ohomu;  
 hahegoeva ġaukarana e karaiamu na asi anina,  
 badina be kara dika taudia na asie heabi  
 ohomu.
- <sup>30</sup> Silver momorudia bae gwauraidia,  
 badina be Iehova ese vada e dadaraidia.

## 7

*Ieremia ena haroro herevadia*

<sup>1</sup> Ina hereva na Iehova ena amo Ieremia enai e kau:

<sup>2</sup> Iehova ena dubu ikoukouna ai ba gini, unuseni ai hereva ba gwauraia, baoto, Iehova ena hereva ba kamonai, umui Iuda taumui, Iehova itomadiho-henina totona ini ikoukou lalodiae o raka vareaimu taumui iboumui ai.

<sup>3</sup> Iehova Sabaota, Israel Diravana, na ini e gwau tomamu: Emui dala bona emui kara ba hamaormaorodia, bena ina gabu ai do baina hanohomui.

<sup>4</sup> Ini hedibagani herevadia basio abidadama herlidia: “Ina na Iehova ena dubu, Iehova ena dubu, Iehova ena dubu”.

<sup>5</sup> Badina be emui dala bona emui kara boma hamaormaorodia vaitani, bona boma hahemaoro heheni mai maoromaoromui ida,

<sup>6</sup> idau tauna eiava ihareha eiava vabu basioma hahisihisidia, eiava asi ena kerere tauna rarana basioma hahebubua irla gabu ai, bona dirava idaudia igavadia ai sibomui basioma hahehisi,

<sup>7</sup> bena lau ese ina gabu ai do baina hanohomui, nega gunadia ai senemui na henidia vaitani tanona lalonai.

<sup>8</sup> A itaia, umui ese hedibağani herevadia o abidadama henidiamu na asi anina.

<sup>9</sup> Ba henao, ba roroma, ba heuda hanai, ba gwauhamata koikoi, muramura mai bonana ba gabua Baal enai, bona asio dibadia guna diravadia ba ġavadia;

<sup>10</sup> bena baoma, lau vairagu ai ba gini, ina lau ladagu e henemailaia dubuna lalonai, baoto “Ai na vada a roho mauri”; bena unu kara dikarohorohodia ma ba kara lou a?

<sup>11</sup> Ina lau ladagu e henemailaia dubuna na emui ita-ita ai dadidadi taudia edia kohua ai vada ela a? Iehova na e tomu, Lau sibogu ese vada na itaia.

<sup>12</sup> Egu gabu Silo ai, lau ladagu na hamialaia guna gabuna, baola; ba itaia, ede na karaia toma, egu bese Israel taudia edia kara dika daidiai.

<sup>13</sup> Iehova ma e tomu Harihari, unu ġau iboudiai vada o karadia, bona igwau-henimui di asina hesiku lo asio kamonai, bona na boirimui to asio haere, dainai

<sup>14</sup> lau ese ina dubu, lau ladagu vada e henemailaia bona o abidadama heniamu dubuna, bona ina gabu, umui bona senemui na henimui gabuna, baina kara henidia, Silo na kara henia heğereğerena.

<sup>15</sup> Bona lau vairagu amo baina negemui daure, varavaramui, Efraim garana, iboudiai na negedia daure heğereğerena.

*Iehova ena hereva Ieremia enai*

**16** Oi na ina bese taudia daidai basio noinoi, eiava idia daidai basio taitai eiava basio ġuriġuri eiava egu ai heraua basio tahua, badina be asina kamonai henimumu.

**17** Iuda hanuadia ai bona Ierusalem ariaradia ai e karamu karadia na so itamu a?

**18** Memero bona kekeni ese au rakuraku e haboumu, tamadia ese lahi e ha-aramu, bona hahine ese flaoa e kuiamu, guba pavapavana hahinenen ena ataga bae gabu totona; bona inuinu bouboudia e bubudiamu, dirava idaudia ediai. Unu amo e habadugumu.

**19** Iehova na e tomu, Lau e haraivagumu eiava sibodia e haheraivamu bena hemarai na latadiai e kaum a?

**20** Taunabunai Ĝaubada Iehova na ini e gwau tomamu: A itaia, egu badu, egu badu ġaraġara, na ina gabu latanai baina bubua dobi, taunimanima bona ubu-ubu ġaudia, bona imea audia bona uma anidia danu, latadiai; ia na baine ara, basine bodo.

### *Iuda ena gwau-edede davana*

**21** Iehova Sabaota, Israel Diravana, na ini e gwau tomamu: Emui kara helagadia ba kara negadia ai, emui ġole-oho boubou ġaudia danu ba hahelagadia, bena vamudia bavani.

**22** Badina be Aigupto amo na hakaudia lasi dinana amo ema, lau ese senemui asina hereva henidia, bona asina haġānidia idia ese ġole-oho bouboudia bona kara helagadia bae kara.

**23** To ina haheġani na henidia, nato, Lau gadogu ba kamonai, bena lau na emui Dirava ai bainala, bona umui na egu bese ai baola; bona na haġānilaimuimu dalana idoinai lalonai ba raka, bena ba namo.

**24** A idia na asie kamonaiva, taiadia asie hakalava, to sibodia edia hahealo ai bona sibodia edia lalo-hadai dikadia bona aukadia lalodai e rakava, e raka duava, asie raka vairava.

**25** Senemui na Aigupto tanona amo e raka lasi dinana amo ema bona ina dina, lau ese peroveta taudia, egu hesiai taudia, iboudiai na dina ta ta ai idia dekedia na siaidiava, asina hesiku;

**26** ġau tamona, idia na asie kamonai heniguva bona taiadia asie hakalava, a aiodia e ha- aukadiava. Edia kara dika ese tamadia edia kara dika e hereadiava.

**27** Taunabunai, ini hereva iboudiai na ba hamaorolaidia, to basie kamonai henimu. Ba boi henidia, to basie haere henimu.

**28** Bena ba hamaorodia, baoto, Ina na Iehova, edia Dirava, gadona asie kamonai bona mata- hakani asie abia dae besena. Hereva momokani vada e boio vaitani, bona idia bibinadia amo vada e ore.

**29** Huimu ba utu nege,  
ororo nemuka-nemukadia ai ba rohe ahu;

badina be Iehova ese e badu heniamu uruna na  
vada e dadaraia bona vada e rakatania.

**30** Iehova na e tomu: Badina be Iuda taudia na lau vairagu ai vada e kara dika; edia ġau dikarohorohodia na lau ladagu vada e henemailaia dubuna lalonai vada e atodia, unu amo vada e hamiroa.

**31** Tofete ai, Hinom natuna ena koura ai, idia ese atai gabuna helaġana ta vada e hadaia, natudia mamaruanedia bona hahinedia na lahi ai bae haġoledia oho helaoreana; lau ese unu asina haġanidia toma, bona unu asina laloa toma.

<sup>32</sup> Taunabunai, Iehova na e tomu, negana vada be maimu “Tofete” bona “Hinom natuna ena koura” basie gwauraia, a ladana bae hatoa “Alala Kourana”; mase taudia na Tofete ai bae guridia, badina be idau gabu ai na asi gabudia.

<sup>33</sup> Bena ina bese taudia tau-anidia na atai manudia bona uda boromadia ese bae anidia; ta ese basine luludia oho.

<sup>34</sup> Bena Iuda hanuadiahona bona Ierusalem ariaradia lalodiah lau ese kiri bona moale reğedia baina hadokodia, bona headava matamata tauna bona hahinenetia gadodia danu; badina be tano na baine mia ġagħae.

## 8

<sup>1</sup> Iehova na e tomu, Una negana ai Iuda paval-pavia bona Iuda lohiadia turiadia, bona hahe-laġa taudia bona peroveta taudia turiadia, bona Ierusalem inoholaina taudia turiadia, garadia amo bae lasilai;

<sup>2</sup> bena bae atodia rohoroho, dina bona hua bona hisiu iboudiai, e ura henidiava bona isiaidiah lao heniva ġaudia, e ġavadiava bona e tahudiava bona e toma henidiah dihova ġaudia, vairadiah. Basie haboudia bona basie guridia; a tano kopina ai bae mia, boromakau tagena e atoa rohoroho na heto.

<sup>3</sup> Iehova Sabaota na e tomu, Ina kara dikə oreana kwabukwabudia iboudiai ese mase bae ura henia bida, mauri bae ura henia maraġi, vada na luludia lao gabudia iboudiai Ialodiah.

### *Kara Dika bona Hahemaoro*

<sup>4</sup> Ba hamaorodiah, baoto,  
Iehova ini e gwau tomamu:

Taunimanima e ketomu negadia ai e tore isi  
loumu ani?

Ta bema raka siri, bena ma bema lou, ani?

<sup>5</sup> Matona, dahaka dainai ina bese taudia vada e  
raka siri,

vada e raka muri dabudabu?

Koikoi e badinaia tarika-tarikamu,  
asie uramu bae kerehai.

<sup>6</sup> Vada na hakala, vada na kamonai,  
a idia na asie hereva maoromaoro;  
asi tauna ta na ena kara dika amo e helalo kere-  
haimu,

e tomu “Dahaka vada na karaia?”

Iboudiai na ta ta ena dala ena dala ai e laomu,  
hos i na tuari gabuna e heau lalo-dika hen-  
amu na heto.

<sup>7</sup> Bo ġe na atai ai e nohomu,  
bona ena nega dibana,  
bona pune bona aibisi bona noko na  
edia mai negadia na dibadia;  
a lauegu bese taudia na.

Iehova ena taravatu asi dibadia.

<sup>8</sup> Edeheto o herevamu, o tomu  
“Ai na mai aonegamai

bona Iehova ena taravatu na ai emai ai” a?  
A itaia, itorena taudia edia puri koikoina ese  
hereva koikoina ai vada e halaoa.

<sup>9</sup> Aonega taudia na bae hahemaraidia;  
daradia bae doko, bena vada bae abidia.  
A itaia, Iehova ena hereva vada e dadaraia,

daka aonega na idia lalodiai?

<sup>10</sup> Taunabunai lau ese adavadia na haida baina  
henidia,  
bona edia uma na kwalimu taudia baina hen-  
dia;

- badina be maragina ela bona badana,  
     iboudiai ese mata-ganigani karadia e gugu-  
         laimu;  
 bona peroveta tauna ela bona hahelaǵa tauna,  
     iboudiai e kara koikoimu.
- 11 Egu orea taudia berodia vada e haǵoevadia  
     lamai-lamai,  
     eto “Maino, maino”,  
     maino do lasi negana ai.
- 12 Kara dika-rohorohona e karaia negana ai,  
     idia na e hemarai a?  
 Idia na asie hemarai, lasi ona lasi vaitani;  
     hemarai mamina na asi dibadia.  
 Taunabunai vada e keto taudia bogaragidai bae  
     keto;  
     baina hadava henidia negana ai vada bae  
     darere.  
 Iehova na e hereva nu.
- 13 Iehova na e tomu:  
     Iburukidia na urava negana ai,  
     vine audia na asi vinedia,  
     bona suke audia na asi sukedia;  
     rau danu vada e marai,  
     bona na henidia ǵaudia na ediai vada e boio.
- 14 Dahaka dainai ta helai kavamu?  
     Aita hegogo, hanua mai maǵudia lalodai  
         baitala,  
         unuseni ai baita mase;  
 badina be Iehova, eda Dirava, vada e revada  
         mase,  
         e imoraia ranuna vada e henida, baita inua,  
         badina be Iehova enai vada ta kara dika.
- 15 Maino ta naria, a ǵau namona ta asinema;

hahemauri negana ta naria, to, a itaia, hahe-gari mo e hedinarai.

- 16** Edia hosi edia hakoko na Dan amo e kamonaimu;  
 edia hosi mamaruanedia e tubebemu negadia ai na tano idoinai e tabubumu.  
 Idia na e maimu, tano mai anina idoinai ida e ani oremu,  
 hanua badana danu, mai inoholaina taudia ida.  
**17** Badina be gaigai na bogaragimui ai na siaidia vasimu,  
 duba, basie hamanadadia diba ġaudia;  
 bena idia ese bae korimui.  
 Iehova na e herevamu.

*Rohe-ahu Iuda bona Jerusalem latadiai*

- 18** Egu lalo-hisihisi na asi ihamarumaruna,  
 lalogu na e manoka-manokamu.  
**19** A hakala, egu bese kekenina e taitaimu,  
 tano ena lata bona ena lababa amo,  
 e tomu, Iehova na Siona lalonai se nohomu a?  
 Pavapavana na ia lalonai se nohomu a?  
 Badina be dahaka vada e habadugu,  
 e koro laulaudia bona idau taudia edia kaivakuku amo?  
**20** Taboro negana vada e ore, lailai huana vada e kau,  
 bona ta ese do se hamaurida;  
**21** badina be egu bese kekenina berona dainai  
 lalogu na e hisihismu,  
 na taitaimu, bena gari ese e butugu taomu.  
**22** Gilead na asi ena dahudahu muramurana a?  
 Asi gorere ihanamona tauna ta unuseni ai a?

Matona, dahaka dainai egu bese kekenina  
ena gorere na se namomu.

## 9

- <sup>1</sup> Kwaragu anina bema ranu mo,  
ben a matagu amo iruru-mata bema aru;  
ben a bama tai boi tai rani,  
egu bese kekenina ena mase taudia taidia  
bama tai.
- <sup>2</sup> Bema mai egu taruha ta tano ȁgagaena ai,  
ben a egu bese taudia bama rakatanidia,  
edia amo bama raka oho!  
Badina be idia iboudiai na heuda-hanai taudia,  
kara dibaka oreana;
- <sup>3</sup> maladia e marediamu peva na heto,  
koikoi karadia vada e goada tano lalonai,  
dia kara momokanidia;  
badina be dika ta amo e laomu ela bona ma dika  
ta,  
bona asi dibadia lau.  
Iehova na e herevamu.
- <sup>4</sup> Ta ta ese dekena tauna dekena tauna nahuadia  
bae toho,  
bona tadikakana ta basie abidadama henia;  
badina be tadikakamui iboudiai ese bae laimui  
oho,  
bona dekemui taudia iboudiai na e loa eva-  
evamu,  
hesivarai totona.
- <sup>5</sup> Ta ta ese dekena tauna dekena tauna e koidiamu,  
bona asi tauna ta ese hereva momokanina e  
gwauraiamu;  
maladia vada e hadibadia, bae hereva koikoi,  
kara havara e karamu, bona helalo-kerehai ai  
e hebala reamu.

**6** Hahehisu na hahehisu latanai e senuamu,  
 bona koikoi na koikoi latanai;  
 asie uramu bae dibagu.  
 Iehova na e herevamu.

**7** Taunabunai Iehova Sabaota na ini e gwau  
 tomamu:  
 A itaia, baina hañoevadia bona baina tohodia,  
 badina be ede ma bama kara toma,  
 egu bese taudia daidiae?

**8** Idia maladia na hahemase hakorena,  
 e hereva koikoimu;  
 ta ta uduna uduna amo maino e herevalaiamu,  
 dekedia taudia ediae,  
 a lalodiae ibani-henidia dalana e tahuamu.

**9** Iehova na e tomu,  
 Matadia basina hakanidia ini kara daidiae,  
 bona bese inihetomana davana basina henia,  
 a?

**10** Ororo ba tailaidia, ba tai lolololo,  
 tano ñagaena ena rei gabudia daidiae ba rohe  
 ahu;  
 badina be vada e havahudia, ta ese se rakadia  
 hanaimu,  
 bona boromakau ñoudia asie hekamonaimu;  
 atai manudia bona boroma idau-idau vada e  
 heau boio.

**11** Ierusalem baina ñigia dobi,  
 uda sisiadua edia kohua ai baina halaoa;  
 Iuda hanuadua baina habuadua tari,  
 asi inoholaina gabuna ai bainela.

### *Hahebua-tari na e maimu*

**12** Daika ena aonega na bada, bena ina na  
 dibana? Iehova uduna ese daika vada e hereva

henia, bena ia ese baine gwauraia? Badina be dahaka tano vada e hebua tari bona vada e vahu, tano ġaġaena na heto, bena tau ta ese se rakaia hanaimu?

<sup>13</sup> Iehova na e tomu, Badina be egu taravatu, vairadiai na atoa ġauna, vada e rakatania, bona lau gadogu asie kamonai bona asie rakalaia;

<sup>14</sup> a sibodia edia lalo-hadai vada e ġavadia mai lalo-aukadia ida, bona Baal muridiai vada ela, tamadia ese e hadibadia heġereġerena.

<sup>15</sup> Taunabunai, Iehova Sabaota, Israel Diravana, na ini e gwau tomamu: A itaia, ina bese taudia na ava iditana amo baina ubudia, bona e imoraia ranuna baina henidia, bae inua.

<sup>16</sup> Baina hakarohodia rohoroho, bese idau-idau, idia bona tamadia danu asi dibadia besedia, bogaragidiai; bona dare na idia muridiai baina siaia ela bona baina ha-oredia.

<sup>17</sup> Iehova Sabaota na ini e gwau tomamu:

A haeroa, tai-hevale hahinedia a boiridia;  
ima-idibaka hahinedia a boiridia baema.

<sup>18</sup> Idia na bae kara haraġa, bae tailaidia,  
bená iruru-matada bae diho;  
matada kopidia amo ranu baine aru diho.

<sup>19</sup> Badina be taitai reġena na Siona amo e maimu,  
e tomu,

Madi, vada ta dika vaitani,  
vada ta hemarai vaitani;

badina be eda tano vada ta rakatania,  
badina be eda rumu vada e gigidia dobi.

<sup>20</sup> Hahine e! Iehova ena hereva ba kamonai,  
ia uduna herevana na taiamui ai baine  
vareai;

natumui kekenidia na rohe-ahu ba hadibadia,  
 bona dekemui hahinedia na tai hahane ba  
 hadibalaidia.

**21** Badina be mase na eda ruma gaba-maurudia ai  
 vada e dae vareai,  
 eda lohia rumadia ai vada e dae kau;  
 memero bona kekeni na ruma ariaradia ai vada e  
 hamasedia,  
 bona eregabé taudia danu hanua ariaradia ai.

**22** A hereva, baoto,  
 Iehova na ini e gwau tomamu:  
 Mase taudia na bae heḡiḡi dobi,  
 boromakau tagena tano paka ai na heto,  
 eiava uit ikumidia uit iutuna tauna murinai na  
 heto,  
 ta ese basine haboudia.

### *Dirava i'imodaina*

**23** Iehova na ini e gwau tomamu: Aonega tauna  
 ese ena aonega basine heaḡilaia; goada tauna ese  
 ena goada basine heaḡilaia; taḡa tauna ese ena taḡa  
 basine heaḡilaia.

**24** A heaḡi e wamu tauna ese ina na baine  
 heaḡilaia: ia dibana lau bona egu ai lalona e  
 pararamu; dibana lau na Iehova, hebogahisi kara-  
 dia bona hahemaoro ḡoevaḡoeva bona kara maoro-  
 maorodia na karamu tanobada ai; badina be unu  
 ġau na moalelaidiamu. Iehova na e herevamu.

**25** Iehova na e tomu. A itaia, negana vada e  
 maimu, vada e heperitome to asi anina perito-  
 mena taudia iboudiai na lau ese davadia baina  
 henidia,

**26** Aigupto, Iuda, Edom, Amono besena, Moab,  
 bona tano ḡaḡaena ai e nohomu bona bagudia  
 huidia e merameramu taudia iboudiai. Badina be

ini bese iboudiai na asie peritomedia, bona Israel taudia danu peritome ai lalodia asie hahelaḡadia.

## 10

*Dirava koikoina: Dirava momokanina*

- 1 Israel besena e, Iehova ese e hereva henimu herevana na ba kamonai!  
Iehova na ini e gwau tomamu:
- 2 Basileia idau-idau edia dala basio hahedibalai,  
bona guba toadia basio garilai,  
basileia idau-idau ese e garilaidiamu dainai;  
3 badina be bese idau-idau edia kara na kokoikoi.  
Uda auna ta e hagariamu,  
bena ima-idibaka tauna ese ira amo e haḡoevaiamu;
- 4 taunimanima ese *silver* bona *gold* amo e ḡovaiamu,  
bona lavu bona ikoko amo e kokoa kaum,  
ia basine marere-marere helaoreana.
- 5 Edia kaivakuku na manu ihagaridia ḡaudia kiukamba umana ai na heheto;  
idia na asi hereva dibadia.  
Haida ese e huadia loaloamu,  
badina be asi raka dibadia.  
Garidia basio gari,  
badina be dika ikarana asi dibadia,  
bona namo ikarana danu asi dibadia.
- 6 Iehova e, oi na asi idaimu;  
oi na bada, bona oi ladamu siahuna na bada.
- 7 Bese idau-idau edia pavapava e!  
Daika ese basine gari henimu?  
Badina be oi ahumu korikori bunai.

Badina be bese idau-idau edia aonega taudia  
 iboudiai bogaradai,  
 bona edia basileia iboudiai lalodai,  
 oi na asi idaimu.

<sup>8</sup> Idia na lalo-duhu bona kavakava ġaudia;  
 kaivakuku edia hahediba na au ena mo.

<sup>9</sup> Silver, e botaiā palakamu ġauna, na Tarasisi amo  
 e mailaiamu,  
 bona gold na Ufasa amo.

Ikaradia na ima-idibaka taudia edia ġaukara,  
 bona gold iġaukaralaina taudia imadia  
 ġaukaradie;

edia dabua na ġahukaġahuka bona mia-kaka,  
 iboudiai na ima-idibaka taudia ese e karadia.

<sup>10</sup> A Iehova na Dirava korikorina;  
 ia na mauri Diravana bona noho-hanaihanai  
 Pavapavana.

E badumu negadia ai tano e lagamu;  
 ena badu henunai basileia idau-idau na asi  
 haheauka dibadia.

<sup>11</sup> Taunabunai ini ba hamaorodia toma, baoto:  
 Guba bona tanobada asie karadia diravadia na  
 tanobada amo bona guba henuna auno bae boio.

<sup>12</sup> Ia ese ena siahu amo tanobada e karaia,  
 bona ena aonega amo tanobada idoinai e  
 haginia,  
 bona ena lalo-parara amo guba e idia roro.

<sup>13</sup> Ia e herevamu negadia ai, ranu na e heguruamu  
 guba ai;  
 ia ese ninoa e hadaeamu, tanobada dokodia  
 amo.

Ia ese medu kevarudia e halasidiamu,  
 bona lai na ena habou-habou rumadia amo e  
 hakaudia lasimu.

**14** Taunaimanima iboudiai na kakavakava bona  
asi aonegadia,  
bona *gold* igaukaralaina taudia iboudiai na  
edia kaivakuku ese e hahemaraidiamu;  
badina be edia kaivakuku na koikoi ġaudia,  
bona asi laġadia.

**15** Idia na asi anidia, haero-kerere ese e havaradia;  
edia dava-abi negana ai bae mase.

**16** Iakob ahuna na dia unuheto;  
badina be ia ese ġau iboudiai vada e karadia.  
Ia dihina na Israel besena;  
ia ladana na Iehova Sabaota.

### *Iuda ihavahuna*

**17** Emui kohu ikumidia na tano amo bavabi isi,  
umui e daia ahumu hanuana ai o nohomu  
taumui.

**18** Badina be Iehova na ini e gwau tomamu:  
A itaia, ina nega ai tano inoholaina taudra na  
davedia lasimu;  
hisihisi na idia latadiai baina mailaia,  
bae mamia helaooreana.

**19** Madi ihabaigu, egu hisihisi dainai;  
vada na bero dikadika.

A lau nato, Momokani, ina na hisihisi ta;  
baina haheaukalaia.

**20** Egu dabua kalagana vada e ġiġia dobi,  
egu kalaga varodia iboudiai vada e motu;  
natugu ese vada e rakatanigu,  
idia na lasihidia.

Asi tauna ta ese egu dabua kalagana baine veria  
roro lou,

eiava egu seseahu dabuadia baine taudia dae.

**21** Badina be mamoe ireġudia taudia na  
kakavakava,

idia na Iehova enai asie henanadaimu;  
taunabunai edia namo asie habadaia,  
bona edia seri idoinai vada e karoho ro-  
horoho.

**22** A hakala, hari ta! A itaia, e maimu!  
Heloō-heloō badana mirigini kahana amo e  
maimu,  
Iuda hanuadia ihabua-taridia,  
bona uda sisiadia edia komu gabudia ai iha-  
laodia.

**23** Iehova e, lau dibagu taunimanima ena dala na  
dia ia sibona lalona ai,  
bona taunimanima ena raka na ia sibona ese  
basine gwauraia hidi.

**24** Iehova e, egu kerere dodinai mo matagu ba  
hakania,  
dia emu badu ai, ba habuagu tari na garina.

**25** Emu badu na ba seia dobi, asie dibamumu  
basileiadia latadiai,  
bona oi ladamu asie hahaneamu besedia lata-  
diai;  
badina be idia ese Iakob vada e hadonoa;  
vada e hadonoa, vada e ha-orea,  
bona ena noho gabuna vada e havahua.

## 11

### *Taravatu itata-utuna*

**1** Ina hereva na Iehova ena amo ema, Ieremia  
enai:

**2** Ina taravatu herevadia ba kamonai, bona  
Iuda taudia bona Ierusalem inoholaina taudia ba  
hereva henidia.

**3** Ba hamaorodia, baoto, Iehova, Israel Diravana, na ini e gwau tomamu: Ina taravatu herevadia basine kamonai henidia tauna na bae uduguiraiia.

**4** Taravatuna binai senemui na hağanilaidia, Aigupto tanona, auri amuna, amo na hakaudia lasi negana ai, nato, Lau gadogu ba kamonai, bona na hağanilaimuimu karadia iboudiai na ba. kara, unu amo umui na egu bese ai baola bona lau na emui Dirava ai bainala;

**5** bena senemui na gwaurai henidia gwauhamatana, nato rata bona badaranuna e arumu tanona baina henimui, na baina hamomokania, hari ina dina ai heğereğeren. Bena lau na haere, nato, Iehova e, unu baine heto.

**6** Bena Iehova ese e hamaorogu, eto, Ini hereva iboudiai na Iuda hanuadia ai bona Ierusalem ariaradia ai ba g vaurai hedinarai, baoto: Ina taravatu herevadia ba kamonai, bona karadia ba kara.

**7** Badina be senemui na sisiba henidia auka, Aigupto tanona amo na hakaudia lasi negana ai, na sisiba henidia loulou, asina hesiku, ema bona ina dina ai, nato, Lau gadogu ba kamonai.

**8** Ğau tamona, asie kamonai henigu bona taiadia asie hakala, a iboudiai na edia lalo-hadai dikadia ai bona edia lalo-uka ai e raka. Taunabunai, ina taravatu herevadia iboudiai, na hağanidia bae kara to asie kara ġaudia, na idia latadiiai na hadihodia.

**9** Iehova ese ma e hamaorogu, eto, Iuda taudia bona Ierusalem inoholaina taudia bogaragidiai haida na e gwau dagemu.

**10** Idia ese senedia, egu hereva ikamonaidia asie urava taudia, edia kara havara vada e lou hen, dirava idaudia muridiae vada ela, isiaidia bae lao hen totona. Israel besena bona Iuda besena taudia ese egu taravatu, senedia na henidiae ġauna, vada e tataia utu.

**11** Taunabunai, Iehova na ini e gwau tomamu: Lau ese dika na latadiai ba hadihoamu, basie roho mauri diba; ena be bae tai henigu, to basina kamonai.

**12** Bena Iuda hanuadie bona Ierusalem inoholaina taudia na baela, muramura mai bonadia e gabu henidiamu diravadia bae tai henidiae, to edia hekwakwanai negana ai unu idia ese basie hamauridiae diba.

**13** Badina be, Iuda e, emui dirava na emui hanua hohodia heğereğeredia; bona ihaboulaina patadia vada o hadai, sibomui ihahemaraimui, latadiai muramura mai bonadia Baal ba gabu henia totona, na Ierusalem ariaradia hohodia heğereğeredia.

**14** Taunabunai, ina bese taudia daidiae basio ġuriġuri; idia daidiae basio tai bona basio noinoi. Badina be edia hekwakwanai negana ai bae boi henigu, to lau na basina kamonai.

**15** Egu lalokau hahinena ese kara dikadia e karamu bena egu rumi ai e raka vareaimu na maoro eiava? Gwauhamata bona boubou ġaudia hidiodiae ese ihabua-tarimui baine laoa ahu diba a? Bena ba heagi diba a?

**16** Nega ta ai Iehova ese e gwauraimu “Olive auna maurina, huahuana e dobi badabadamu ġauna”; a mai lai-gubana bada-hereana ida ia ese baine ha-araia, bena rigina bae ara ore.

**17** Iehova Sabaota, e hadomui Diravana, ese dika na latamui ai vada e gwauraia, badina be Israel besena bona Iuda besena vada e kara dika, bona vada e habadugu, muramura mai bonadia na Baal e gabu henia dainai.

*Ieremia ihadikana e henegalaia*

**18** Iehova ese e hadibagu, bena na diba;  
bena edia kara dika o haheitalaigu.

**19** A lau na mamoe natuna manadana ta  
bae alaia mase gabuna e hakaua laomu na  
heto.

Asi dibagu lau ihadikagu totona e henega bou, eto,  
Au mai huahuana ida baita habuadia tari,  
mauri taudia edia tano amo baita negea daure,  
ia ladana basie laloa tao helaoreana.

**20** A Iehova Sabaota e, oi ese o hahemaoro  
goevañoevamu,  
oi ese taunimanima lalodia bona daradia o  
dibadiamu;

emu dava-ihenina idia latadiai na bama itaia,  
badina be egu dala na oi imamu ai vada na  
atoa.

**21** Taunabunai, hari Anatoto taudia, egu mauri  
iabi-ohona e tahuamu, e tomu “Iehova ladana  
ai basio peroveta, ai imamai amo ba mase na  
garina”, taudia na Iehova ese ini e herevalaia  
tomamu.

**22** Taunabunai, Iehova Sabaota na e tomu, A  
itaia, davadia baina henidia; eregabe taudia na  
dare ai bae mase; natudia mamaruanedia bona  
hahinedia na hitolo ese baine hamasedia;

**23** idia ta basine mauri. Badina be dika na  
Anatoto taudia latadiai baina hadihoa, edia dika  
davana ihenina lağanina ai.

# 12

*Ieremia ese Iehova e tai henia*

- <sup>1</sup> Iehova e, emu kara na maoromaoro,  
     na tai henimumu negadia ai;  
     gau tamona, egu ginikau gabuna herevadia na  
         oi vairamu ai baina gwaurai.
- Badina be dahaka kara dika taudia edia dala na e  
     namo e laomu?  
     Dahaka dainai kara dibaka taudia edia namo  
         na e bada e laomu?
- <sup>2</sup> Oi ese o hadodiamu, bena ramudia na e  
     hekaramu;  
     idia na e tubumu, e huahuamu;  
     ududia ai oi na kahikahi,  
         a lalodia ai oi na dauhai.
- <sup>3</sup> Iehova e, oi dibamu lau;  
     o itagumu, bona lalogu emu ai o dibaiamu.  
     Ba veridia lasi, bae aladia mamoeida na heheto;  
         bavatodia tabe, ala-ala dinana ena.
- <sup>4</sup> Tano baine taitai ela bona edena nega ai?  
     Gabu iboudiai reidia bae marai ela bona  
         edena nega ai?
- Tano inoholaina taudia edia kara dika daidiae,  
     tano boromadia bona manudia na e mase  
         oremu;  
     badina be taunimanima na eto  
         “Eda dala dokona basine itaia”.
- <sup>5</sup> Bema taunimanima ida o heau helulumu nega-  
     dia ai taumu vada e boera,  
         hos ida ede ba heau helulu toma?  
     Bona bema tano namona ai o ketomu,  
         ede ba kara toma Ioridane udana lalonai?
- <sup>6</sup> Badina be tadikakamu bona tamamu ena iduhu  
     taudia ese danu  
         vada e kara dibaka henimumu;

bona mai lolodia ida e hahavamu.  
 Ena be bae hereva namo henimu,  
 to edia hereva basio abi dae.

<sup>7</sup> Egu ruma vada na rakatania,  
 ahugu vada na negea.

Egu lalokau hahinena na  
 inaina imadia ai vada na atoa.

<sup>8</sup> Lau ahugu egu ai na uda leonana na heto;  
 vada e lolo henigu, una dainai na inai henamu.

<sup>9</sup> Ahugu egu ai na bogibada na heto a?  
 Vamu-ani manudia ese e daia ahumu a?

Aola, uda boromadia iboudiai ba haboudia;  
 ba hakaudia mai, bae ania ore.

<sup>10</sup> Mamoe iregudia taudia hutuma ese egu vine  
 imeana vada e habuaia tari,  
 egu inogo vada e moia tao;  
 egu inogo namona na  
 tano ġaġaena asi inoholaina ai vada e halaoa.

<sup>11</sup> Idia ese vada e havahua,  
 vahuna ese e tai henigumu;  
 tano idoinai vada e vahu,  
 bona tau ta ese se laloamu.

<sup>12</sup> Tano-ġaġaena ororodia nemuka-nemukadia  
 iboudiai latadiai,  
 hahebua-tari taudia vada e kau;  
 badina be Iehova ena dare na e ala-alamu,  
 tano hetoana dokona ta amo ela bona hetoa  
 kahana dokona,  
 ta asine mainomu.

<sup>13</sup> Idia ese uit vada e hadoa, to au giniginidia vada  
 e utu;  
 vada e hekwarahi mase, to edia hekwarahi na  
 asi anina.

Edia taboro daidiae bae hemarai,

Iehova ena badu ġaraġara dainai.

<sup>14</sup> Dekegu taudia dikadia, egu bese Israel ahuna, vada na henidia bae ġaunaia tanona, e dadia tohomu taudia, iboudiai na Iehova ese ini e herevalaidia tomamu: A itaia, edia tano amo baina dabuidia lasi, bona idia bogaragidia amo Iuda iduhuna baina dabuia lasi.

<sup>15</sup> Bena vada na dabuia lasi murinai ma baina bogadia hisi bona baina loulaidia, ta ta ahuna ahuna bona ta ta ena tano ena tano ediai.

<sup>16</sup> Una negana ai ia ese egu bese taudia edia dala bema tahu goadagoada, bona lau ladagu ai bema gwau hamata, bema toma “Iehova na e maurimu heġereġerena”, guna egu bese taudia na Baal ladana igwau-hamatalaina e hadibadiava na heto; bena idia na egu bese taudia bogaragidiai baina haginidia.

<sup>17</sup> A bese ta basinema kamonai, bena lau ese baina dabuia lasi vaitani bona baina habuaia tari. Iehova na e herevamu.

## 13

*Hereva heġereġerena: Riorio dabuana e mouka-mouka*

<sup>1</sup> Iehova ese ini e hamaorogu toma: Aola, riorio dabuana aukana ta ba hoia, bena ba riao, ranu ai basio urua diho.

<sup>2</sup> Taunabunai lau ese riorio dabuana ta na hoia, Iehova ena hereva heġereġerena, bena na riao.

<sup>3</sup> Bena nega iħaruana Iehova ena hereva na egu ai e kau, eto,

**4** Vada o hoia bona o rioamu dabuana avabia, ba tore isi, Eufrate sinavaina baola, unuseni ai nadi kohua-kohuana ta ai ba hunia.

**5** Taunabunai lau nala, Eufrate sinavaina badibadinai na hunia, Iehova ese e haganigu heğereğerena.

**6** Dina hoho muridiai Iehova ese ma e hamaorogu, eto, A tore isi, Eufrate sinavaina baola, vada na hağanilaimu bena unuseni ai o hunia dabuana na unu amo ma bavabia lou.

**7** Bena Eufrate sinavaina nala, tano na ġeia, hari riorio dabuana na na hunia gabuna amo ma na abia. A na itaia, una norio dabuana vada e mouka-mouka; ia na negenege ġauna mo.

**8** Bena Iehova ena hereva na egu ai e kau, eto,

**9** Iehova ini e gwau tomamu: Lau ese Iuda ena heaġi bona Ierusalem ena heaġi-bada na ene baina hadikadia toma.

**10** Ina kara dika besena, egu hereva ikamon-aidia asie uramu to sibodia edia lalo-hadai e ġavadiamu mai lalo-aukadia ida, bona dirava idaudia muridia amo e laomu, isiaidia bae lao hen i bona bae toma henidia diho totona, taudia na ina riorio dabuana, negenege ġauna, heğereğerena ai baela.

**11** Badina be riorio ġauna na tau ta koekoena ai e herio kunuka-kunuka na heto, lau ese Israel besena idoinai bona Iuda besena idoinai na koekoegu ai na riodia kunuka-kunuka, egu ai bese ta bona lada ta bona heimodai ta bona hairai ta ai bema lao; a idia na asie ura bae kamonai. Iehova na e herevamu.

*Hereva heğereğerena: Vine ranuna hodudia*

**12** Ina hereva ba hamaorolaidia, baoto, Iehova, Israel Diravana, na ini e gwau tomamu: Hodu iboudiai na vine ranuna ai bae honu. Bena bae haere henimu, baeto “Ai na asi dibamai hodu iboudiai na vine ranuna ai bae honu a?”.

**13** Bena ba hamaorodia, baoto, Iehova ini e gwau tomamu: A itaia, lau ese ina tano inoholaina taudia iboudiai na baina hakekerodia vaitani - pavapava, David ena terono ai e helaimu taudia, bona hahelaāga taudia, bona peroveta taudia, bona Ierusalem inoholaina taudia iboudiai.

**14** Bena baina huaridia, ta ta, tama bona natuna, tama bona natuna, bae hehuari heheni. Basina bogadia hisi, basina hamauridia, ihabua-taridia ai basina bogalaidia. Iehova na e herevamu.

### *Iuda ena lalo-auka davana*

**15** A kamonai, taiamui a hakala, basio hekoko-roku;

badina be Iehova vada e hereva.

**16** Iehova, emui Dirava, ba imodaia,

ia ese tano do se hadiburaiamu negana ai,  
ororo do asie vabura-vabura

bena aemui do asie hetutuhi negana ai,

diari ba tahua a ia ese vabura ai baine halaoa

bona dibura masemase baine havaraia

negana do se kau ai,

ia ba imodaia.

**17** A basioma kamonai,

bena lalogu baine tai hehuni, emui hekoko-roku dainai;

baina tai dikadika, iruru-matagu bae diho,

badina be Iehova ena mamoe serina na vada  
e abia mauri.

- 18** Hanua pavapavana mai sinana ida ba hamaorodia,  
 baoto: Henu ai ba helai;  
 badina be emui havava ġauna herea-daena na  
 kwaramui amo vada eme heabi oho.
- 19** Diho kahana hanuadia vada e hekou ahu,  
 asi ikehodia tauna ta;  
 Iuda taudia iboudiai na vada e laohaidia, gabu  
 daudau ai vada e hanohodia;  
 vada e laohaidia vaitani.
- 20** Matamui a gaga isi,  
 mirigini kahana amo e maimu taudia ba itadia.  
 Mamoe serina, e henimu ġauna, na edesenai ai?  
 Emu mamoe serina herea-daena be edesenai  
 ai?
- 21** Emu ai vada o hamanaadadia  
 bona turamu ai vada o halaodia taudia na  
 ikwaramu taudia ai bae halaodia negana ai,  
 ede ba hereva toma?  
 Hisihisi ese basine gugubamu,  
 hahine ena hekamonai hisidia na heheto, a?
- 22** Bena lalomu boma tahua, boma toma  
 “Dahaka dainai ini ġau na latagu ai vada e  
 kau?”,  
 emu kara dika bada-hereana dainai ramimu vada  
 e abia isi,  
 bena vada e hadikamu.
- 23** Etiopia tauna ese kopina baine ha-idaua,  
 eiava taiga ese kopina toutouna baine ha-  
 idaudia, a?  
 Bema unuheto, umui kara dikadia vada o man-  
 adailai taumui ese  
 kara namodia ba kara diba.

- <sup>24</sup> Lau ese baina hakarohomui rohoroho,  
     lai tano ġaġaena amo ese uit momodia e oda  
     ohomu na heto.
- <sup>25</sup> Iehova na e tomu: Oi ahumu binai,  
     vada na hahetoho henimu ġauna;  
     badina be vada o lalogu boio,  
     bona hereva koikoidia vada o abidadama  
     heni.
- <sup>26</sup> Lau sibogu ese vairamu ramina baina abia isi,  
     bona emu hemarai badina baine hedinarai.
- <sup>27</sup> Emu kara dika-rohorohodia vada na itadia,  
     emu heuda-hanai bona emu tubebe,  
     bona emu lebulebu karadia ororo gabaedia  
     ai.

Ierusalem e, madi ihabaimu!  
     Ela bona edena nega ai ba haheġoева?

## 14

### *Doe herevana*

- <sup>1</sup> Ina doe herevana na Iehova ena amo Ieremia  
     enai e kau, eto:
- <sup>2</sup> Iuda na e taitaimu,  
     ena ikoukou na e manokamu;  
     ena taunimanima na tano ai e rohe ahumu,  
     bona Ierusalem ena taitai na e daemu.
- <sup>3</sup> Ena lohia ese edia hesiai taudia na e siaidia  
     laomu,  
     ranu bae utu totona;  
     idia ese ranu gabudia e lao henidiamu,  
     a ranu asie davariamu;  
     edia hodu na asi anidia e loulaidiamu,  
     e hemaraimu bona e baiamu,  
     kwaradia e ġovadiah ahumu.
- <sup>4</sup> Ruarua taudia daradia e dokomu,  
     medu na tano ai se dihomu dainai;

biru taudia na e hemaraimu,  
kwaradia e ġovadiahum.

<sup>5</sup> Dia hahinena tano paka ai ese natuna, vara  
matamata ġauna, na e rakataniamu,  
rei lasi dainai;

<sup>6</sup> uda donikidia na ororo nemuka-nemukadia ai e  
ginimu,  
e laġa dae laġa daemu, uda sisiadia na heheto,  
matadia na e valahu-valahumu,  
aniani avadia lasi dainai.

<sup>7</sup> Iehova e, ena be emai kara havara ese e habade-  
laimaimu,  
to oi ladamu bagunai ba ġaukara;  
badina be emai raka-muri na momo,  
ai ese vada a kara dika henimu.

<sup>8</sup> Israel ena helaro e,  
ena hahemauri dika negadia ai,  
anina be dahaka tano ai ba noho idau tauna na  
heto,  
eiava laolao tauna dala amo e raka sirimu,  
ena mahuta gabuna e tahuamu, na heto?

<sup>9</sup> Anina be dahaka daradara tauna heġereġerena ai  
baola,  
eiava goada tauna hahemauri karadia asi  
dibana heġereġerena ai?

Ĝau tamona, Iehova e, oi na ai bogaragimai ai,  
bona ai na oi ladamu vada e henemailaimai;  
basio rakatanimai.

<sup>10</sup> Iehova ese ina bese na ini e herevalaia tomamu:  
Unu loa-kava loa-kava daladia mo e ura hen-  
dia bona aedia na asie rudia dainai,  
Iehova ese se abidia daemu;  
harihari edia kara havara baine lalodia tao,

bona edia kara dika davadia baine henidia.

<sup>11</sup> Iehova ese e hamaorogu, eto: Ina bese taudia edia noho-namo basio ġurigurilaia.

<sup>12</sup> Ena be e anivagamu, to edia taitai basina kamonai; ena be gole-oho bouboudia bona flaoa bouboudia bae hahelaġad-ia, to basina abidia dae; a dare amo bona doe amo bona dai-hanai goreredia amo baina aladia mase.

<sup>13</sup> Bena lau nato, Ĝaubada Iehova e, a itaia, peroveta taudia ese vada e hamaorodiamu, e tomu “Dare basio itaia bona doe basio mamia, a lau ese maino korikori baina henimui ina gabu ai”.

<sup>14</sup> Bena Iehova ese e hamaorogu, eto, Peroveta taudia ese hereva koikoidia e gwauraimu lau ladagu ai; lau ese asina siaidia, bona asina haġanidia eiava asina hereva henidia. Idia ese mata-hanai koikoina bona bagu-haoro asi anina bona sibodia edia lalo-hadai koikoidia na e perovetalai henimuimu.

<sup>15</sup> Taunabunai, hari peroveta taudia, lau ladagu ai e perovetamu to asina siaidiamu taudia, e gwaumu “Dare bona doe na ina tano ai basie kau” taudia, na Iehova ese ini e herevalaidia tomamu: Unu peroveta taudia na dare bona doe ese baine ha-oredia;

<sup>16</sup> bona e peroveta henidiamu taudia na Ierusalem ariaradia ai bae negedia lasi, doe bona dare ese bae aladia mase, bena idia bona adavadia bona natudia mamaruandedia bona hahinedia iguridia tauna ta basine noho; badina be idia sibodia edia kara dika na idia latadiai ma baina bubu.

<sup>17</sup> Ina hereva ba hamaorolaidia, baoto: Iruru-matagu bae diho boi bae diho rani,

idia na basie doko;  
 badina be egu bese natuna hane-ulato rami-  
     hebouna vada e haberoa dikadika,  
     vada e rahua mase.  
 18 Tano paka ai bama raka lasi,  
     a itaia, dare ai vada e mase taudia mo;  
 bona hanua ai bama raka vareai,  
     a itaia, doe ese e havaradia goreredia mo.  
 Badina be peroveta tauna bona hahelaġa tauna  
     ese  
     edia ġaukara na tano idoinai e karamu,  
     to asi aonegadia.

19 Iuda vada o dadaraia vaitani a?  
     Oi laumamu ese Siona e inai heniamu a?  
 Dahaka dainai vada o rahumai mamase,  
     bena asi ihamaurimai dalana?  
 Maino a tahua, a ġau namona ta se vara;  
     ihamaurimai dalana a tahua, a hahegari mo a  
     davarria.  
 20 Iehova e, emai kara dika a gwaurai hed-  
     naraimu,  
     bona tamamai edia kara havara danu;  
     badina be vada a kara dika henimu.  
 21 Oi ladamu bagunai basio dadaraimai,  
     emu terono herea-daena basio hahemaraia;  
 ba helalo tao,  
     bona emu gwauhamata emai ai na basio  
     tataia utu.  
 22 Bese idau-idau edia dirava bogaragidiae  
     ta ese medu ihadihona mai dibana a?  
 Eiava guba sibona ese  
     batugu baine hadihoa a?  
 Iehova e, emai Dirava, oi benai ani?  
     Emai helaro na oiemu ai,

badina be oi ese ini ġau iboudiai o karadiamu.

## 15

### *Iehova ena badu se dokomu Iuda latanai*

<sup>1</sup> Bena Iehova ese e hamaorogu, eto, Ena be Mose bona Samuel na vairagu ai bema gini, to lalogu basinema heğereğere ina bese taudia bama hageredia. Vairagu amo ba siaidia oho, ba kahudia nege!

<sup>2</sup> Bena bae nanadaimu, baeto “Ede baiala?”, negana ai, ba hamaorodia, baoto, Iehova na ini e gwau tomamu:

Dai-hanai gorerena ena, dai-hanai gorerena ese  
baine abidia,  
bona dare ena, dare ese baine abidia;  
doe ena, doe ese baine abidia,  
bona abi-mauri ena, vada bae abidia mauri.

<sup>3</sup> Iehova ma e tomu: Lau ese hahebua-tari ġaudia hani baina duanaidia, bae biagudia: dare, ialamasedia totona; sisia, idaredia totona; bona atai manudia bona uda boromadia, iani-oredia bona ihabua-taridia totona.

<sup>4</sup> Lau ese hahegari ġauna ai baina halaodia, tanobada basileiadia iboudiai ediai, Manase Heskia, Iuda pavapavana, ese Ierusalem ai e karaia ġauna dainai.

<sup>5</sup> Ierusalem e, daika ese baine bogamu hisi?

Daika ese oi taimu baine tai?

Daika baine raka siri,

oiemu noho dalana inanadailaina totona?

<sup>6</sup> Iehova na e tomu: Vada o dadaraigu,

bona murimu kahana o lao henia louloumu;

taunabunai, lau imagu vada na toia roro, oi  
 ihadikamu totona,  
 bona vada na habuamu tari;  
 hebogahisi ai na hesikumu.

<sup>7</sup> Itapo amo vada na tapodia hidi,  
 tano ikoukoudia ai;  
 egu hahemase ese natudia na edia amo vada e  
 abidia oho,  
 egu bese taudia vada na habuadia tari;  
 idia na edia dala amo asie raka siri.

<sup>8</sup> Edia vabu vada na hahutumadia,  
 kone mirina na heto;  
 dina tubua ai hahebua-tari tauna vada na siaia,  
 eregabe taudia sinadia ihadikadia totona;  
 hisihisi-bada bona gari-bada na  
 latadaii vada na hadiho taku.

<sup>9</sup> Natuna hahitu e havaradia hahinena na tauna  
 vada e manori,  
 vada e mase rea;  
 do dina ai iena dina vada e diho,  
 vada e hahemaraia bona vada na dadaraia.  
 Idia taudia oredia na dare baina henia, inaidia  
 vairadaii.  
 Iehova na e herevamu.

<sup>10</sup> Sinagu e, madi ihabaigu! O havaragu, heai  
 bona hepapahuahu taugu, tano idoinai enai.  
 Asina hen iorehai bona asina abi iorehai, to idia  
 iboudaii ese e uduguirraigumu.

<sup>11</sup> Iehova e, bema asina noimu, idia ihanamodia  
 totona, bona inai taudia daidaii asina noi henimu,  
 hekwakwanai bona hisi-ani negadia lalodaii, unu  
 bema vara toma.

**12** Auri, mirigin i kahana aurina, bona auri labora-laborana, na ta ese baine hakwaidua diba, a?

**13** Emu taḡa bona emu kohu namodia na dadi-dadi ġaudia ai baina halaodia, asi davadia, emu kara dika iboudiai daidiae, emu tano hetoadia iboudiai lalodiai.

**14** Oi inaimu edia hesiai tauna ai baina halaomu, asi dibamu tanona ai, badina be egu badu ese lahi ta vada e ha-araia, bena baine ara hanaihanai.

*Iehova ena gwauhamata Ieremia enai*

**15** Iehova e, oi dibamu;

ba lalogu tao, ba vadivadigu;  
bona e hahisihisigumu taudia na davadia ba henidia,

lau daigu ai.

Emu haheauka ai basio abigu oho;

ba diba, oi daimu ai hereva metaudia na huamu.

**16** Emu hereva na davaridiae, bena na anidiae,  
emu hereva ese e hamoalegu,  
lau lalogu ihamoalena ġaudia ai ela;

badina be Dirava, Iehova Sabaota e,  
lau be oi ladamu vada na henemailaia.

**17** E moale hebouva taudia bogaragidiae asina heliae,  
bona asina moale.

Sibogu na heliae, badina be oi imamu na latagu ai;  
badina be oi ese badu ai o hahonugu.

**18** Dahaka dainai egu hisihisi na asi dokona,  
bona berogu na asi ihanamona,  
se uramu baine namo lou?

Oi na sinavai-sinavai koikoina heġereġerena ai baola egu ai,

e kororomu ranudia heğereğeredia ai a?

<sup>19</sup> Taunabunai Iehova ini e gvau tomamu:  
Boma lou mai, bama haginimu lou,  
bena vairagu ai boma gini.

Bema hereva namo-hereadia ba gwaurai, dia  
hereva asi anidia,  
oi na lau udugu heğereğerenai ai baola.

Idia ese bae hağeregu,  
a oi ese basio hağeredia.

<sup>20</sup> Bena ina bese taudia ediai  
lau ese auri-laboralabora maguna aukana ai  
baina halaomu;  
idia ese bae tuari henimu,  
to basie hadareremu;  
badina be lau na oi ida,  
oi ihamaurimu bona irauamu totona.  
Iehova na e herevamu.

<sup>21</sup> Kara dika tauna imana amo baina rauamu,  
bona asi ena hebogahisi tauna imana amo  
baina hamaurimu.

## 16

### *Iehova ena hahemaoro*

<sup>1</sup> Iehova ena hereva na egu ai e kau, eto:

<sup>2</sup> Hahine ta basio adavaia, bona natumu ma-  
maruanedia eiava hahinedia basio havaradia ina  
gabu ai.

<sup>3</sup> Badina be Iehova ese ina tano ai e varamu  
memerodia bona kekenidia, bona e abidia  
hahinedia bona e havaradia taudia na ini e  
herevalaidia tomamu:

<sup>4</sup> Idia na mase goreredia amo bae mase. Haida  
ese basie rohedia ahu bona basie guridia; idia  
na tano kopina ai bae mia, boromakau tağena na

heto. Dare bona doe ese bae hamasedia, bena tauani masedia na atai manudia bona uda boromadia adia aniani ai baela.

<sup>5</sup> Badina be Iehova na ini e gwau tomamu: Taitai rumana lalonai basio raka vareai, rohe-ahu totona basiola, basio tailaidia; badina be egu maino bona egu lalokau bona egu hebogahisi na ina bese taudia edia amo vada na abi oho. Iehova na e herevamu.

<sup>6</sup> Kikina-badana na ina tano ai bae mase; haida ese basie guridia; bona tau ta ese basine tailaidia, eiava basine tai hekakasi eiava kwarana basine naua, idia daidiai.

<sup>7</sup> Ta ese aniani basine dabaraia taitai tauna ana, mase dainai tauna baine haloa totona; bona ta ese tauhalo keherena basine henia, tamana eiava sinana daidiai baine inua totona.

<sup>8</sup> Aria rumana lalonai basio raka vareai, aria taudia ida basio helai hebou, idia ida basio aniani bona basio inuinu.

<sup>9</sup> Badina be Iehova Sabaota, Israel Diravana, na ini e gwau tomamu: A itaia, umui vairamui ai bona umui emui nega ai, kiri reğedia bona moale reğedia, headava matamata tauna gadona bona headava matamata hahinena gadona, na ina gabu ai baina hadokodia.

<sup>10</sup> Ini hereva iboudiai na ina bese taudia ba hamaorodia negana ai, idia ese bae hereva hemimu, baeto, Dahaka dainai Iehova ese ina dika badana idoinai na ai latamai ai vada e gwauraia? Emai kara havara be dahaka? Emai kara dika, Iehova, emai Dirava, enai vada a karaia, be dahaka?

<sup>11</sup> Una negana ai oi ese ba haere henidia, baoto, Iehova na e tomu: Badina be tamamui ese vada e rakatanigu, dirava idaudia muridia amo vada ela,

isiaidia vada e lao hen, bona vada e toma henidia diho; lau vada e rakatanigu bona egu taravatu asie badinaia,

<sup>12</sup> bona tamamui edia kara dika vada o hereadia; a itaia, iboumui ai emui ura dikadia aukahereadia o badinadiamu, bona asio uramu lau ba kamonai henigu.

<sup>13</sup> Taunabunai, lau ese ina tano lalona amo baina tahomui lasi, umui asi dibamui bona tamamui asi dibadiah tanona ai, unuseni ai dirava idau dia isiaidia ba lao hen, dina ai bona hanuaboi ai; badina be lau ese basina lalo namo henimui.

<sup>14</sup> Iehova na e tomu: Taunabunai ba itaia, dinadia na e maimu, taunimanima na basie hereva lou, basieto “Iehova; Israel taudia na Aigupto tanona amo e hakaudia lasi Diravana, e maurimu heğereğerena”,

<sup>15</sup> a baeto “Iehova, Israel taudia na mirigini kahana tanona amo bona e luludia lao tanodia iboudiai amo vada e loulaidia Diravana, e maurimu heğereğerena”. Badina be lau ese ma baina hakaudia lou, edia tano korikori, senedia na henidia tanona, lalonai.

<sup>16</sup> Iehova na e tomu: A itaia, haoda taudia hutuma na boiridiamu; idia ese bae aladia. Una murinai, labana taudia hutuma baina boiridia; bena ororo badadia bona marağidia iboudiai lata diai bae tahudia, bona kohuakohua lalodiai danu.

<sup>17</sup> Badina be lau matagu ese edia dala iboudiai e raraidiamu; egu ai idia na asie hehunimu, bona edia kara-havara na lau matagu amo asie helavahumu.

<sup>18</sup> Edia kara havara bona edia kara dika davadia baina henidia harua, badina be idia ese egu tano na edia kaivakuku dika-hereadia tau-anidia amo

vada e hamiroa, bona lau ahugu tanona na edia āgau dika-rohorohodia amo vada e hahonua.

<sup>19</sup> Iehova e, egu goada bona egu gabu-aukana,  
egu roho-mauri gabuna, hekwakwanai di-  
nana ai;  
tanobada dokodia amo  
bese iboudiai bae vasi, baeto:  
Tamamai ahudia na koikoi mo,  
āgau asi anidia bona asi namodia.  
<sup>20</sup> Tau ta ese sibona ena dirava baine karadia diba  
a?  
Unuhetomadia na dia dirava.

<sup>21</sup> Taumabunai, a itaia, lau ese baina hadibadia,  
ina nega tamona egu siahu bona egu goada baina  
hadibalaidia, bona bae diba lau ladagu na Iehova.

## 17

### *Iuda taudia lalodia vada e kerere*

<sup>1</sup> Iuda taudia edia kara dika na auri purina  
amo vada e torea; vasiga matana amo idia lalodia  
ai vada e gasia, bona edia ihaboulaina patadia  
doadia ai;

<sup>2</sup> bona natudia ese danu edia ihaboulaina pata-  
dia e lalodia taomu, bona edia au-tubua helāgadie  
danu, au mauridia iboudiai badibadidiai, bona  
ororo doridia ai,

<sup>3</sup> bona tano paka ororodia ai. Emu taāga bona  
emu kohu namodia iboudiai na haida baina hen-  
idia, edia dadidadi āgaudia, emu kara dika davana  
emu tano idoinai lalonai.

<sup>4</sup> Imamu na ahumu, na henimu āgauna, amo  
do bavabia oho, bena baina siaimu, asi dibamu  
tanona ai inaimu isiaidia ba lao hen; badina be

egu badu ai lahi ta vada e ara, bona baine ara hanaihanai.

**5** Iehova ini e gwau tomamu:  
 Taunimanima e abidadama henidiamu,  
     bona hidio na ena goada badina ai e ha-  
     laoamu,  
 bona lalona na Iehova ena amo e raka ohomu,  
     tauna na bae uduguiraira.  
**6** Ia na au rabatarina tano kaukauna ai na heto;  
     ḡau namona ta ia vairanai basine hedinarai.  
 Tano ḡaġaena haura-hauradia ai baine noho,  
     laguta ai, tau ta ese se noholaiamu tanona ai.

**7** Iehova e abidadama heniamu tauna na namo;  
     ena heabidadama na Iehova.  
**8** Ia na ranu badinai e hadoamu auna na heto,  
     ia ramuna na e hetoimu, sinavai badibadinai;  
 siahu negana ai ia na se garimu,  
     badina be ia rauna dounu e maurimu;  
 laġani dikana ai ia na se hekwarahimu,  
     badina be huahuana ihavarana se  
     hadokoamu.

**9** Taunimanima lalodia na koikoi herea bona dika  
     rohoroho,  
     daika ese baine dibadia?  
**10** Lau Iehova ese taunimanima daradia na tahu-  
     diamu,  
     bona lalodia na tohodiamu,  
 taunimanima ta ta ena dala ena dala  
     bona ena kara anina ena kara anina  
     heġereġeredia  
     baina henidia totona.

- 11 Aba ese natuna, se hapapadia ġaudia, na e haboudiamu na heto,  
taġa e habouamu, a dia kara maoromaoro amo, tauna na unuheto;  
ena mauri bogaraginai idia ese bae rakatania,  
bona ena mauri dokona ai ia na kavakava tauna ai bainela.
- 12 Matamana amo atai ai e atoa teronona heleadaena na eda gabu helāgana.
- 13 Iehova e! Israel ena helaro e!  
E rakatanimu taudia iboudiai na bae hahemaraidia;  
oiemu amo e raka murimu taudia ladadia na tanobada ai mo bae hetore,  
badina be Iehova, mauri ranuna lohilohina,  
vada e rakatania.
- 14 Iehova e, ba hanamogu, bena do baina namo;  
ba hamaurigu, bena do baina mauri;  
badina be oi na egu heimodai Diravana.
- 15 A itaia, idia ese e hereva henigumu, e tomu  
“Iehova ena hereva be edesenai ai? Bainema!”
- 16 Lau ese asina noimu dika ba siaia,  
bona hahebua-tari dinana asina uralaia;  
oi danu dibamu;  
udugu bibinadia amo e lasi herevana na  
oi vairamu ai mo e lasi.
- 17 Basio hagarigu;  
oi na egu roho-mauri gabuna, dika e kaumudinana ai.
- 18 E hahisihisigumu taudia na bae hahemaraidia,  
a lau na basie hahemaraigu;  
idia na kudoudia bae hetaha,  
a lau kudougu basine hetaha;

dika dinana na latadiai ba hadihoa,  
ba habuadia tari vaitani.

*Dina Helaāga ihahelaāganā*

**19** Iehova ese ini e hereva henigu toma, eto:  
Aola, Beniamina Ikoukouna, Iuda pavapavadia  
e raka vareaimu bona e raka lasimu ikoukouna,  
enai ba gini, bona Ierusalem ikoukoudia iboudiai  
ediae danu.

**20** Bena baoto: Iuda pavapavamui bona Iuda  
taumui iboumui ai bona Ierusalem inoholaina  
taumui iboumui ai, ini ikoukou amo o raka  
vareaimu taumui, Iehova ena hereva ba kamonai.

**21** Iehova ini e gwau tomamu: Emui mauri  
nahuadia ba toho, Dina Helaga ai maduna ta basio  
huaia, eiava ini Ierusalem ikoukoudia amo basio  
vareailaia,

**22** bona Dina Helaga ai maduna ta na emui  
ruma amo basio huaia lasi. A Dina Helaāga na  
ba hahelaāgai, lau ese senemui na haāganilaidia  
heāgereāgerena.

**23** Ģau tamona, idia na asie kamonai, taiadia  
asie hakala, a aiodia e ha-aukadia, basie kamonai  
bona hahediba herevadia basie abi dae dainai.

**24** Iehova na e tomu: Boma kamonai henigu,  
Dina Helaāga ai maduna ta ina hanua ikoukoudia  
amo basioma vareailaia, a Dina Helaāga na boma  
hahelaāgai bona ia lalonai ġaukara ta basioma  
karaia;

**25** bona pavapava haida, David ena terono ai  
e helaimu taudia, na ina hanua ikoukoudia amo  
bae heau vareai, kariota ai bona hosi latadiai,  
idia bona edia lohia taudia, Iuda taudia bona  
Ierusalem inoholaina taudia; bona ina hanua na  
bae noholaia hanaihanai.

**26** Bena taunimanima na Iuda hanuadia bona Ierusalem hegegemadaina hanuadia bona Beniamina tanona bona taora tanodia bona ororo tanodia bona diho kahana tanodia amo baema, ġoleoho boubou ġaudia bona boubou idau-idau ġaudia bona naoa boubou ġaudia bona muramura mai bonadia na bae mailai, bona hahenamo herahidia danu bae mailai, Iehova ena dubu lalonai bae vareailai.

**27** A basioma kamonai henigu, Dina Helaġa basioma hahelaġaia, bona Dina Helaġa ai maduna ta boma huaia, Ierusalem ikoukoudia ai boma vareailaia; bena lau ese lahi ta baina ha-ariaa ena ikoukou ai, bena una lahi ese Ierusalem ena lohia rumadia baine aradia ore; tau ta ese basine habodoa.

## 18

### *Hereva heġereġerena: Uro ikarana tauna*

**1** Iehova ena hereva Ieremia enai e kau, eto:

**2** A tote isi, uro ikarana tauna ena ruma a diho henia lao, unuseni ai baina hereva henimu.

**3** Taunabunai, uro ikarana tauna ena ruma na diho henia lao, unuseni ai ena uro na igirogirona patana ai e ġaukaralaiava.

**4** E karaiava urona na uro ikarana tauna imana ai e dika; bena ia ese e kuia lou, uro idauna ta e karaia, uro ikarana tauna ena lalo-hadai heġereġerena.

**5** Bena Iehova ena hereva na egu ai e kau, eto:

**6** Israel besena e, ina uro ikarana tauna vada e karaia heġereġerena ai lau ese basina kara henimu diba a? Iehova na e herevamu. Israel besena e, a

itaia, raro na uro ikanara tauna imana ai na heto, umui na lau imagu ai.

<sup>7</sup> Bema nega ta ai lau ese bese ta eiava basileia ta baina herevalaia, bainato baina butua oho, baina hahegiāga dobi, baina habuaia tari;

<sup>8</sup> bena una na herevalaia besena ese ena kara dika baine rakatania, lau na baina helalo kerehai, bona na haeroa karana, ia ihadikana karana, na basina kara henia.

<sup>9</sup> Bona bema nega ta ai lau ese bese ta eiava basileia ta baina herevalaia, bainato baina haginia bona baina hadaia,

<sup>10</sup> bena ia na lau vairagu ai baine kara dika bona lau gadogu basine kamonai, lau na baina helalo kerehai, bona na haeroa karana, ia ihanamona karana, na basina karaia.

<sup>11</sup> Taunabunai, harihari Iuda taudia bona Ierusalem inoholaina taudia na ba hamaorodia, baoto, Iehova ini e gwau tomamu: A itaia, lau ese umui ihadikalaimui karana ta na hegaegaeliamu bona ihadikalaimui dalana ta na haeroa hegaaem. Ibouboumui ai emui dala dikadia amo ba lou, bona emui dala bona emui kara ba hāgoevadia.

<sup>12</sup> A idia na e tomu, Una na asi anina; ai na sibomai emai lalo-hadai baia badinadia, bona ta ta emai lalo-hadai dikadia baia goadalai, mai lalo-aukamai ida.

<sup>13</sup> Taunabunai Iehova na ini e gwau tomamu:  
Bese idau-idau bogaragidiai ba henanadai,  
daika ese hereva inihetomana vada e kamonai?

Hane-ulato rami-hebouna Israel ese  
gau dika-rohorohona ta vada e karaia.

<sup>14</sup> Lebanon snow-dia na Sirion hagadia amo e veve  
ohomu a?

Ororo ranudia, sinavai keruma-kerumadia, e  
kororomu a?

<sup>15</sup> A lauegu bese taudia ese vada e lalogu boio;  
muramura mai bonadia na dirava koikoidia e  
gabu henidia.

Idia na edia dala ai vada e hetutuhi,  
sene negana daladia;  
uda daladia ai vada e raka,  
dia laolao dalana ai.

<sup>16</sup> Edia tano na hahegari ġauna ai vada e halaoa,  
bae si henia hanaihanai ġauna;  
e rakaia hanaimu taudia iboudiai na gari ese e  
butudia taomu,  
bona kwaradia e taiko-taikomu.

<sup>17</sup> Laurabada na heto baina odadia rohoroho in-  
aidia vairadiah,  
baina muri henidia, basina vaira henidia,  
edia hahedika dinana ai.

### *Jeremia ena ġuriġuri*

<sup>18</sup> Bena idia eto, Aoma, Ieremia ihadikana dal-  
adia baita haero, badina be taravatu na hahela ġa  
tauna enai basine boio, bona hahealo herevadia  
na aonega tauna enai basie boio, bona hereva na  
peroveta tauna enai basine boio. Aoma, baita  
uduguiraia, bona ena hereva ta basita abia dae.

<sup>19</sup> Iehova e, a hakala henigu,  
egu noinoi a kamonal!

<sup>20</sup> Dika be namo davana a?  
Gau tamona guri ta vada e ġeia,  
egu mauri iabi-ohona totona.

Ba laloa tao, lau na oi vairamu ai na gini,

idia ihanamodia herevadia baina gwaurai totona,  
bona emu badu na idia edia amo baina laoa ahu totona.

**21** Taunabunai, natudia na doe amo ba hahitolodia,  
dare ena siahū henunai bavatodia,  
adavadia na ba hagabanidia bona ba havabudia.

Edia tatau na dai-hanai gorerena ese baine hamasedia,  
bona edia uhau na dare ese baine aladia mase tuari lalonai.

**22** Dadidadi taudia ba siaidia bena bae hahoadia negana ai,  
taitai na edia rumā amo baine hekamonai;  
badina be guri vada e ġeia lau iabigu totona,  
bona idoa vada e atodia, lau aegu idoadia totona.

**23** Ĝau tamona, Iehova e, edia kara iboudiai oi dibamu,  
idia na e henega boumu, lau iala-masegu totona.

Edia kara havara basio gwaua tao;  
edia kara dika na oi vairamu amo basio kokia oho.

Oi vairamu ai bae darere;  
emu badu negana ai ba kara henidia.

## 19

### *Hereva heġereġerena: hodunodu e makohi*

**1** Iehova ini e gwau toma: Aola, uro ikarana tauna ena hoduhodu ta ba hoia, bena hanua taubadadia haida bona hahelāga taudia badadia haida na bavabidia;

<sup>2</sup> bena ba raka lasi, Hinom natuna ena koura baola, Ataga Ikoukouna raka-vareaina ai. Unuseni ai na hamaorolaimunu herevadia ba gwaurai hedinarai.

<sup>3</sup> Baoto: Iuda pavapavana hahidaosi bona Ierusalem inoholaina taumui e, Iehova ena hereva ba kamonai. Iehova Sabaota, Israel Diravana, na ini e gwau tomamu: A itaia, lau ese dika badana ta ina gabu latanai baina havaraia; bena bae kamonai taudia iboudiai na taiadia bae hemai-hemai.

<sup>4</sup> Badina be taunimanima ese vada e rakatanigu, ina gabu vada e hamiroa, ia lalonai muramura mai bonadia vada e gabu, dirava idaudia, idia bona tamadia bona Iuda pavapavadia iboudiai na asi dibadia diravadia, ediai; bona, badina be ina gabu na asi edia kerere taudia raradia ai e hahonua,

<sup>5</sup> bona Baal ena atai gabudia vada e larebadia, natudia mamaruanedia na lahi ai bae haǵoledia, Baal ena gole oho boubou ǵaudia ai bae halaodia, totona; a lau ese una kara asina haheǵanilaia eiava asina hahedualaia, bona asina laloa davari.

<sup>6</sup> Iehova na e tomu: Taunabunai, ba itaia, nega na e maimu ina gabu ladana basie hatoa “Tofete” eiava “Hinom natuna ena koura”, a bae hatoa “Ala-ala Kourana”.

<sup>7</sup> Ina gabu ai lau ese Iuda bona Ierusalem edia lalo-hata ǵaudia na asi anidia ǵaudia ai baina halaodia, bona edia taunimanima na inaidia edia dare amo bona edia mauri iabi-ohona dalana e tahuamu taudia imadia amo baina hamasedia. Bena lau ese tau-anidia masedia na atai manudia bona uda boromadia baina henidia, adia.

<sup>8</sup> Ina hanua na gari ihavarana ǵauna ai baina

halaoa, taunimanima ese bae silaia ġauna; e rakaia hanaimu taudia iboudiai na bae gari bona bae si dagu, enai e varamu karadia dikahereadia daidiai.

<sup>9</sup> Bena inaidia bona edia mauri iabi-ohona dalana e tahuamu taudia ese bae koudia ahu bona bae hahisihisidia negana ai, lau ese natudia maruanedia bona hahinedia hidiodia baina hanidia, bona ta ta dekena tauna dekena tauna hidiodia bae ani danu.

<sup>10</sup> Bena oi ese hari hoduhodu ba hamakohia, oi ida baola taudia vairadiai.

<sup>11</sup> Bena ba hamaorodia, baoto, Iehova Sabaota na ini e gwau tomamu: Ina bese bona ina hanua na unu baina hamakohidia toma, uro ikarana tauna ena hoduhodu e hamakohiamu, asi ibanina, na heto. Mase taudia na Tofete ai bae guridia, badina be asi iguridia gabuna idauna ta.

<sup>12</sup> Iehova na e tomu: Lau ese ina gabu mai inoholaina taudia ida na unu baina karadia toma; ina hanua na Tofete heğereğerena ai baina halaoa.

<sup>13</sup> Bena Ierusalem taudia edia ruma bona Iuda pavapavana hahidaosi edia ruma, guhidia ai muramura mai bonadia e gabu, dina bona hua bona hisiu iboudiai ediai, bona inuinu bouboudia e bubu, dirava idaudia ediai, rumadie na bae hamirodia, gabu ladana Tofete heğereğerena.

<sup>14</sup> Bena Ieremia na Iehova ese e siaia lao unuseni ai baine peroveta totona gabuna, Tofete, amo vada ema, Iehova ena dubu maguna lalonai e gini; bena ia ese taunimanima iboudiai e hereva henidia, eto,

<sup>15</sup> Iehova Sabaota, Israel Diravana, na ini e gwau tomamu: A itaia, ina hanua badana latanai bona digina hanuadia iboudiai latadiai lau ese

dika idoinai ia latanai vada na gwauraia na baina hadihoa; badina be idia ese aiodia vada e haaukadia, bona egu hereva ikamonaidia asie ura.

## 20

### *Pasahuru iuduguiraina*

<sup>1</sup> Hahelaġa tauna Pasahuru, Imere natuna, Iehova ena dubu itataona tauna badana, na e kamonai, Ieremia ese ini ġau vada e perovetalai.

<sup>2</sup> Bena Pasahuru ese peroveta tauna Ieremia e dadabaia, bena hekahī-tao audia ai e atoa, Iehova ena dubu ikoukouna, ladana Beniamina Ikoukouna, atai ġauna, enai.

<sup>3</sup> Daba rerena ai, Pasahuru ese Ieremia na hekahī-tao audia amo e kahua nege. Bena Ieremia ese e hamaoroa, eto, Iehova ese ladamu se hatoamu “Pasahuru”, a e hatoamu “Hahegari heġegemadai”.

<sup>4</sup> Badina be Iehova ini e gwau tomamu: A itaia, lau ese oi sibomu ihagarimu bona oi turamu iboudiai ihagaridia ġauna ai baina halaomu. Idia na inaidia edia dare matadia ai bae mase, oi vairamu ai. Bena lau ese Iuda taudia iboudiai na Babulono pavapavana imana ai baina atodia; ia ese baine ġuidia, Babulono baine laohaidia, dare amo baine aladia mase.

<sup>5</sup> Ina danu, hanua badana ena taġa idoinai, vada e habou ġaudia bona e heaġilaimu kohudia iboudiai, bona Iuda pavapavadia edia kohu namodia iboudiai, na inaidia imadia ai baina atodia; idia ese bae dadihaidia, bae dabaidia tao, bena Babulono bae laohaidia.

<sup>6</sup> Bona oi Pasahuru, bona emu rumu inoholaina taudia iboudiai, na bae ġuimui, oi bona turamu

iboudiai, ediai vada o peroveta koikoi taudia, Babulono do baola, unuseni ai ba mase, unuseni ai bae gurimui.

*Ieremia ena herohe-ahu*

**7** Iehova e, oi ese vada o dibağanigu,

bena vada o koigu;

oi ese goada ai vada o hereagu,

vada o kwalimu.

Dina idoinai e kirikirilaigumu;

iboudiai ese e ġonaġonalailigumu.

**8** Lau na herevamu negadia ai na ġabamu,

na lolomu, na tomu “Daġedaġe bona hahebutari”.

Badina be Iehova ena hereva na egu ai

gwau-gwau bona hekirikirilai ġauna ai e laomu, dina idoinai.

**9** Bama toma “Ia ladana basina hatoa

eiava ia ladana ai basina hereva lou”,

to lalogu na e kara lahi e aramu na heto,

turiagu ai e miamu;

ihaheukalaina ai na hesikumu,

asi haheauka dibagu.

**10** Badina be hutuma edia hemaunu na kamonaimu,

hahegari ese e ġeġegu daemu.

“A habadelaia; aita habadelaia”;

na manada henidiamu taudia iboudiai na unu e hereva tomamu;

e raraigu taomu, baina keto e tomamu.

E tomu “Reana ta ese baine koia, bena baita hadarea,

bena davada baita abia ienai”.

**11** A Iehova na egu tuari tauna mai garina na heto,

taunabunai ihahisihisigu taudia na bae hetu-  
 tuhi;  
 idia ese basie hadareregu.  
 Idia na bae hemarai dikadika,  
     badina be basie kwalimu;  
     idadaraidia na baine hesiriu,  
         bona basine boio ela bona hanaihanai.  
 12 Iehova Sabaota e, oi ese kara maoromaorodia  
     taudia o tohodiamu,  
     taunimanima lalodia bona daradia o dibadi-  
         amu;  
     emu dava-abi idia latadiai mani baina itaia,  
         badina be egu ginikau gabuna na emu ai vada  
             na atoa.  
 13 Ane avabia, Iehova ena;  
     Iehova ba imodaia!  
     Badina be e dabu taudia na ia ese vada e hamau-  
         ridia,  
         kara dika taudia imadia amo.  
 14 Na vara dinana na  
     na uduguiraiamu;  
     sinagu ese e havaragu dinana na  
         ta ese basine hanamoia.  
 15 Hereva na tamagu dekena e laohaia, eto  
     “Natumu maruanena ta vada e vara”,  
     bena unu amo e hamoalea bada,  
         tauna na na uduguiraiamu.  
 16 Una tau na Iehova ese e ġigħia dobi, se bogaia hisi,  
     hanuana  
     heġereġerena ai bainela;  
     daba ai taitai ta baine kamonai,  
         bona dina tubua ai dika harina ta.  
 17 Badina be sinagu bogana ai se alagu mase;  
     unu bema kara toma sinagu na egu gara ai  
         bema lao,

bona bogana bema bada hanaihanai.

**18** Dahaka dainai sinagu bogana amo na lasi,  
hekwarahi bona lalo-hisihisi na mamidia,  
bona egu mauri dinadia na hemarai ai na ha-  
orediamu?

## 21

### *Peroveta herevadia Ierusalem latanai*

**1** Ina na Iehova ena hereva, Ieremia enai e kau,  
King Sedekia ese Pasahuru Malkia bona hahelaǵa  
tauna Sefania Maaseia na ia dekena e siaidia lao  
negana ai. Idia eto,

**2** Iehova ba nanadaia ai daimai ai, badina be  
Nebukadresara, Babulono pavapavana, ese e tu-  
ari henimaimu; reana Iehova ese ena hoa kara-  
dia iboudiai heǵereǵeredia ai baine kara henimai,  
bona ai emai amo baine haloua.

**3** Bena Ieremia ese e haere henidia, eto,

**4** Sedekia na ini ba hamaoroa toma, baoto,  
Iehova, Israel Diravana, na ini e gwau tomamu:  
A itaia, tuari ǵaudia imamui ai mimia, Babulono  
pavapavana bona Kaldea taudia, emui hanua ma-  
guna murimurinai e gegemui ahumu taudia, o  
tuarilai henidiamu ǵaudia, na baina laodia ahu,  
bona inaimui na ina hanua bogaraginai baina  
haheboudia.

**5** Lau sibogu ese baina tuari henumui mai  
imagu hetoi-rorona bona imagu goadana ida,  
badu ai bona daǵedaǵe ai bona badu-garagara  
bada-hereana ai.

**6** Bona ina hanua inoholaina taudia baina  
harahudia mase, taunimanima bona ubu-ubu  
ǵaudia danu; dai-hanai gorerena badana ta ese  
baine hamasedia.

<sup>7</sup> Iehova ma e tomamu: Una murinai lau ese Sedekia, Iuda pavapavana, bona ena hesiai taudia, bona ina hanua taudia hahidaosi dai-hanai gorerena bona dare bona doe amo bae roho mauri taudia, na Nebukadresara, Babulono pavapavana, bona adia inai taudia, edia mauri iabi-ohona dalana e tahuamu taudia, imadia ai baina atodia. Ia ese dare matana amo baine aladia mase; basine bogadia hisi, basine kahudia nege, basine bogalaidia.

<sup>8</sup> Bena ina bese taudia danu ba hamaorodia, baoto, Iehova na ini e gwau tomamu: A itaia, lau ese mauri dalana bona mase dalana na vairamui ai vada na atodia.

<sup>9</sup> Ina hanua lalonai baine noho tauna na dare bona doe bona dai-hanai gorerena amo baine mase; a baine raka lasi, sibona hari Kaldea taudia, e gegemui ahumu taudia, imadia ai baine heato, tauna na baine mauri; ena mauri na kwalimu ahuna ai bainela.

<sup>10</sup> Iehova ma e tomamu: Badina be lau ese vairagu vada na ha-aukaia ina hanua enai, dika ihavarana totona, dia namo ihavarana; Babulono pavapavana imana ai baine heato, bena ia ese lahi amo baine doua.

### *Peroveta herevadia Iuda pavapavadia latadiia*

<sup>11</sup> Iuda pavapavana ena iduhu taudia ba hamaorodia, baoto, David iduhuna e, Iehova ena hereva ba kamonai!

<sup>12</sup> Iehova ini e gwau tomamu:  
Hahemaoro karadia ġoевагоевадия na daba ai ba kara,  
bona ena ġau e henao tauna na ihahisihisina tauna imana amo ba hamauria;

egu badu ġaraġara na lahi heġereġerena ai baine lasi  
 na garina,  
 bina baine ara, ta basine habodoa diba,  
 emui kara dikadia daidiae.

<sup>13</sup> Koura inoholaina taumui e!  
 Taora nadi-ginina e!

A itaia, lau ese na inai henimuimu;  
 Iehova na e herevamu.

Umui na o tomamu:

Daika ese baine tuari henimai?

Daika ese emai noho gabudia lalodiai baine  
 vareai?

<sup>14</sup> Iehova na e tomamu:

Davamui baina henimui, emui kara anidia  
 heġereġeredia;

ena uda ai lahi ta baina ha-araia,

bina ia heġeġe-madaina idoinai baine araia  
 ore.

## 22

<sup>1</sup> Iehova ini e gwau tomamu: Ba diho lao,  
 Iuda pavapavana ena rum a baola, unuseni ai ina  
 hereva ba gwauraia,

<sup>2</sup> baoto, Iuda pavapavana e, David teronona ai o  
 helaimu tauna, Iehova ena hereva ba kamonai, oi  
 bona emu hesiai taudia bona emu bese taudia, ini  
 ikoukou lalodiai e raka vareaimu taudia, danu.

<sup>3</sup> Iehova ini e gwau tomamu: Hahemaoro go-  
 evaġoевадиа bona kara maoromaorodia ba kara;  
 bona ena ġau vada e henao tauna na ihahisihisina  
 tauna imana amo ba hamauria. Idau tauna bona  
 ihareha bona vabu na basio kara dika henidia  
 bona basio daġedäge henidia, bona asi ena kerere  
 tauna rarana basio hahebubua ina gabu ai.

<sup>4</sup> Badina be ina hereva boma kamonai momokani, bena ina rumा ikoukoudia lalodai pavapava haida, David teronona ai e helaimu taudia, na kariota ai bona hosi ai ġuidia ai bae vareai, idia bona edia hesiai taudia bona edia bese taudia danu.

<sup>5</sup> A ini hereva nahuadia basio toho, lau na sibogu ladagu ai na gwau hamatamu, ina rumা na baine mia ġagħae.

<sup>6</sup> Badina be Iehova ese Iuda pavapavana ena rumা na ini e herevalaia tomamu:

Oi na Gilead na heto lauegu ai,  
eiava Lebanon dorina na heto;  
ġau tamona, lau ese tano ġaġaena ai  
bona hanua asi inoholaina ai baina halaomu.

<sup>7</sup> Hahebua-tari taudia baina abidia heġġaeġ, umui ihadikamui,  
ta ta mai edia tuari ġaudia;  
bená idia ese emu sida audia ġoewa-daedia bae  
hagaridia,  
lahi ai bae tahodia kau.

<sup>8</sup> Bese momo ese ina hanua badana bae rakaia hanai, bena ta ta ese dekena tauna dekena tauna bae nanadaidia, baeto, Dahaka dainai Iehova ese ina hanua bada-hereana na ini vada e kara henia toma?

<sup>9</sup> Bena idia na bae haere, baeto, Badina be idia ese Iehova, edia Dirava, ena taravatu e rakatania, dirava idaudia e toma henidia dihova bona isi-aidia e lao heniva.

<sup>10</sup> Mase tauna basio tailaia bona basio lalo-hisihisilaia,  
a e raka ohomu tauna dainai ba tai badabada;  
badina be ia na nega ta ai basine lou mai,

ena tano korikori basine itaia lou.

<sup>11</sup> Badina be Iehova ese Salumu, Iuda pava-pavana Iosia natuna, tamana Iosia gabuna ai e lohiava bena ina gabu amo e raka oho tauna, na ini e herevalaia tomamu: Ia na nega ta basine lou mai iniseni ai,

<sup>12</sup> a heabi-mauri iōguina ai vada e laohaia gabuna ai baine mase; ina tano na nega ta basine itaia lou.

<sup>13</sup> Kara gageva-gageva amo ena rumu e haginiamu bona ena atai daiutudia hahemaoro kererena amo danu,  
bona ia dekena tauna na ena hesiai tauna ai e halaoamu asi ahuna,  
bona ena īaukara davana se heniamu, tauna na  
madi, ihabaina!

<sup>14</sup> Ia na e tomu “Egu rumu badana auta baina haginia  
mai atai daiutudia badadia”;  
bena ia ese gaba-mauru haida e karamu,  
bona habana na sida reireidia amo e īgovaiamu,  
bona muramura kakakaka-hereana amo e dahuamu.

<sup>15</sup> Sida audia īgaukaralaidia ai o hereamu dainai,  
oi na o laloamu oi na pavapava ta a?

Oi tamamu na e anianiva, e inuinuva,  
bona hahemaoro īgoevāgoevadia bona kara maoromaorodia e karava, ani?

Bena ienai namo e varava.

<sup>16</sup> Ia ese oīgōgami taudia bona e dabuva taudia edia gini-kau gabuna e hahemaorolaia,  
bena vada e namo.

Iehova na e tomamu

“Ina na dia lau idibalaigu dalana a?”

<sup>17</sup> A oi matamu ese āgau ta se itaiamu,  
 bona lalomu ese āgau ta se laloamu,  
 a o abi koikoi kohudia mo,  
 bona asi ena kerere tauna rarana ihahe-  
 bubuna mo,  
 bona hahehisí bona dağedäge karadia ikara-  
 dia mo.

<sup>18</sup> Taunabunai, Iehova ese Iehoiakim, Iuda  
 pavapavana Iosia natuna, na ini e herevalaia  
 tomamu:

Basie tailaia, basieto

“Tadikakagu o!” eiava “Taihugu o!”

Basie rohea ahu, basieto

“Lohia o!” eiava “Pavapava o!”

<sup>19</sup> Doniki igurina heğereğerena ai bae āuria;  
 bae veria lao, Ierusalem ikoukouna  
 murimuridiae bae negea lao.

<sup>20</sup> Lebanon ba dara dae, ba tai lolo,  
 gadomu ba habadaia Basan ai;

Abarimi amo ba tai,

badina be e ura henimuva taudia iboudiai  
 vada e mase ore.

<sup>21</sup> Emu noho namo ai na hereva henimu,  
 a oi oto “Basina kamonai”;

eregabemu negana amo emu kara na eneheto,  
 lau gadogu so kamonai henia.

<sup>22</sup> Lai ese emu hereğu taudia baine odadia oho,  
 bona e ura henimumu taudia na bae heabi  
 mauri;

bena ba hemarai bona ba baia,  
 emu kara dika iboudiai daidiae.

<sup>23</sup> Lebanon inoholaina taumu e,

sida audia bogaragidiai o nohomu;  
 hisihisi baine gugubamu negana ai,  
 hahine ena hekamonai hisidia na heheto,  
 emu ġanaġana na baine bada.

**24** Iehova na e tomu, Lau na maurimu  
 heġġereġerena, ena be Konia, Iuda pavapavana  
 Iehoiakim natuna, na lau imagu kwakikwakina  
 vagivagina, egħi toa ġauna, imagu idibana ai, to  
 bama kokimu oħo,

**25** emu mauri iabi-ohona dalana e tahuamu  
 taudia, o gari henidiamu taudia, imadia ai bama  
 atomu; oibe, Nebukadresara, Babulono pavapa-  
 vana, bona Kaldea taudia, i nadia ai danu.

**26** Lau ese oi bona sinamu, e havaramu hahi-  
 nena, na idau tano, lalonai so vara tanona, enai  
 baina tahomu lao, unuseni ai vada ba mase.

**27** A ilou-henina bae ura dikadika tanona na  
 basie lou henia.

**28** Ina tau Konia na e dadaraiamu ġauna,  
 wo makohina, ta ese se ura heniamu ġauna, a?  
 Dahaka dainai ia mai natuna ida vada e tahodia  
 lao,  
 asi dibadia tanona ai vada e negedia?

**29** Tano e, tano e, tano e,  
 Iehova ena hereva ba kamonai!

**30** Iehova ini e gwau tomamu:  
 Ina tau ladana ba torea “asi natuna”;  
 ena mauri dinadia lalodiae namo basine abia.  
 Badina be ia garana ta basine namo,  
 David ena terono ai basine helai kau,  
 bona Iuda ai basine lohia lou.

## 23

*Kwabukwabudia edia lou*

<sup>1</sup> Iehova na e tomu, Mamoe ireḡudia taudia, egu rei gabudia mamoedia e habuadia tarimu bona e hakarohodiamu taudia, madi, ihabaidia!

<sup>2</sup> Taunabunai, Iehova, Israel Diravana, ese egu bese e reḡuamu taudia na ini e herevalaidia tomamu: Egu seri vada o hakarohodia rohoroho, vada o luludia oho, asio regudia. Iehova na e tomu, A itaia, lau ese emui kara dika davadia do baina henimui.

<sup>3</sup> Bena egu seri mamoedia kwabukwabudia na na luludia lao tanodia iboudiai amo ma baina haboudia, edh magu ai ma baina hakaudia vareai; bema natudia bae havaradia, vada bae hutuma.

<sup>4</sup> Lau ese mamoe ireḡudia taudia na daediae baina atodia, bema idia ese bae regudia; bema basie gari lou bona kudoudia basie hetaha lou, bona ta basine boio. Iehova na e herevamu.

<sup>5</sup> Iehova na e tomu, A itaia, negana vada e maimu, lau ese kara maoromaoro Rigina ta baina haginia David ena; ia na baine pavapava, bona baine kara aonega; ia ese hahemaoro ḡoevaḡoeva bona kara maoromaoro na ina tano ai baine kara.

<sup>6</sup> lena nega ai Iuda na baine roho mawi, bona Israel na baine noho namonamo. ia ladana bae hatoa “Iehova na eda kara maoromaoro”.

<sup>7</sup> Iehova na e tomu, Taunabunai, negana vada e maimu, taunimanima na basie hereva lou, basieto “Iehova, Israel taudia na Aigupto tanona amo e hakaudia lasi Diravana, e maurimu heḡereḡerena”,

<sup>8</sup> a baeto “Iehova, Israel garana na mirigini kahana tanona bona e luludia lao tanodia iboudiai lalodia amo e hakaudia lou mai Diravana, e maurimu heḡereḡerena”. Bema idia na edia tano kɔrikori ai bae noho.

*Peroveta koikoidia*

- <sup>9</sup> Peroveta taudia herevadia:  
 Daragu vada e doko,  
     turiagu iboudiai na e heude-heudem;  
 lau na kekero tauna na heto,  
     vine ranuna ese vada e hakekeroa tauna na  
     heto,  
 Iehova dainai,  
     bona ena hereva helagadia daidai.  
<sup>10</sup> Badina be tano na heuda-hanai taudia ai eme  
     honu;  
     heuduguirai dainai tano na e taimu,  
     bona tano ġaġena reidia vada e kakoro.  
 Edia dala na dika,  
     bona edia goada na dia maoro.  
<sup>11</sup> Peroveta tauna bona hahelaġa tauna,  
     raruosi ese Dirava se matauriamu;  
 egu dubu ai danu edia kara dika vada na davaria.  
     Iehova na e herevamu.  
<sup>12</sup> Taunabunai, edia dala na ediai  
     dala dedika-dedikadia dibwa ai heġereġeredia  
     ai baela;  
     lalodiae bae luludia vareai, bena bae keto;  
 taunabunai lau ese dika na latadien baina hadi-  
     hoa,  
     edia mata-hakani laġanina lalonai.  
 Iehova na e herevamu.  
<sup>13</sup> Samaria ena peroveta taudia ediai  
     mamina dika karana ta na itaia:  
 idia na Baal ladana ai e perovetava,  
     bona egu bese Israel e hakaua kerereva.  
<sup>14</sup> A Ierusalem ena peroveta taudia ediai  
     ġau dika-rohorohona ta vada na itaia:  
 idia na e heuda hanaimu,  
     bona koikoi daladia ai e rakamu;

kara dika taudia umadia na e ha-aukadiamu,  
 taunabunai ta na ena kara dika amo se raka  
 ohomu;

iboudiai na egu ai vada e hekara Sodoma na heto,  
 bona inoholaina taudia na Gomora na heto.

**15** Taunabunai, Iehova Sabaota ese peroveta  
 taudia na ini e herevalaidia tomamu:  
 A itaia, ava iditana baina ubulaidia,

bona e imoraia ranuna baina ha-inulaidia;  
 badina be Ierusalem ena peroveta taudia edia  
 amo,

Dirava idadaraaina karadia na tano idoinai  
 vada e piua lao.

**16** Iehova Sabaota na ini e gwau tomamu: Per-  
 oveta taudia edia hereva basio abi dae. Idia  
 ese e peroveta henimuimu, helaro asi anidia ai  
 e hahonumuimu; idia ese sibodia lalodia ai e  
 mata hanaimu ġaudia mo e gwauraimu, dia Iehova  
 uduna herevadia.

**17** Idia ese Iehova ena hereva e dadaraiamu tau-  
 dia na e hamaorodia louloumu, e tomu “Umui na  
 do ba namo”; bona sibodia edia lalo-auka daladia  
 ai e rakamu taudia na e hamaorodiamu, e tomu  
 “Dika ta na latamui ai basine kau”.

**18** Badina be idia bogaragidia amo  
 daika na Iehova ena henega ai vada e gini,  
 ena hereva baine dibaia bona baine kamon-  
 aia totona?

Eiava daika ese ena hereva vada e hakala henia  
 bona vada e abia dae?

**19** A itaia, Iehova ena lai gubana!  
 Badu vada e lasi, koe-hirihiri bada-hereana  
 na heto,

kara dika tauna kwarana ai baine kau.

**20** Iehova ena badu na basine lou,  
 ela bona ia lalona ena ura iboudiai

baine kara bona baine haguguru.  
 Dina gabedia ai  
 ba lalo-pararalaia ġoevaġgoeva.

**21** Peroveta taudia na asina siaidia,  
 to idia na e heau;  
 lau ese asiua hereva henidia,  
 to idia na e perovetava.

**22** A lauegu henega ai bema gini,  
 idia ese egu bese taudia na egu hereva bema  
 gwaurai henidia,  
 bona edia dala dikana amo bema hakaudia oho,  
 bona edia kara dikadia amo danu.

**23** Iehova na e tomu, Lau na gabu kahikahidia  
 Diravana a dia gabu daudaudia Diravana a?

**24** Iehova na e tomu, Tau ta na gabu hehunidia  
 ai baine komu diba bena basina itaia a? Iehova  
 na e tomu, Lau ese guba bona tanobada asina  
 hahonudiamu a?

**25** Peroveta taudia, hari lau ladagu ai e peroveta  
 koikoimu taudia, edia hereva vada na kamonai;  
 idia na e tomu “Vada na nihi, vada na nihi”.

**26** Hari e peroveta koikoimu bona sibodia lalodia  
 ai e hekoimu taudia lalodia ai koikoi baine mia  
 ela bona edena nega ai?

**27** Idia na e laloamu edia nihi, e hesivarailai  
 hehenimu ġaudia, daidiae lau ladagu ilalo-taona  
 na egu bese taudia lalodia amo bae abia oho,  
 tamadia ese Baal dainai lau ladagu e laloa boio  
 heġereġerena.

**28** Peroveta tauna mai ena nihi ese ena nihi  
 baine gwauraia, a egu hereva na enai e miamu  
 tauna ese egu hereva baine gwauraia balaheni.

Iehova na e tomu, Uit momona ena namo bona uit mai anina ena namo ede bae heğereğere toma?

<sup>29</sup> Iehova na e tomu, Lauegu hereva na dia lahi heğereğeren a? Ia na dia nadi e hamakohidia sisisisimu aurina heğereğeren a?

<sup>30</sup> Iehova na e tomu, Taunabunai, a itaia, lau ese peroveta taudia na inai henidiamu; idia ese egu hereva na bamodia edia amo e henaomu.

<sup>31</sup> Iehova na e tomu, A itaia, lau ese peroveta taudia na inai henidiamu; idia na ududia amo e herevamu, e tomu “Iehova na e herevamu”.

<sup>32</sup> Iehova na e tomu, Nihi koikoidia e perovetalaidiamu taudia na inai henidiamu, idia ese e gwauraidiamu, bona edia koikoi bona edia kavakava amo egu bese taudia e hakaudia kereremu, a lau ese asina siaidia bona asina haduadia. Taunabunai idia ese ina bese taudia edia namo sisina taina asie havaraia. Iehova na e herevamu.

<sup>33</sup> Ina bese taudia ta, eiava peroveta tauna ta, eiava hahelağta tauna ta, ese baine nanadaimu, baineto “Iehova ena maduna be dahaka?”, negana ai oi na ba haere henia, baoto “Iehova na e tomu, Maduna na umui, bona baina negemui daure”.

<sup>34</sup> Bona peroveta tauna eiava hahelağta tauna eiava bese taudia ta, “Iehova ena maduna” e herevalaiamu tauna, lau ese una tau mai ena rumtaudia ida na matadia baina hakanidia.

<sup>35</sup> Umui na ini ba hereva toma, ta ta dekena tauna dekena tauna ediai, bona ta ta tadikakana tadikakana ediai, baoto “Iehova ena haere be dahaka?” eiava “Iehova ena hereva be dahaka?”

<sup>36</sup> A “Iehova ena maduna”, basio herevalaia lou, badina be maduna be taunimanima iboudiai ta ta ena hereva ena hereva; bona umui ese Mauri Di-

ravana, Iehova Sabaota, iseda Dirava, ena hereva o hagagevadiamu.

<sup>37</sup> Taunabunai, peroveta tauna ba nanadaia, baoto “Iehova ese ede e haere henimu toma?” eiava “Iehova na ede e hereva toma?”

<sup>38</sup> A boma toma “Iehova ena maduna”, Iehova na ini e gwau tomamu: Badina be ini hereva “Iehova ena maduna” vada o gwaurai, a lau ese hereva na emui ai na siaia vasi, nato, Basioto “Iehova ena maduna”,

<sup>39</sup> taunabunai, a itaia, momokani lau ese baina abimui isi bona vairagu amo baina negemui daure, umui, bona umui mai senemui ida na henimui hanuana danu.

<sup>40</sup> Bona lau ese gwau-tora bona hemarai na latamui ai baina hadiho hanaihanai, basie boio.

## 24

*Hereva hegeregrena: Suke namodia*

*bona suke dikadia*

<sup>1</sup> Nebukadresara, Babulono pavapavana, ese lekonia, Iuda pavapavana Iehoiakim natuna, bona Iuda lohiadia bona ima karakara dibaka taudia bona awi igaukaralaidia taudia na Ierusalem ai e abidia bena gabu daudau ai, Babulono ai, e hanohodia murinai, Iehova ese ina mata-hanai ġauna e haheitalaigu. Suke huahuadia bosea rua Iehova ena dubu vairanai heheato na itadia.

<sup>2</sup> Bosea ta lalonai suke na nanamo heherea, e mage guna ġaudia na hehetu; a bosea iharuana lalonai suke na didika rorohoroho, vada e dika bada-herea dainai basie heani diba.

**3** Bena Iehova ese e nanadaigu, eto, Ieremia e, dahaka o itaiamu? Lau nato, Suke huahuadia, namodia be nanamo heherea, a dikadia na didika rorohoroho, vada e dika bada-herea dainai basie heani diba.

**4** Bena Iehova ena hereva na egu ai e kau, eto,

**5** Iehova, Israel Diravana, na ini e gwau tomamu: Ini suke namodia heğereğeredia, lau ese Iuda tanona amo e heabi oho taudia, ina gabu amo na siaidia oho Kaldea taudia edia tano na siaidia lao taudia, baina gwauraidia, idia na nanamo.

**6** Lau ese baina hağeredia, ihanamodia totona, bona baina hakaudia lou mai ina tano lalonai. Lau ese baina haginidia, basina ġigidia dobi; baina hadodia, basina rağadıa.

**7** Lalodia na baina hapararadia, vada bae diba, lau na Iehova; bena idia na lauegu bese ai baela, bona lau na edia Dirava ai bainala; badina be idia ese bae lou henigu, mai lalodia idoidiai ida.

**8** A Iehova na ini e gwau tomamu: Hari suke dikadia, vada e dika herea dainai basie heani diba ġaudia, heğereğeredia, Sedekia, Iuda pavapavanaugh, bona ena lohia taudia bona Ierusalem tau-dia kwabukwabudia, ina tano ai e nohomu bona Aigupto tanona ai e nohomu taudia, na unu baina kara henidia toma.

**9** Lau ese hahegari ġauna ai baina halaodia, tanobada basileiadia iboudiai ediai; idia na gvautora bona udu gwaurai-gwaurai bona hegona-gonalai bona heuduguirai ġaudia ai baela, baina luludia lao gabudia iboudiai lalodiae.

**10** Lau ese dare bona doe bona dai-hanai goreren-a na latadiadie baina siaidia, ela bona idia bona

senedia na henidia tanoua lalona amo bae hebua tari vaitani.

## 25

### *Noho-hedoa lağanidia hitu- ahui*

<sup>1</sup> Iehoiakim, Iuda pavapavana Iosia natuna, ena lohia lağanina ihahanina ai (una na Nebukadresara, Babulono pavapavana, ena lohia lağanina gini-gunana), hereva na Ieremia enai e kau, Iuda taudia iboudiai daidiae;

<sup>2</sup> bena Ieremia, peroveta tauna, ese una hereva na Iuda taudia iboudhi bona Ierusalem inoholaina taudia iboudiae e hamaorolaidia, eto:

<sup>3</sup> Lağani ruahui-toi lalodiai, Iosia Amon, Iuda pavapavana, ena lohia lağanina ihagwautatoina amo ema bona ina dina, Iehova ena hereva na egu ai vada e kau, bona vada na hereva henimui havara-havara to umui na asio kamonai.

<sup>4</sup> Asio kamonai, bona taiamui asio hakala, ena be Iehova ese ena peroveta hesiae taudia iboudiae na dekemui e siaidiae havara-havara,

<sup>5</sup> eto, Iboumui ai ba helalo kerehai, ta ta emui dala dikadia bona emui kara dikadia amo ba raka oho; bena Iehova ese umui bona senemui nega gunadia amo ela bona hanaihanai vada e henimui tanona ai do ba noho;

<sup>6</sup> bona dirava idaudia vairadia basiola, isiaidia basio lao heni bona basio toma henidia diho, bona imamui ġaukaradia amo basio habadugu; bena lau ese basina hadikamui.

<sup>7</sup> Ĝau tamona (Iehova na e tomu), umui ese asio kamonai henigu, imamui ġaukaradia amo ba habadugu totona, sibomui ihadikalaimui.

**8** Taunabunai, Iehova Sabaota na ini e gwau tomamu: Egu hereva asio abidia dae dainai,

**9** a itaia, lau ese mirigini kahana besedia iboudiai baina boiridia (Iehova na e tomu), bona Nebukadresara, Babulono pavapavana, egu hesiai tauna, danu baina boiria; ina tano mai inoholaina taudia ida, bona ini hegegemadai besedia iboudiai danu, ihadikadia totona baina mailaidia; bona baina habuadia tari vaitani, hahegari bona si-dagu bona gwau-tora hanaihanai gaudiā ai baina halaodia.

**10** Ina danu, kiri bona moale regedia na idia edia amo baina abi oho, bona headava matamata tauna bona hahinena eredia danu, bona uit e idia patapata regedia bona lamepa diarina danu.

**11** Ina tano idoinai na e giga dobi bona e havahua gauna ai bainela, bona ini bese ese Babulono pavapavana isiaina bae ho henri, lagani hitu-ahui lalodai.

**12** Bena lagani hitu-ahui bae ore murinai, lau ese Babulono pavapavana bona una basileia, Kaldea tanona basileiana, na edia kara havara davana baina henidia, bona edia tano baina havahua ela bona hanaihanai. Iehova na e herevamu.

**13** Una tano latanai vada na gwaurai herevadia iboudiai na anidia baina havara, ia ihadikana; ina buka ai e hetore, Ieremia ese basileia iboudiai ihadikadia e gwaurai guna gaudiā iboudiai.

**14** Badina be basileia momo bona pavapava badadia ese idia bae guidia, edia hesiai taudia ai bae halaodia; bona lau ese baina hadava henidia, edia kara bona imadia gaukaradia hegeregeredia.

*Budu keherena*

<sup>15</sup> Iehova, Israel Diravana, ese ini e hereva henigu toma, eto: Ina kehere, badu vine-ranuna keherena, na lau imagu amo avabia, bena dekedia baina siaimu lao basileiadia iboudiai na ba ha-inulaidia.

<sup>16</sup> Idia na bae inu, bena bae raraga bona bae kavadia, bogaragidiai na siaiamu darena dainai.

<sup>17</sup> Taunabunai, lau ese kehere na Iehova imana amo na abia, Iehova ese dekedia e siaigu lao basileiadia iboudiai na na ha-inulaidia;

<sup>18</sup> Ierusalem bona Iuda hanuadia, bona pavapavana bona lohiana iboudiai danu; idia na gabu ġaġaena bona e vahu gabuna ai bona si-dagu bona heuduguirai ġauna ai baela, ina dina ai heġereġerena;

<sup>19</sup> Farao, Aigupto pavapavana, mai ena hesiai taudia bona ena lohia taudia bona ena orea taudia iboudiai ida danu;

<sup>20</sup> bona idau bese taudia idia bogaragidiai e nohomu danu; bona Usu tanona pavapavana iboudiai, bona Filistia taudia edia tano pavapavana iboudiai (Askelono, Gasa, Ekron bona Asdod kwabukwabudia) danu;

<sup>21</sup> bona Edom bona Moab bona Amono garana,

<sup>22</sup> bona Turo pavapavana iboudiai bona Sidono pavapavana iboudiai bona davara unukahana konena pavapavadia danu;

<sup>23</sup> bona Dedan, Tema, Busu, bona bagudia huidia e naudiamu taudia iboudiai,

<sup>24</sup> bona Arabia pavapavadia iboudiai bona e headava hanai besedia tano ġaġaena ai e nohomu edia pavapava iboudiai danu;

<sup>25</sup> bona Simiri, Elam, Media pavapavadia iboudiai,

**26** bona mirigini kahana pavapavadia iboudiai, gabu daudaudia bona kahikahidia, murina murina amo, bona tanobada basileiadia iboudiai tano kopina idoinai latanai danu. Idia muridiae, Babulono pavapavana ese baine inua.

**27** Bena ba hamaorodia, baoto, Iehova Sabaota, Israel Diravana, na ini e gwau tomamu: Ba inua, ba kekero, ba mumuta, ba keto, basio tore isi lou, bogaragimui ai na siaia vasimu darena dainai.

**28** Idia na basiema ura inuinu keherena na oi imamu amo bae abia, boma hamaorodia, boma toma, Iehova Sabaota na ini e gwau tomamu: Vada ba inua!

**29** Badina be lau ladagu e henemailaia hanuana lalonai dika ihavarana baina matamaia, bena dava iabina amo ba roho mauri a? Dava iabina amo basio roho mauri, badina be dare ta maina na gwauraiamu, tanobada inoholaina taudia iboudiai ihadikadia ġauna. Iehova Sabaota na e herevamu.

**30** Taunabunai, idia latadiai ba peroveta, ini hereva iboudiai ba gwaurai, baoto:

Iehova na atai amo baine ġaba,  
    ena noho gabuna helāgħana amo ia gadona  
        baine habadaia.

Baine ġaba badabda, ena mamoe serina latanai;  
    baine lolo, vine huahuadia e moimoilaimu  
        taudia na heheto,  
    tanobada inoholaina taudia iboudiai latadiai.

**31** Reġe na baine reġe dae ela bona tanobada dokodia,  
    badina be Iehova na mai ena hahebade ta,  
        basileia idau-idau latadiai;  
ia ese taunimanima iboudiai be hahemaoro hendiāmu,

bona kara dika taudia na dare amo baine  
aladia mase.

Iehova na e herevamu.

<sup>32</sup> Iehova Sabaota iui e gwau tomamu:  
A itaia, kara dika na e laomu,  
basileia ta amo ela bona ma basileia ta;  
lai gubana badana ta e toa matamamu,  
tanobada daudaudia kahadia amo.

<sup>33</sup> Una dina ai, Iehova ese baine aladia mase  
taudia na tanobada dokona amo ela bona ma  
tanobada dokona bae hesiriu. Ta ese basine ro-  
hedia ahu, ta ese basine haboudia, ta ese basine  
guridia; idia na boromakau taġena heġeregerena ai  
baela, tano kopina ai.

<sup>34</sup> Mamoe ireġudia taudia, ba tai, ba tai lolololo!  
Mamoe seridia biagudia, kahu ai ba hekui-  
hekui!

Badina be iala-masemui bona ihakarohomui di-  
nadia vada e kau,  
bena ba keto, mamoe mamaruanedia namo-  
hereadia na hehetu.

<sup>35</sup> Mamoe ireġudia taudia edia komu gabuna ta  
basine mia,  
mamoe seridia biagudia edia roho-mauri  
gabuna ta danu basine mia.

<sup>36</sup> A hakala, mamoe ireġudia taudia na e taimu,  
mamoe seridia biagudia na e tai lolomu;  
badina be Iehova ese edia rei gabudia e havahudi-  
amu,

<sup>37</sup> bona edia magu, edia maino gabudia, vada  
e habuadie tari,  
Iehova ena badu ġaraġara dainai.

<sup>38</sup> Leona na heto ia na ena komu gabuna amo vada  
e raka lasi,  
badina be edia tano vada e vahu,

e hahisihisidiamu tauna ena dare dainai,  
bona ena badu ġaraġġara dainai.

## 26

### *Ieremia e tohonaia*

<sup>1</sup> Iehoiakim, Iuda pavapavana Iosia natuna, e lohia matama negana ai, ina hereva na Iehova ena amo ema.

<sup>2</sup> Iehova na ini e gwau tomamu: Iehova ena dubu maguna ai ba gini, bona Iuda hanuadiah boudiai amo tomadiho totona Iehova ena dubu baema taudia na ba hereva henidia, na haganilaimumu herevadia iboudiai na ba hamaorolaidia; hereva ta basio hunia.

<sup>3</sup> Readia bae kamonai, bona iboudiai ese ta ta ena dala dikana ena dala dikana bae rakatani; bena unu amo lau baina helalo kerehai, bona ihadikadia karana, edia kara dikadia daidiae vada na laloa hata ġauna, na basina karaia.

<sup>4</sup> Ba hamaorodia, baoto, Iehova ini e gwvau tomamu: Bema basio kamonai henigu, egū taravatu, vairamui ai vada na atoa ġauna, lalonai basio raka,

<sup>5</sup> bona egū hesiae peroveta taudia, ena be asio hakala to dekemui na siadia ġava taudia, na basio hakala henidia;

<sup>6</sup> bena ina dubu na Silo heġereġerena ai baina halaoa, bona ina hanua na heuduguirai ġauna ai baina halaoa, tanobada besedia iboudiai ediae.

<sup>7</sup> Hahelaġa taudia bona peroveta taudia bona taunimanima iboudiai na e kamonai, Ieremia ese unu hereva e gwaurai, Iehova ena dubu lalonai.

<sup>8</sup> Iehova ese e haganilaia taunimanima iboudiai baine hamaorolaidia herevadia na Ieremia ese e

gwaurai ore; bena hahelaġa taudia bona peroveta taudia bona taunimanima iboudiai ese e dabaia tao, eto, Oi na ba mase.

<sup>9</sup> Ma eto, Badina be dahaka oi na Iehova ladana ai vada o peroveta, oto “Ina dubu na Silo heġereġerena ai bainela, bona ina hanua na baine vahu, asi inoholaina” a? Bena taunimanima iboudiai ese Ieremia e daia ahu, Iehova ena dubu ai.

<sup>10</sup> Iuda lohiadia ese ini ġau e kamonai, bena pavapava ena rumu amo e dae lao, Iehova ena dubu ela; bena Iehova ena dubu Ikoukouna Matamatana raka-vareaina ai e helai diho.

<sup>11</sup> Bena hahelaġa taudia bona peroveta taudia ese lohia taudia bona taunimanima iboudiai e hamaorodia, eto, Ina tau na baita revaia mase be namo, badina be ia ese ina hanua ihadikana vada e perovetalaia, umui sibomui taiamui ai vada o kamonai.

<sup>12</sup> Bena Ieremia ese lohia taudia bona taunimanima iboudiai na e hereva henidia, eto, Iehova ese e siaigu, vada o kamonai herevadia iboudiai na ina dubu bona ina hanua latadiet baina gwaurai guna.

<sup>13</sup> Taunabunai, emui dala bona emui kara ba hanamodia, bona Iehova, emui Dirava, gadona ba kamonaia, bena Iehova na baine helalo kerehai, kara dikha na umui latamui ai vada e gwauraia na basine karaia.

<sup>14</sup> A lau be umui imamui ai; emui lalohadai namona bona maorona heġereġerena ai ba kara henigu.

<sup>15</sup> Ĝau tamona ba diba momokani, boma hamasegu, umui ese asi ena kerere tauna rarana na sibomui latamui ai bona ina hanua mai

inoholaina taudia ida latadiai boma hadihoa; badina be momokani Iehova ese dekemui e siaigu, ini hereva na taiamui ai baina gwaurai halaoreana.

<sup>16</sup> Bena hanua lohiadia bona taunimanima iboudiai ese hahelaña taudia bona peroveta taudia na e hamaorodia, eto, Asi badina ina tau baita revaia mase, badina be ia ese Iehova, eda Dirava, ladana ai vada e hereva henida.

<sup>17</sup> Bena una tano tau-badadia haida na e tore isi, hebou taudia iboudiai e hereva henidia, eto,

<sup>18</sup> Mika, tau Moresete, na Hesekia, Iuda pava-pavana, ena nega ai e perovetava; bena ia ese Iuda taudia iboudiai e hamaorodia, eto, Iehova Sabaota na ini e gwau tomamu:

Siona na bae rúaia, biru gabuna na heto, bona Ierusalem baine heğigi dobi,

bona dubu ororona na ororo mai udana ta ai bainela.

<sup>19</sup> Hesekia, Iuda pavapavana, bona Iuda idoinai ese e alaia mase a? Ia ese Iehova garina e gari bona Iehova e noia baine lalo namo henia, ani? Bena Iehova na e helalo kerehai, dika idia latadiai vada e gwauraia na se havaraia, ani? A ita ese dika badana na ita siboda latadai baita hadihoamu.

<sup>20</sup> Ma lau ta danu Iehova ladana ai e perovetava, ladana na Uriā Semaia, Kiriāt-icarimi tauna. Ia ese peroveta herevadia na ina hanua bona ina tano latadiai e gwaurai; ena hereva na Ieremia ena heğereğeredia.

<sup>21</sup> Bena King Iehoiakim, mai ena tuari taudia bona ena lohia taudia iboudiai ida, na iena hereva e kamonai negana ai, hanua pavapavana ese ia iala-masena dalana e tahua. A Uriā e kamonai, bena e gari, e heau mauri, Aigupto ela.

<sup>22</sup> Bena King Iehoiakim ese tatau haida na Aigupto e siaidia lao; taudia be Elnatan Akaboro bona haida ia ida.

<sup>23</sup> Bena idia ese Urias na Aigupto amo e hakaua mai, King Iehoiakim dekenai; bena ia ese dare amo e alaia mase, bena tau-anina na hanua taudia edia gara gabuna ai e negea.

<sup>24</sup> A Ahikama Safana imana ese Ieremia e rauaia, una dainai hanua audia imadia ai asie atoa, bena asie alaia mase.

## 27

### *Hereva hegeregrena: Boromakau madunadia*

<sup>1</sup> Sedekia, Iuda pavapavana Iosia natuna, e lohia matama negana ai, ina hereva na Iehova ena amo ema, Ieremia enai e kau.

<sup>2</sup> Iehova ese ini e hamaorogu toma, eto: Boromakau kopidia varodia bona boromakau madunadia ba kara, sibomu aiomu ai bavato.

<sup>3</sup> Hereva na ba siaia, Edom bona Moab pavapavia, bona Amona taudia edia pavapava, bona Turo bona Sidono pavapavia, dekediai; hari gwukau taudia, Ierusalem vada ema Sedekia, Iuda pavapavana, dekenai, imadia amo ba siaia lao.

<sup>4</sup> Ina gwaukau herevana ba henidia, biagudia edia, baoto, Iehova Sabaota, Israel Diravana, na ini e gwau tomamu: Biagumui na ini ba hamaordia toma, baoto,

<sup>5</sup> Lau ese egu siahu badana amo bona imagu hetoi-rorona amo tanobada vada na karaia, bona tanobada taudia bona tanobada boromadia danu, bena na lalohadailai maoromu taudia na henidiamu.

**6** Harihari ini tano iboudiai na egu hesiai tauna Nebukadnesara, Babulono pavapavana, imana ai vada na atodia, bona tanobada boromadia danu vada na henia, idia ese ia isiaina bae lao hen.

**7** Bese iboudiai ese ia bona natuna bona tubuna isiaidia bae lao hen, ela bona iena tano korikori ena nega baine kau, bena bese momo bona pavapava badadia ese ia bae ġuia, edia hesiai tauna ai bae halaoa.

**8** A bese ta eiava basileia ta ese hari Nebukadnesara, Babulono pavapavana, isiaina basinema lao hen, bona aiona na Babulono pavapavana ena maduna henunai basinema atoa, bena lau ese una bese davana baina henia, dare bona doe bona dai-hanai gorerena amo, ela bona hari pavapava imana amo baina ha-orea. Iehova na e herevamu.

**9** Una dainai, emui peroveta taudia eiava emui mari-abi taudia eiava emui nihi taudia eiava emui rohe taudia eiava emui mea taudia ese bema hamaoromui, bema toma “Babulono pavapavana isiaina basio lao hen”, umui ese basioma kamonai henidia.

**10** Badina be idia na emui ai e peroveta koikoimu, bena una dainai umui na emui tano amo ba heabi oho dauhai; lau ese baina lulumui lasi, bena ba mase.

**11** A edena bese ta ese aiona na Babulono pavapavana ena maduna henunai baine atoa, bona isiaina baine lao hen, lau ese ena tano korikori ai baina rakatania, bena bae birulaia bona bae noholaia. Iehova na e haevamu.

**12** Sedekia, Iuda pavapavana, danu unu na hereva henia toma, nato, Aiomui na Babulono pavapavana ena maduna henunai bavato, ia bona

ena bese taudia isiaidia ba lao hen, bena ba mauri.

<sup>13</sup> Anina be dahaka oi bona emu bese taudia na dare bona doe bona dai-hanai gorerena amo ba mase, Iehova ese Babulono pavapavana isaina basine lao hen besena vada e herevalaia heğereğerena, a?

<sup>14</sup> Hari peroveta taudia, e tomu “Babulono pavapavana isaina basio lao hen” taudia, na edia hereva basio kamonai; badina be idia ese koikoi herevana e perovetalai henimuimu.

<sup>15</sup> Iehova na e tomu, Lau ese asina siaidia, ġau tamona idia na lau ladagu ai e peroveta koikoimu, una dainai lau ese baina lulumui lasi, bena ba mase, umui bona e peroveta henimuimu taudia danu.

<sup>16</sup> Bena lau ese hahelaġa taudia bona ina bese idoinai na hereva henidia, nato, Iehova ini e gwau tomamu: Emui peroveta taudia na e perovetamu, e tomu “A itaia, Iehova ena dubu kohudia na asi vanahana Babulono amo bae loulai”, to edia hereva basio kamonai, badina be idia ese koikoi herevana e perovetalai henimuimu.

<sup>17</sup> Basio kamonai henidia; Babulono pavapavana isaina ba lao hen, bena ba mauri. Anina be dahaka ina hanua badana na baine yahu?

<sup>18</sup> Bema idia na peroveta taudia bona Iehova ena hereva bema idia dekediai, idia ese Iehova Sabaota bema noia, Iehova ena dubu ai bona Iuda pavapavana ena rumai baina Ierusalem ai doini mimia kohudia na Babulono basie laohai.

<sup>19</sup> Badina be Iehova Sabaota ese au-tubua bona nau bada-hereana bona rerue bona kohu orena ina hanua ai doini mimia ġaudia,

<sup>20</sup> Nebukadnesara, Babulono pavapavana, ese

Iekonia, Iuda pavapavana Iehoiakim natuna, bona Iuda bona Ierusalem lohiadia iboudiai, e abidia mauri, Ierusalem amo e laohaidia ela bona Babulono, negana ai se laohai ġaudia, na ini e herevalaidia tomamu.

<sup>21</sup> Iehova Sabaota, Israel Diravana, ese Iehova ena dubu ai bona Iuda pavapavana ena ruma ai bona Ierusalem ai doini mimia kohudia na ini e herevalaidia tomamu:

<sup>22</sup> Babulono bae laohaidia, unuseni ai bae mia, ela bona iau ese baina helalolaidia; bena ma baina loulaidia, ina gabu ai ma baina atodia lou. Iehova na e herevamu.

## 28

### *Hanania e peroveta koikoi*

<sup>1</sup> Una laġani tamona ai, Sedekia, Iuda pavapavana, ena lohia negana matamana ai, laġani ihahanina huana iha-imana ai, Hanania Asuru, peroveta tauna Gibeon amo, ese e hereva henigu, Iehova ena dubu ai, hahelaġa taudia bona taunimanima iboudiai vairadai, eto,

<sup>2</sup> Iehova Sabaota, Israel Diravana, na ini e gwau tomamu: Babulono pavapavana ese e atoa madunana vada na hakwaidua.

<sup>3</sup> Laġani rua do basie ore ai, Iehova ena dubu kohudia iboudiai, Nebukadnesara, Babulono pavapavana, ese ina gabu amo e abi oho Babulono e laohai ġaudia, na lau ese baina loulai ina gabu ai.

<sup>4</sup> Bona Iekonia, Iuda pavapavana Iehoiakim natuna, bona Iuda amo Babulono e laohaidia taudia iboudiai danu, lau ese baina hakaudia lou mai ina gabu ai, badina be Babulono pavapavana ese

e atoa madunana na baina hakwaidua. Iehova na e herevamu.

<sup>5</sup> Bena peroveta tauna Ieremia ese peroveta tauna Hanania e hereva henia, hahelaāga taudia bona Iehova ena dubu Ialonai e gini taudia iboudiai vairadiai.

<sup>6</sup> Peroveta tauna Ieremia eto, Amen! Iehova unu baine kara toma baine namo. Iehova ese oiemu peroveta herevadia baine hamomokania, Iehova ena dubu kohudia iboudiai bona abi-mauri taudia danu na Babulono amo baine loulaidia ema bona ina gabu, una na baine namo.

<sup>7</sup> Ģau tamona, ina hereva oi vairamu ai bona taunimanima iboudiai vairadiai na gwauraiamu na ba kamonai.

<sup>8</sup> Peroveta taudia, ita raruosi e gunalaida taudia, ese nega gunadia amo tuari bona doe bona dai-hanai goreredia na tano momo bona basileia badadia latadiai e per vetalai.

<sup>9</sup> A maino e perovetalaiamu tauna be una peroveta tauna ena hereva anina baine vara negana ai vada bae diba Momokani, Iehova ese una peroveta tauna vada e siaia.

<sup>10</sup> Bena peroveta tauna Hanania ese maduna audia na peroveta tauna Ieremia aiona amo e abidia, bena e hakwaidudia.

<sup>11</sup> Bena Hanania na taunimanima iboudiai vairadiai e hereva, eto, Iehova ini e gwau tomamu: Lağani rua do basie ore ai lau ese Nebukadnesara, Babulono pavapavana, ese e atodia madunadia na bese iboudiai aiodia amo unu baine hakwaidudia toma. Bena peroveta tauna Ieremia na ena ura dalana amo ela.

<sup>12</sup> Peroveta tauna Hanania ese maduna audia na peroveta tauna Ieremia aiona amo e hak-

waidudia murinai, nega taina vada ela, bena Iehova ena hereva na Ieremia enai e kau, eto,

<sup>13</sup> Aola, Hanania ba hamaoroa, baoto, Iehova ini e gwau tomamu: Oi ese au madunadia vada o hakwaidudia, a lau ese auri madunadia baina kara, idia ibolodia.

<sup>14</sup> Badina be Iehova Sabaota, Israel Diravana, na ini e gwau tomamu: Lau ese ini bese iboudiai aiodia ai auri madunadia vada na atodia, Nebukadnesara, Babulono pavapavana, isiaina ilao-henina ġaudia; bona idia ese ia isiaina bae lao hen, badina be lau ese tanobada boromadia danu vada na henia.

<sup>15</sup> Bena peroveta tauna Ieremia ese peroveta tauna Hanania e hamaoroa, eto, Hanania e, a kamonai! Iehova ese se siaimu; bona oi ese ina bese taudia lalodia e ha-uradia bena koikoi herevana vada e abidadama henia.

<sup>16</sup> Taunabunai, Iehova ini e gwau tomamu: A itaia, lau ese tanobada kopina amo baina abimu oho; hari ina laġani lalonai vada ba mase, badina be Iehova igwau-edede-henina herevadia vada o gwaurai.

<sup>17</sup> Una laġani lalonai, hua ihahituna ai, peroveta tauna Hanarua na e mase.

## 29

### *Ieremia ena revareva*

<sup>1</sup> Peroveta launa Ieremia ena revareva, Ierusalem amo e siaia lao, Nebukadnesara ese Ierusalem amo Babulono e laohaidia unuseni ai e hanohodia taudia edia tau-badadia bona hahelaġa taudia bona peroveta taudia bona taunimanima iboudiai edia, revarevana herevadia bini.

<sup>2</sup> Ina be King Iekonia mai sinana bona mai ena hesiai taudia ida, bona Iuda bona Ierusalem lohiadia, bona ima karakara dibaka bona auri īgaukaralaina taudia, ese Ierusalem e rakatania murinai.

<sup>3</sup> Ina revareva na Elasa Safana bona Gemaria Hilkia, Iuda pavapavana Sedekia ese Babulono e siaidia lao Babulono pavapavana Nebukadnesara dekenai taudia, imadia ai e siaia lao. Ini e torea toma:

<sup>4</sup> Iehova Sabaota, Israel Diravana, ese Ierusalem amo vada e siaidla lao bena Babulono ai vada e hanohodia taudia na ini e hamaorodia tomamu:

<sup>5</sup> Ruma ba hagini, bena ba noholai; uma ba kara, bena anidia bavani.

<sup>6</sup> Hahine bavadavadia, natumui mamaruanedia bona hahinedia ba havaradia; hahine haida ma bavabidia, natumui mamaruanedia adavia, bona natumui hahinedia na ba haheadavia. Bena idia ese natudia mamaruanedia bona hahinedia ma bae havaradia enesenai ai; bena bae hutuma, basie gadoi.

<sup>7</sup> A vada na siaimui lao enesenai ai ba noho hanuana ena namo ba tahua, bona Iehova ba īuria ia dainai; badina be iena namo ai emui namo ba davaria.

<sup>8</sup> Badirla be Iehova Sabaota, Israel Diravana, na ini e gwau tomamu: Emui peroveta taudia bona emui bagu-haoro taudia bogaragimui ai e nohomu ese basie koimui, bona edia nihi sivaraidia basio kamonai;

<sup>9</sup> badina be idia ese e hereva koikoi henimuimu lau ladagu ai; lau ese asina siaidia. Iehova na e herevamu.

<sup>10</sup> Badina be Iehova ini e gwau tomamu: Laġani

hitu-ahui bae ha-ore Babulono enai, bena baina vadivadi henimui, bona egu gwauhamata na emui ai baina hamomokania, bona baina hakau-mui lou mai ina gabu ai.

<sup>11</sup> Iehova na e tomu, Badina be egu lalo-hata ġaudia emui ai na dibagu, ihanamomui ġaudia, dia ihadikamui ġaudia, nega vaira ġaudia bona helaro ġaudia.

<sup>12</sup> Bena ba hahanegu bona igurigu baoma; bena lau ese baina kamonai henimui.

<sup>13</sup> Ba tahugu, bena ba davarigu; mai lalomui idoidiai ba tahugu negana ai na

<sup>14</sup> ba davarigu. Iehova na e herevamu; ma e tomu, Emui taġa ma baina henimui lou, bona bese iboudiai bogaragidia amo bona na lulumui lao gabudia iboudiai amo ma baina haboumui. Iehova ma e tomu, Ina gabu amo na siaimui oho dauhai, bona ina gabu ai ma baina hakaumui lou.

<sup>15</sup> Umui vada oto “Iehova ese peroveta tau-dia haida na Babulono ai vada e haginidia eda” dainai,

<sup>16</sup> hanua pavapavana, David ena terono ai e helaimu tauna, bona ina hanua e noholaiamu taudia iboudiai, umui varavaramui, abi-mauri ai gabu daudau asiela taudia, na Iehova ese ini e herevalaidia tomamu.

<sup>17</sup> Iehova Sabaota na ini e gwau tomamu: A itaia, lau ese dare bona doe bona dai-hanai gorer-ena na latadiai na siaimu; bona suke huahuadia dikadika, dika-rohoroho dainai basie heani diba ġaudia, heġereġeredia ai baina halaodia.

<sup>18</sup> Dare, doe, dai-hanai goreredia amo baina ġavadia loa, bona hahegari ġauna ai baina halao-

dia, tanobada basileiadia iboudiai ediai; idia na ediai vada na luludia lao basileiadia bogaragidiai heuduguirai bona hahegari bona si-dagu bona gwau-tora ġauna ai baela.

**19** Badina be (Iehova na e tomu) egu hereva na asie kamonaidia, egu hesiae peroveta taudia ududia amo na siaidia havara-havara herevadia na asio hakala henidia. Iehova na e herevamu.

**20** Umui Ierusalem amo na siaimui lao, Babulono ai, gabu daudau ai, na hanohomui taumui iboumui ai, Iehova ena hereva ba kamonai.

**21** Iehova Sabaota, Israel Diravana, ese Ahaba Kolaia bona Sedekia Maaseia, lau ladagu ai e peroveta henimui koikoi mu taudia, na ini e herevalaidia tomamu: A itaia, Nebukadresara, Babulono pavapavana, imana ai baina atodia, bena ia ese umui vairamui ai baine aladia mase.

**22** Idia daidiae ina heuduguirai herevana na Iuda taudia Babulono ai e hanohodia iboudiai ese bae gwauraia loulou, baeto “Iehova ese Sedekia bona Ahaba, Babulono pavapavana ese lahi ai e gabudia taudia, heğereğeredia ai baine halaomui”.

**23** Badina be Israel ai vada e kara kava kara kava, bona dekedia taudia adavadia ida vada !l e heuda hanai, bona lau ladagu ai hereva koikoidia, lau ese asina haġanilaidia herevadia, vada e gwaurai hedinaraimu. Iehova na e tomu, Lau be dibagu, bona na ita ġaudia na herevalaimu.

**24** Semaia, tau Nehelama, na ini ba hamaoroa toma, baoto,

**25** Iehova Sabaota, Israel Diravana, na ini e gwau tomamu; Revareva na oi sibomu ladamu ai vada o siai lao, Ierusalem ai e nohomu taudia iboudhi ediai, bona Sefania Maaseia, hahelaġa

tauna, enai, bona hahelaġa taudia iboudiai ediae,  
oto:

<sup>26</sup> Iehova ese hahelaġa tauna ai vada e halaomu,  
hahelaġa tauna Iehoiada gabuna ai, Iehova ena  
dubu ba biagua, bona kava taudia iboudiai un-  
useni ai e perovetamu na aedia bona aiodia  
hekahi-tao audia ai bavatodia.

<sup>27</sup> Be, dahaka dainai hari e peroveta henimumu  
tauna, Ieremia, tau Anatoto, so gwau henia?

<sup>28</sup> Badina be hereva na ai dekemal ai vada e siaia  
mai, Babulono ai, eto, Emui noho hedoa na baine  
daudau; rumu ba hagini, bena ba noholai; bona  
uma ba kara, bena anidia bavani.

<sup>29</sup> Hahelaġa tauna Sefania ese una revareva na  
peroveta tauna Ieremia vairanai e duahia.

<sup>30</sup> Bena Iehova ena hereva na Ieremia enai e  
kau, eto:

<sup>31</sup> Hereva na dauhai e nohomu taudia iboudiai  
dekedia ba siaia lao, baoto, Iehova ese Semaia, tau  
Nehelama, ini e herevalaia tomamu: Badina be  
Semaia ese vada e peroveta henimui bona vada e  
dibaganimui, hereva koikoina ba badinaia totona,  
a lau ese ia asina siaia,

<sup>32</sup> una dainai Iehova na ini e gwau tomamu:  
A itaia, Semaia, tau Nehelama, mai garana ida,  
davadia baina henidia; ina bese bogaraginai ia  
garana ta basine mauri, bona egu bese taudia  
baina hanamolaidia karadia basine itaia; badina  
be Iehova igwau-edede-henina vada e gwauraia.  
Iehova na e herevamu.

## 30

*Noho-hedoa taudia na bae lou*

<sup>1</sup> Iehova ena amo Ieremia enai e kau herevana binai.

<sup>2</sup> Iehova, Israel Diravana, na ini e gwau tomamu: Vada na gwaurai henimu herevadia iboudiai na buka ta ai ba tote.

<sup>3</sup> Badina be (Iehova na e tomu) negana be maimu lau ese egu bese taudia edia noho baina hanamo lou, Israel taudia bona Iuda taudia danu; bona baina hakaudia lou mai, senedia na henidia tanona lalonai; bena bae ġaunaia. Iehova na e herevamu.

<sup>4</sup> Iehova ese Israel bona Iuda e herevalai herevadia bini.

<sup>5</sup> Iehova ini e gwau tomamu:  
Gari taku lolona vada a kamonai,  
gari bada lolona, a dia maino.

<sup>6</sup> Ba henanadai bena ba diba,  
tau ta baine rogorogo diba a?

Matona, badina be dahaka tatau iboudiai na itadiamu,  
imadia na koekoedia ai heheato, e hekamon-  
aimu hahinen na heto?  
bona dahaka dainai vaira iboudiai vada e  
lalabora?

<sup>7</sup> Madi, una dina na bada herea,  
ia heğereğeren ta na lasi;  
una na lalo-hisihisi negana, Iakob ena;  
ğau tamona, ena amo do bae hamauria.

<sup>8</sup> Iehova Sabaota na e tomu: Una dina ai lau ese  
aiodia madunadia baina hakwaidu, bona īguidia  
auridia baina hamotu, bena idau taudia ese edia  
hesiai taudia ai basie halaodia lou.

<sup>9</sup> A idia ese edia Dirava Iehova bona edia pava-  
pava David, idia daidiae baina hatorea isi lou  
tauna, na isiaidia bae lao hen.

- 10** Iehova na e tomu;  
 Egu hesiai tauna Iakob e, basio gari!  
     Israel e, kudoumu basine hetaha!  
 A itaia, dauha amo baina hamaurimu,  
     bona garamu danu īgui ai e nohomu tanodia  
     amo baina hamauridia.  
 Iakob baine lou, asi reğereğena baine lağā ani,  
     bona ta ese basine hagaria.
- 11** Badina be lau na oi ida, baina hamaurimu to-  
     tona;  
     Iehova na e herevamu.  
 Bese iboudiai baina ha-oredia vaitani,  
     hari bogaragidiai na hakarohomui rohoroho  
     besedia;  
     a oi na basina ha-oremu vaitani.  
 Dika davana korikorina baina henimu,  
     momokani, matamu ihakanina basina reaia.
- 12** Badina be Iehova ini e gwau tomamu:  
 Emu hisihisi na asi ihanamona,  
     bona beromu na dika herea.
- 13** Ta ese emu ginikau gabuna basine durua,  
     beromu na asi muramurana,  
     asi ihamaurimu dalana ta.
- 14** E lalokau henimuva taudia ese vada e lalomu  
     boio;  
     idia ese asie lalomumu;  
 badina be inai tauna na heto vada na rahumu  
     mase,  
     inai tauna asi ena hebogahisi na heto davaniu  
     vada na henimu;  
 badina be emu kerere na bada,  
     bona emu kara dikna hehedinararai horea-  
     horea.
- 15** Dahaka dainai beromu o tailaiamu?  
     Emu hisihisi na asi ihanamona.  
 Badina be emu kerere na bada,

- bona emu kara dika na hehedinararai horeahorea;  
una dainai ini vada na kara henimu toma.
- <sup>16</sup> Taunabunai, e ha-oremumu taudia iboudiai na bae ha-oredia,  
bona inaimu iboudiai na iğuidia ai bae laohaidia;  
e dadimumu taudia na bae dadihaidia,  
bona damudia ai bae halaomu taudia iboudiai na  
damu ai baina halaodia.
- <sup>17</sup> Badina be baina hamaurimu lou,  
bona beromu baina hanamodia.  
Iehova na e herevamu.
- Badina be vada e gwauraimu “e lulua oho tauna”,  
“Siona, ta ese se laloamu hanuana”.
- <sup>18</sup> Iehova ini e gwau tomamu:  
A itaia, Iakob ena kalaga baina hanamo lou,  
bona ena noho gabudia baina bogadia hisi;  
hanua na ena tano latalatana ai bae haginia lou,  
bona pavapava rumana na ena gabu gunana  
ai baine gini.
- <sup>19</sup> Idia lalodia amo hahenamo anedia bae dae,  
bona moale taudia gadodia danu.
- Lau ese baina hahutumadia, idia na basie gadoi;  
baina imodaidia, bena basie marağî.
- <sup>20</sup> Natudia na bae noho, nega gunadia  
heğereğeredia,  
bona edia oreia na lau vairagu ai bae haginia;  
bona bae hahisihisidia taudia iboudiai na  
matadia baina hakanidia.
- <sup>21</sup> Idia ta ese baine lohiadia;  
idia bogaragidia amo ta ese baine biagudia.
- Lau ese baina harakaia kahi, bena baine raka  
henigu kahi;

badina be daika na mai boga-aukana sibona  
baine raka henigu kahi.

Iehova na e herevamu.

<sup>22</sup> Umui na lauegu bese ai baola,  
bona lau na emui Dirava ai bainala.

<sup>23</sup> A itaia, Iehova ena lai gubana!  
Badu vada e lasi, koe-hirihiri ta,  
kara dika tauna kwarana ai baine kau.

<sup>24</sup> Iehova ena badu garagarana na basine doko,  
ela bona ia ese ena lalo-hata ġaudia iboudiai  
na  
baine kara bona baine haguġuru.

Ina ġau do ba diba,  
dina gabedia ai.

### 31

<sup>1</sup> Iehova na e tomu: Una negana ai, lau na Israel  
iduhudia iboudiai edia Dirava ai bainala, bona  
idia na lauegu bese taudia ai baela.

<sup>2</sup> Iehova ini e gwau tomamu:  
Dare amo vada e roho mauri taudia ese  
harihari-bada na e davaria, tano ġaġaena ai.  
Israel ese laġa-ani e tahua negana ai,

<sup>3</sup> Iehova na dauha amo ienai e hedinarai.  
Mia-hanaihanai urahenina amo vada na ura hen-  
imu;  
uda dainai egu heabidadama na emu ai vada  
e hahesiriua.

<sup>4</sup> Bainā haginimu lou, bena vada ba gini,  
Israel, hane-ulato rami-hebouna, e!  
Tareko ba heralai lou, ba raka lasi;  
e moale heboumu taudia edia mavaru lalonai  
ba vareai.

<sup>5</sup> Vine imeadia ma ba hado lou,

- Samaria ororodia ai,  
biru taudia na bae hadohado,  
bena uma anidia bae ani.
- <sup>6</sup> Badina be dinana baine kau, gima taudia na bae  
boiboi,  
Efraim ororodia ai, baeto  
“A tore isi, Siona ai baita dara dae,  
Iehova, eda Dirava, dekenai”.
- <sup>7</sup> Badina be Iehova na ini e gwau tomamu:  
Ane avabi mai moalemui ida, Iakob dainai;  
ba lolo, bese logora ikwaradia tauna enai;  
ba haroro, ba heimodai, baoto  
“Iehova ese ena bese taudia Israel kwabuk-  
wabudia vada e hamauridia”.
- <sup>8</sup> A itaia, mirigini kahana amo baina mailaidia,  
tanobada kaha-daudaudia amo baina  
haboudia;  
bogaragidiai na mata-kepulu bona ae-hedairike  
taudia,  
e rogorogomu hahinena bona e hekamon-  
aimu hahinena danu e raka heboumu;  
orea badana bae lou mai iniseni ai.
- <sup>9</sup> Mai taiadiah ida baema,  
bena mai egu tauhalo ida baina hakaudia lou  
mai;  
sinavai-sinavai badibadidiai baina harakadia,  
dala maoromaorona ai, bena basie hetutuhi;  
badina be lau na Israel tamana,  
bona Efrai na natugu roboana.
- <sup>10</sup> Bese idau-idau e, Iehova ena hereva ba ka-  
monai;  
dauhai, kone tanodia ai, ba gwauraia hed-  
narai, baoto  
“Israel taudia e hakarohodia Diravana ese

ma baine gogodia,  
 bona mamoe iregudia tauna ese ena mamoe e  
 regudiamu na heto,  
 ia ese baine regudia".

<sup>11</sup> Badina be Iehova ese Iakob vada e davalaiia,  
 bona ena goada e hereaia taudia imadia amo  
 vada e hamauria.

<sup>12</sup> Idia na baema, Siona dorina ai ane bae abi  
 badabada,  
 bona vairadia bae diari-diari, Iehova ena ha-  
 henamo dainai,  
 bona aniani, vine ranuna, dehoro daidiae,  
 bona mamoe natudia bona boromakau natu-  
 dia daidiae;  
 edia mauri na e haparipariamu umana na heto,  
 bona taudia basie manori lou.

<sup>13</sup> Bena ulato na mavaru ai bae moale,  
 bona uhau bona iahu bae hisi dae.  
 Lau ese edia taitai na moale ai baina halaoa;  
 taudia baina halodia, bona moale baina hen-  
 dia,  
 lalo-hisihisi gabuna ibolona.

<sup>14</sup> Hahela ġa taudia lalodia na ġau namodia amo  
 baina ubudia badabada,  
 bona egu bese taudia bogadia na egu hahen-  
 amo ai bae kunu.  
 Iehova na e herevamu.

<sup>15</sup> Iehova ini e gwau tomamu:  
 Gado ta Rama ai e hekamonaimu,  
 rohe-ahu bona tai ġadegade bada.

Rahela be natuna taidia e taimu,  
 natuna daidiae tauhalo se uramu,  
 badina be idia na lasihidia.

<sup>16</sup> Iehova ini e gwau tomamu:  
 Ba haheauka, basio tai,

- bona iruru-matamu basie diho;  
 badina be emu ġaukara ahuna bavabia (Iehova na  
     e herevamu),  
     bona īdia na inai taudia edia tano amo bae lou  
         mai.  
 17 Nega vairai emu helaro ġaudia bavabi (Iehova na  
     e herevamu),  
     bona natumu na bae lou mai, edia tano ko-  
         rikori ai.  
 18 Efraim ena ġanāġana vada na kamonai, eto  
     “Matagu o hakania, bena matagu e kani,  
     boromakau natuna, do asie hamanadaia  
         ġauna, na heto;  
 ba hakaugu lou, baina namo lou helaoreana,  
     badina be oi na Iehova, egu Dirava;  
 19 badina be na raka oho murinai na helalo kere-  
     hai,  
     e hadibadibagu murinai mamugu na pataia;  
 na hemarai, na baia,  
     badina be eregabegu hemaraina na huaia”.  
 20 Efraim be na lalokau heniamu merona ani?  
     Ia na natugu lalokau ani?  
 Badina be ihadikana na gwauraiamu negadia  
     iboudiai na  
         doini na laloa taomu.  
 Taunabunai lau lalogu ese e ura henia badamu;  
     momokani lau ese baina bogaia hisi.  
     Iehova na e herevamu.  
 21 Dala toadia ba hagini emui,  
     emui dala iduanaidia audia ba kara;  
 laolao dalana ba haeroa namonamo,  
     o rakalaiamu dalana ba haeroa.  
 Israel e, hane-ulato rami-hebouna e, a lou;  
     ini emui hanua ba lou hen.

**22** Kara hebeatai kekenimu e,  
ba daradara ela bona edena nega ai?  
Badina be Iehova ese kara matamaLana ta  
tanobada ai vada e havaraia:  
hahine ta ese tau ta e gimaiamu.

**23** Iehova Sabaota, Israel Diravana, na ini e  
gwau tomamu: Ma nega ta ini hereva na Iuda  
tanona ai bona ena hanua lalodiai bae gwaurai  
lou, edia noho ma baina hanamoia lou negana ai.  
Kara maoromaoro e nohomu gabuna e! Ororo  
helağana e!

Iehova ese baine hanamomu.

**24** Bena Iuda bona ena hanua iboudiai na unuseni  
ai bae noho hebou, bona biru taudia bona edia  
seri ida e loaloamu taudia danu.

**25** Badina be lalona e manokamu tauna na lalona  
baina hagoadaia, bona lalodia e hisihisimu taudia  
iboudiai na lalodia baina hagoadadia lou.

**26** Bena na noga, na roharoha; egu mahuta  
mamina vada e namo egu ai.

### *Taravatu Matamatana*

**27** Iehova na e tomu: A itaia, negana vada e  
maimu lau ese taunimanima bona ubu-ubu ġaudia  
na baina havaradia, Israel iduhuna ai bona Iuda  
iduhuna ai.

**28** Bena iragadia bona iġiġi-dobidia, ihadarere-  
dia, ihabua-taridia bona ihadikadia totona vada  
na itadia tao heġereġerena ai, lau ese ihaginidia  
bona ihadaidia totona vada na itadia tao. Iehova  
na e herevamu.

**29** Unu dinadia ai idia na basie hereva lou, basi-  
eto

“Tama ese vine huahuadia kasiridia vada e ani,  
bona natudia isedia e urimu”.

**30** A ta ta na ena kara dika ena kara dika daidiae bae mase; vine huahuadia iditadia e animu taudia na sibodia isedia bae uri.

**31** Iehova na e tomu: A itaia, negana vada e maimu lau ese taravatu matamatana na Israel iduhuna bona Iuda iduhuna enai baina kara,

**32** dia senedia ediae na karaia taravatu na na heto, imadia na abidia Aigupto tanona amo baina hakaudia lasi totona negana ai na karaia taravatuna, bena, ena be lau na idia adavadia, to idia ese e tataia utu. (Iehova na e herevamu.)

**33** A ina na Israel iduhuna enai baina karaia taravatuna,unu dina muridiae. Iehova na e tomu: Egu taravatu na ediae baina atoa, bona lalodia ai baina torea; bena lau na edia Dirava ai bainala, bona idia na lauegu bese taudia ai baela.

**34** Una murinai asi tauna ta ese dekena tauna eiava tadikakana baine hadibaia, baineto “Iehova na ba dibaia”; badina be iboudiae ese bae dibagu, maragina amo ela bona badana (Iehova na e herevamu); badina be edia kara havara baina gwaua tao bona edia kara dika basina laloa tao lou.

**35** Iehova, dina e henimu, diari ihavarana,  
bona hua bona hisiu edia dala korikori e henidiamu,

hanuaboi diarina ai baela, Diravana na  
ini e gwau tomamu.

Ia ese davara e haginiamu ela bona hurehure na  
mai gurudia ida e poumu;  
ia ladana na Iehova Sabaota.

**36** Iehova na e tomu:  
Ini edia dala korikori na vairagu amo bema  
heabi oho,  
beni Israel vevena na basie noho bese ta lau  
vairagu ai,

ela bona hanaihanai.

<sup>37</sup> Iehova ini e gwau tomamu:

Guba atai ai bema hahetoho diba,  
bona tano badidia henu ai bema tahudia diba,  
bena Israel vevena iboudiai bama negedia daure,  
edia kara iboudiai daidiae.

Iehova na e herevamu.

<sup>38</sup> Iehova na e tomu: A itaia, nega na e maimu,  
hanua na bae haginia lou, Iehova ena, Hananele  
kohorona amo ela bona Daiguni Ikoukouna.

<sup>39</sup> Bena hahetoho varona na ma bae veria lao,  
maoromaoro bainela ela bona Gareb ororona, ma  
bae veria mageva ela bona Goa.

<sup>40</sup> Mase tau-anidia bona kahu kourana idoinai  
bona rei gabudia iboudiai ela bona Kidron  
dokadokana, ela bona Hosi Ikoukouna daigunina,  
mairiveina kahana ai, idoinai baine helāga Iehova  
ena. Ia na nega ta ai basine heraga eiava basine  
hegīgi dobi ela bona hanaihanai.

## 32

*Ieremia ese tano ta e hoia Anatoto ai*

<sup>1</sup> Ina hereva na Iehova ena amo Ieremia enai e  
kau, Sedekia, Iuda pavapavana, ena lohia lağanina  
ihagvautana ai. Una na Nebukadresara ena lohia  
lağanina ihagwauta-taurahanina.

<sup>2</sup> Una negana ai Babulono pavapavana ena tuari  
oreana ese Ierusalem vada e daia heğeğe; bona  
peroveta tauna Ieremia na hegima taudia edia  
magu lalonai vada e hekou, Iuda pavapavana ena  
ruma ai.

<sup>3</sup> Badina be Sedekia, Iuda pavapavana, ese vada  
e koua ahu, eto, Badina be dahaka o perovetamu,  
o tomu, Iehova ini e gwau tomamu: A itaia, lau ese

ina hanua na Babulono pavapavana imana ai na atoamu, ia ese baine abia;

<sup>4</sup> bona Sedekia, Iuda pavapavana, na Kaldea taudia imadia amo basine roho mauri diba, a ia na momokani Babulono pavapavana imana ai baine heato, ia ida hevaira-hehenidia ai bae hereva heheni bona bae heroha heheni.

<sup>5</sup> Bena ia ese Sedekia na Babulono baine laohaiia, unuseni ai baine noho ela bona lau ese baina vadivadi henia; Iehova na e herevamu. Ena be Kaldea taudia ba tuari henidia to basio kwalimu.

<sup>6</sup> Ieremia eto, Iehova ena hereva na egu ai e kau, eto,

<sup>7</sup> A itaia, Hanamele, tamamu lahaina Salumu natuna, na baine vasi, baineto “Egu tano Anatoto ai, Beniamina tanona ai, ba hoia, badina be iabitaona siahuna na oiemu ai”.

<sup>8</sup> Bena tadikakagu Hanamele na dekegu ema, hegima taudia edia magu ai, Iehova ena hereva heğereğerenai ai, e hereva henigu, eto, Egu tano Anatoto ai, Beniamina tanona ai, ba hoia, badina be iabina mai siahuna tauna na oi; ba hoia emu. Bena na diba una na Iehova ena hereva.

<sup>9</sup> Bena una tano Anatoto ai na tadikakagu Hanamele ena amo na hoia, moni na hahetoho, na henia, *silver sekeledia gwauta-hitu*.

<sup>10</sup> Ladagu na tano ibiaguna pepana ai na toreia, na koua kunuka-kunuka, bena kara ihamomokanina taudia na abidia, bona moni na metau ihahetohona ġauna ai na hahetoho.

<sup>11</sup> Bena hari tano ibiaguna pepana, e koua kunuka-kunuka ġauna, bona ia ida-idana pepana ta, e hulala ġauna, na abidia;

<sup>12</sup> bena hari tano ibiaguna pepana na Baruku, Neria Mahaseia natuna, na henia, tadikakagu

Hanamele vairanai, bona kara ihamomokanidia totona ladadia na una pepa ai e tore taudia vairadai, bona Iuda taudia, hegima taudia edia maǵu ai e helaiva taudia, iboudiai vairadai danu.

<sup>13</sup> Idia vairadai Baruku na haǵania, nato,

<sup>14</sup> Iehova Sabaota, Israel Diravana, na ini e gwau tomamu: Ini tano ibiaguna pepadia, hari e koua kunuka-kunuka ǵauna, bona hari e hulala ǵauna danu, avabidia, hodu ta ai ba udadia, bae mia daudau helaoareana.

<sup>15</sup> Badina be Iehova Sabaota, Israel Diravana, na ini e gwau tomamu: Ruma bona tano bona vine imeadia ma bae hoi lou ina tano ai.

<sup>16</sup> Hari tano ibiaguna pepana na Baruku Neria na henia murinai, lau ese Iehova na ǵuria, nato,

<sup>17</sup> Gaubada Iehova e, oi ese guba bona tanobada na emu siahu badana bona imamu hetoi-rorona amo vada o kara. Gau ta na dia auka oiemu;

<sup>18</sup> oi na datha datha o bogadia hisimu, a tama edia kerere davadia na muridai natudia o henidiamu. Dirava badana, Siahu Diravana e, oi ladamu na Iehova Sabaota;

<sup>19</sup> emu hahealo na bada, bona emu kara na mai siahudia; oi matamu e papamu, taunimanima edia kara iboudiai o itadiamu, ta ta ena dala ena dala bona ena kara anidia ena kara anidia heǵereǵeredia davadia o henidiamu.

<sup>20</sup> Oi ese toa bona hoa karadia na Aigupto tanona ai vada o hahedinarai, bona Israel ai bona taunimanima iboudiai bogaragidiai danu, ema bona ina dina; bona sibomu ladamu vada o hadaea ina dina ai.

<sup>21</sup> Oi ese emu bese Israel na Aigupto tanona amo o hakaudia lasi, mai toa bona hoa karadia, bona

mai imamu goadana, mai imamu hetoi-rorona,  
bona mai hahegari badana ida.

<sup>22</sup> Ina tano danu vada o henidia, senedia o gwau  
henidia hamata ba henidia oto tanona, rata bona  
bada ranuna e arumu tanona;

<sup>23</sup> bena e raka vareai, e ġaunaia. A idia na oi  
eremu asie kamonai, bona oiemu taravatu ai asie  
raka; o haganilaidia karadia iboudiai na ta asie  
karaia. Una dainai ina dika idoinai na idia latadi  
vada o hadihoa.

<sup>24</sup> A itaia, tano vada e senua, hanua badana  
iabina totona, bena dare bona doe bona dai-hanai  
gorerena daidiae hanua na Kaldea taudia, e tuari  
heniamu taudia, imadia ai vada e atoa. O gwaurai  
herevadia anidia vada e vara, bena vada o itaia.

<sup>25</sup> A oi, Ĝaubada Iehova e, vada o hamaorogu, oto,  
Ena be hanua na Kaldea taudia imadia ai vada na  
atoa, to oi ese tano na moni amo ba hoia, kara  
ihamomokanina taudia danu bavabidia.

<sup>26</sup> Iehova ena hereva na Ieremia enai e kau, eto:

<sup>27</sup> A itaia, lau na Iehova, mauri ġaudia iboudiai  
edia Dirava. Kara ta na auka herea, bena basina  
karaia diba a?

<sup>28</sup> Taunabunai Iehova ini e gwau tomamu: A  
itaia, lau ese ina hanua na Kaldea taudia imadia  
ai bona Nebukadresara, Babulono pavapavana,  
imana ai baina atoa, bena ia ese baine abia.

<sup>29</sup> Kaldea taudia, ina hanua e tuari heniamu  
taudia, na baema, ina hanua na bae daea, bae  
doua; guhidia ai muramura mai bonana na Baal  
e gabu henia bona inuinu bouboudia na dirava  
idaudia e bubu henidia bena unu amo e habadugu  
rumadia danu bae dou.

<sup>30</sup> Badina be Israel garana bona Iuda garana na  
kara dikadia mo vada e kara lau vairagu ai, mero-

dia negadia amo, Israel garana imadia ġaukaradia na lau ihabadugu karadia mo. Iehova na e herevamu.

<sup>31</sup> Ina hanua ese egu badu bona egu lalo-siahu vada e havaradia, e haginia dinana amo ema bona ina dina, una dainai lau ese vairagu amo baina abia oho,

<sup>32</sup> Israel garana bona Iuda garana edia kara dika iboudiai daidiae. Idia ese lau ihabadugu karadia e kara: edia pavapava bona edia lohia, edia hahe-laġa taudia bona edia peroveta taudia, Iuda taudia bona Ierusalem inoholaina taudia ese.

<sup>33</sup> Idia ese vada e gini muri henigu, asie vaira henigu. Ena be na hadibadia havara-havara to idia ese hahediba herevadia na asie hakala henidia.

<sup>34</sup> Edia ġau dika-rohorohodia na e haginidia, lau ladagu e henemailaia dubuna lalonai, bae hamiroa totona.

<sup>35</sup> Baal ena atai gabudia helagadia e larebadia, Hinom natuna ena koura ai, natudia mamaruanedia bona hahinedia na boubou ġaudia ai bae halaodia totona, Molek ena. A lau ese asina haġanidia bona asina laloa idia ese una kara dikarohorohona amo Iuda taudia bae hakaradia dika.

<sup>36</sup> Taunabunai, ina hanua, umui ese o herevaliamu, o tomu “Dare bona doe bona dai-hanai gor-erena amo Babulono pavapavana imana u vada e atoa”, hanuana na Iehova, Israel Diravana, ese ini e herevalaia tomamu:

<sup>37</sup> A itaia, egu badu bona egu lalo-siahu bona egu lalo-garagara bada-herea lalonai na luludia lao tanodia iboudiae amo ma baina haboudia lou; baina loulaidia ina gabu ai, bona baina hanohodia namonamo.

**38** Idia na lauegu bese ai baela bona lau na edia Dirava ai bainala.

**39** Lalo tamona bona dala tamona baina henidia, bena lau bae gari henigu hanaihanai, idia bona muridhi natudia danu ihanamodia.

**40** Lau ese egu gwauhamata baina henidia hanaihanai, bainato, idia ihanamodia karadia amo basina raka siri; bona lau garigu na lalodia ai baina atoa, egu amo basie raka siri helaoreana.

**41** Idia ihanamodia karadia baina moalelaidia, bona heabidadama ai ina tano ai baina hadaidia, mai lalogu idoinai bona mai laumagu idoinai ida.

**42** Badina be Iehova ini e gwau tomamu: Ina dika badana idoinai na ina bese taudia latadiai vada na hadihoa hegereggerena, lau ese danu na gwauhamatalai henidiamu kara-namodh iboudiai ma baina hadiho.

**43** Ina tano, umui ese o herevalaiamu, o tomu “Ia na vada e vahu, asi tauna bona asi ubu-ubu ġauna; Kaldea taudia imadia ai vada e atoa”, tanona lalonai inogo vada ba hoi;

**44** Inoġi na moni amo ba hoi, bona tano ibiagudia pepadia ai ladamui ba tore, bena ba koudia kunuka-kunuka, bona kara ihamomokanina taudh ese bae hamomokanidia, Beniamina tanona ai, bona Ierusalem hetabirana ai, bona Iuda hanuadiah ai, bona ororo kahadia hanuadiah bona taora hanuadiah bona diho kahana hanuadiah ai; badina be edia noho ma baina hanamoia lou. Iehova na e herevamu.

## 33

*Ierusalem ihanamo-louna*

<sup>1</sup> Nega iharuana Iehova ena hereva na Ieremia enai e kau, ia na dounu hegima taudia edia maǵu ai e hekou ahu negana ai.

<sup>2</sup> Iehova, tanobada e karaia bona baine gini tutuka-tutuka totona oromana e henia Diravana (ia ladana na Iehova) ini e gwau tomamu:

<sup>3</sup> Ba boi henigu, bena baina haere henimu, bona āgau badadia, hehuni āgaudia, do asi dibamu āgaudia, na baina hamaorolaimu.

<sup>4</sup> Badina be Iehova, Israel Diravana, ese ina hanua rumadia bona Iuda pavapavadia edia ruma, e larebadia tanodia bona dare ilao-ahudia totona e āgigidia dobi rumadia, na ini e herevalaidia tomamu:

<sup>5</sup> Kaldea taudia na e aru e maimu, bae tuari henidia, bona egu badu bona egu lalo-siahu ai baina rahudh mase taudia tau-anidia masedia amo bae hahonudia; badina be lau ese vairagu na ina hanua amo vada na hunia, edia kara dikadia iboudiai daidiae.

<sup>6</sup> A itaia, lau ese goada bona tauhalo baina henia; baina hanamodia, bona noho-namo bona noho-maino na baina hahedinarai henidia badabada.

<sup>7</sup> Iuda bona Israel edia noho-namo ma baina henidia lou, bona baina haginidia lou, e gini gunava heǵereǵerena.

<sup>8</sup> E kara dika henigu dikana mirona idoinai amo baina haǵoevadia, bona edia kara dika bona edia gwau-edede egu ai mirona idoinai na baina gwaua tao.

<sup>9</sup> Bena ina hanua na egu ai lada mai moalena, heimodai āgauna bona hairai āgauna ai bainela, tanobada besedia iboudiai vairadiai. Idia ese kara namo iboudiai, lau ese na kara henidiamu kara-

dia, sivaraidia bae kamonai; idia na bae gari, tau-dia bae heude-heude, kara namo iboudiai bona noho-namo idoinai ina hanua baina karalai henia dainai.

<sup>10</sup> Iehova ini e gwau tomamu: Ina gabu, o herevalaiamu o tomu “Ia na vada e vahu, asi tauna ta eiava asi ubu-ubu ġauna ta” gabuna ai, bona Iuda hanuadia ai bona Ierusalem ariaradia ai, idia danu vada e vahu, asi tauna ta eiava asi inoholaina ta eiava asi ubu-ubu ġauna ta, unuseni ai

<sup>11</sup> kiri gadona bona moale gadona, headava matamata tauna gadona bona headava matamata hahinena gadona, bae kamonaidia lou; bona ane-abbi taudia gadodia danu. Idia ese hahenamo boubouna ġaudia na Iehova ena dubu ai bae mailaidia, baeto,

Iehova Sabaota ba hanamoia,

badina be Iehova na namo;  
badina be ena hebogahisi na  
e hesiriu hanaihanaimu.

Badina belau ese tano ena noho-namo gunana ma baina henia lou. Iehova na e herevamu.

<sup>12</sup> Iehova Sabaota ini e gwau tomamu: Ina gabu ġaġaena, asi tauna ta eiava asi ubu-ubu ġauna ta gabuna, lalonai, bona hanuana iboudiai lalodiae, mamoe ireġudia taudia, edia mamoe e halāġ-anidiamu taudia, edia noho gabudia ma bae hekara lou.

<sup>13</sup> Ororo kahadia hanuadia ai bona taora hanuadia ai bona diho kahana hanuadia ai, bona Beniamina tanona ai bona Ierusalem hetabirana gabudia ai, bona Iuda hanuadia ai, mamoe seridia na iduahidia tauna imana henuidia amo bae raka hanai. Iehova na e herevamu.

<sup>14</sup> Iehova na e tomu: A itaia, negana be maimu, lau ese Israel iduhuna bona Iuda iduhuna na hendiā gwauhamatana baina hamomokania.

<sup>15</sup> Unu dinadia ai bona una nega ai, lau ese Riga, kara maoromaoro ġauna, na baina hatubua, David ena; bena ia ese hahemaoro ġoevaġoева bona kara maoromaoro baine kara ina tano ai.

<sup>16</sup> Unu dinadia ai Iuda na baine mauri, bona Ierusalem baine noho namonamo. Bona ladana na ini bae hatoa toma: “Iehova na eda kara maoromaoro”.

<sup>17</sup> Badina be Iehova ini e gwau tomamu: David iduhuna amo nega ta ai Israel ena bese teronona ihelai-kauna taudia ta ai basine dabu,

<sup>18</sup> bona hahelaġa taudia Levi oreana amo nega ta lau vairagu ai ġole-oho bouboudia ihahelaġadie bona flaoa bouboudia igabudia bona boubou karadia ikaradia taudia ta ai basie dabu, ela bona hanaihanai.

<sup>19</sup> Iehova ena hereva na Ieremia enai e kau, eto,

<sup>20</sup> Iehova ini e gwau tomamu: Egu haheġani dina enai eiava hanuaboi enai boma utua diba, bena dina bona hanuaboi na edia nega korikoridie ai basiema hedinarai,

<sup>21</sup> bena egu gwauhamata egu hesiai tauna David enai danu ba utua diba, bena garana ta basine vara ena terono ihelai-kauna; bona egu gwauhamata hahelaġa taudia Levi oreana amo, egu hesiai taudia, ediai danu ba utua diba.

<sup>22</sup> Guba hisiudia na asi iduahidie bona kone miridia na asi ihahetohodia na heto, egu hesiai tauna David garana bona hahelaġa taudia Levi oreana amo garadia unu baina hahutumadie toma.

<sup>23</sup> Iehova ena hereva na Ieremia enai ma e kau, eto,

<sup>24</sup> Ini taunimanima edia hereva so kamonai, eto “Iehova ese e abidia hidi iduhudia ruaosi vada e dadaraidia”, a? Unuheto, idia ese egu bese taudia vada e dadaraidia, bena harihari idia na dia bese ta idia vairadai.

<sup>25</sup> Iehova ini e gwau tomamu: Egu hahegani dina bona hanuaboi ediai basinama haginia bona guba bona tanobada taravatudia danu,

<sup>26</sup> bena lau ese Iakob bona egu hesiai tauna David garadia baina dadaraidia, bona ia garana ta basina abia hidi, Abraham bona Isaak bona Iakob vevedia ilohiad. Badina be edia noho-namo baina havara henidia lou, bona baina bogadia hisi.

## 34

### *Ieremia ese Sedekia e sisiba henia*

<sup>1</sup> A Nebukadresara, Babulono pavapavana, bona ena tuari oreana idoinai, bona tanobada basileiadia iboudiai, iena siahu henunai e nohova oreadia, bona bese idau-idau iboudiai, ese Ierusalem mai ena hanua iboudiai ida e tuari henidiava negana ai, Iehova ena hereva ta na Ieremia enai e kau, eto,

<sup>2</sup> Iehova, Israel Diravana, na ini e gwau tomamu: Aola, Sedekia, Iuda pavapavana, ba hereva henia, baoto, Iehova ini e gwau tomamu: A itaia, ina hanua na Babulono pavapavana imana ai baina atoa; ia ese lahi amo baine doua.

<sup>3</sup> Oi na ia imana amo basio roho mauri; momokani, haida ese bae abimu mauri, bena ia imana ai bae atomu. Oi na Babulono pavapavana

ida ba heroha heheni, ba hevaira heheni, bona ba hereva heheni; bena Babulono baola.

<sup>4</sup> Sedekia, Iuda pavapavana, e! Iehova ena hereva ba kamonai. Iehova ese ini e herevalaimu tomamu: Dare ai basio mase.

<sup>5</sup> Maino ai ba mase. Senemu, pavapava dagina ai e gunalaimu taudia, daidai muramura mai bonadia e gabu heğereğerena ai, taunimanima ese muramura mai bonadia bae gabu oi daimu ai, bona oi daimu ai bae rohe ahu, baeto “Gauka e, ihabaimu!” Iehova na e tomu: Vada na hereva.

<sup>6</sup> Bena peroveta tauna Ieremia ese ini hereva iboudiai na Sedekia, Iuda pavapavana, e hamaorolaia, Ierusalem ai,

<sup>7</sup> Babulono pavapavana ena tuari oreana ese Ierusalem bona Iuda hanuadia oredia iboudiai, Lakisi bona Aseka, dounu e tuari henidiava negana ai. Badina be hanua mai mağudia dounu Iuda ai e miava be unu ruaosi mo.

### *Hesiae taudia iruhadia bona īgħi-loudia sivaraina*

<sup>8</sup> King Sedekia ese Ierusalem taudia iboudiai taravadia e atu, hekahu-nege herevadia e gwaurrai henidia, murinai Iehova ena hereva ta na Ieremia enai e kau.

<sup>9</sup> E gwaurai henidia herevana binai: idia iboudiai ese edia hesiae taudia, Heberu taudia vada e ġuidia bona isiaidia ilao-henidia taudia ai vada e halaodia taudia, tatau bona hahine, bae ruhadia nege; bena tau ta ese tadikakana Iuda tauna ta basine ġuia, ena hesiae tauna ai basine halaoa.

<sup>10</sup> Bena e kamonai, hanua lohiadia bona hanua taudia iboudiai ese taravatu vada e abia dae, iboudiai ese edia hesiae taudia, tatau eiava

hahine, bae ruhadia nege, bena basie ġuidia lou eto. Idia na e kamonai, e ruhadia nege.

<sup>11</sup> A gabeamo idia na e kerehai, edia hesiai taudia mamaruanedia bona hahinedia, vada e ruhadia nege taudia, na ma e abidia lou, e ġuidia, hesiai taudia ai ma e halaodia.

<sup>12</sup> Bena Iehova ena hereva na Iehova ena amo Ieremia enai e kau, eto,

<sup>13</sup> Iehova, Israel Diravana, na ini e gwau tomamu: Senemui na Aigupto tanona amo bona iġui rumana amo na hakaudia lasi negana ai lau ese taravadia na atu, nato

<sup>14</sup> “Laġani tauratoi dokodia ai, iboumui ai ese tadikakamui Heberu taudia vada o hoidia bena laġani tauratoi lalodiae isiaimui vada e lao henitaudia, vada ba ruhadia nege; isiaimui ilao-henina amo ba ruhadia nege”. A senemui ese asie kamonai henigu bona asie hakala henigu.

<sup>15</sup> Vanegai mo umui na o helalo kerehai, bena kara maoromaorona na lau vairagu ai vada o karaia, hekahu-nege o gwaurai hedinarai, ta ta dekena tauna dekena tauna ediai; bona lau vairagu ai o gwau hamata, lau ladagu e hene-mailaia dubuna lalonai.

<sup>16</sup> A ma o kerehai lou, lau ladagu o hamiroa; iboumui ai emui hesiai taudia mamaruanedia bona hahinedia, edia ura heġereġerena ai vada o ruhadia nege taudia, ma o abidia lou, o ġuidia, hesiai taudia ai ma o halaodia.

<sup>17</sup> Taunabunai, Iehova ini e gwau tomamu: Asio kamonai henigu, hekahu-nege igwauraina ai, ta ta tadikakana tadikakana ediai, bona ta ta dekena tauna dekena tauna ediai; benaini, lau ese hekahu-nege na gwaurai henimuimu, dare bona

dai-hanai gorerena bona doe na latamui ai na kahudia negemu, bona hahegari ġauna ai baina halaomui tanobada basileiadia iboudiai ediai.

<sup>18</sup> Bona egu taravatu e tataia utu bona edia gwauhamata, lau vairagu ai e gwauraia ġauna, asie badinaia taudia na boromakau natuna, idia ese e utua parara bona kahana kahana padadia amo e rakaia hanai ġauna, heğereğerenā ai baina halaoa:

<sup>19</sup> Iuda lohiadia, Ierusalem lohiadia, hesiai taudia, hahelaġa taudia, bona hanua taudia, boromakau natuna kahana kahana padadia amo e raka hanai taudia iboudiai.

<sup>20</sup> Bena lau ese inaidia imadia ai bona edia mauri iabi-ohona dalana e tahuamu taudia imadia ai baina atodia. Tau-anidia masedia na atai manudia bona tanobada boromadia ese bae ani.

<sup>21</sup> Bona Sedekia, Iuda pavapavana, bona ena lohia taudia, na lau ese inaidia imadia ai, bona edia mauri iabi-ohona dalana e tahuamu taudia imadia ai, bona Babulono pavapavana ena tuari oreana, hari emui amo vada e raka oho oreana, imadia ai, baina atodia.

<sup>22</sup> Iehova na e tomu: A itaia, lau baina haheğani, bena ma baina loulaidia mai, ina hanua ma baema; bena idia ese bae tuari henia, bae abia, lahi amo bae doua. Iuda hanuadia na baina havahudia, asi unoholaidia bae mia.

## 35

### *Rekab taudia herevadia*

<sup>1</sup> Iehoiakim, Iuda pavapavana Iosia natuna, ena nega ai, Iehova ena hereva na Ieremia enai e kau, eto,

<sup>2</sup> Rekab taudia edia rumbaola, ba hereva henidia, bena ba hakaudia mai, Iehova ena dubu ai,

daiutuna ta lalonai. Bena vine ranuna ba dudui henidia, bae inua totona.

<sup>3</sup> Taunabunai, Iaasania, Ieremia Habasinia natuna, mai tadikakana bona natuna iboudiai ida, bona Rekab iduhuna idoinai, na abidia.

<sup>4</sup> Na hakaudia mai, Iehova ena dubu ai, Hanana Igdalia, Dirava ena tau, natuna edia daiutu lalonai. Una daiutu na lohia taudia edia daiutu badibadinai, bona Ma-aseia Salumu, dubu raka-vareaina igimana tauna, ena daiutu daenai.

<sup>5</sup> Bena hodu haida, vine ranuna ai e honu ġaudia, bona kehere haida na idia vairadai na ato; bena na hereva henidia, nato, Vine ranuna ba inua.

<sup>6</sup> A idia na e haere, eto, Ai na vine ranuna basia inua, badina be ai senemai Ionadab Rekab ese e haġanimai, eto, Vine ranuna basio unua, umui bona garamui danu, ela bona hanaihanai;

<sup>7</sup> rumu auta basio haginia; basio hadohado; vine imeana ta basio hadoa eiava basio abia emui; a emui mauri dinadia iboudiai kalaga ai ba noho, o noholaiamu tanona ai emui mauri dinadia bae hoho helaoreana.

<sup>8</sup> Ai ese senemai Ionadab Rekab gadona vada a badinaia, e haganilaimai karadia iboudiai lalod-diai, emai mauri dinadia iboudiai vine ranuna asia inuamu, ai bona adavamai bona natumai mamaruanedia bona hahinedia danu;

<sup>9</sup> bona rumu danu asia haginidia, asia noholaidia. Asi emai vineimeadia, asi emai uma, asi emai uhe;

<sup>10</sup> a kalaga ai vada a noho, bona senemai Ionadab ese e haganilaimai karadia iboudiai vada a badinadia bona a karadia.

<sup>11</sup> A Nebukadresara, Babulono pavapavana, na tano idaena totona ema negana ai, ai ato “Aoma,

Ierusalem aitala, Kaldea taudia bona Suria taudia edia tuari oreadia na garidia". Taunabunai ai na Ierusalem ai a nohomu.

<sup>12</sup> Bena Iehova ena hereva na Ieremia enai e kau, eto,

<sup>13</sup> Iehova Sabaota, Israel Diravana, na ini e gwau tomamu: Aola, Iuda taudia bona Ierusalem inoholaina taudia ba hamaorodia, baoto, Iehova na e tomu: Hahediba herevadia basio abi dae bona egu hereva basio kamonai a?

<sup>14</sup> Haheğani, Ionadab Rekab ese garana e henidia ġauna, vine ranuna basie inua, na vada e badinaia; idia na asie inuamu ema bona ina dina, badina be senedia ena haheğani vada e badinaia. Lau ese vada na hereva henimui havara-havara, a umui ese asio kamonai henigu.

<sup>15</sup> Lau ese egu peroveta hesiai taudia iboudiai vada na siaidia vasi, na siaidia havara-havara, nato, Iboumui ai emui dala dikadia amo ba raka siri, bona emui kara ba haǵoevadia, bona dirava idaudia muridia amo basiola, isiaidia basio lao hen; bena umui na henimui bona senemui na henidia tanona ai do ba noho. A taiamui asio hakala bona asio kamonai henigu.

<sup>16</sup> Ionadab Rekab garana ese senedia ena haheğani vada e badinaia, a ina bese ese se kamonai henigu.

<sup>17</sup> Taunabunai, Ġaubada Iehova Sabaota, Israel Diravana, na ini e gwau tomamu: A itaia, hahedika Iuda bona Ierusalem inoholaina taudia iboudiai latadijai vada na gwaurai ġauna na ediai baina havaraia; badina be vada na hereva henidia to asie kamonai, vada na boi henidia to asie haere.

<sup>18</sup> A Rekab iduhuna taudia na Ieremia ese e hereva henidia, eto, Iehova Sabaota, Israel Dir-

vana, na ini e gwau tomamu: Badina be sene-mui Ionadab ena hahegani vada o badinaia, bona ena hahediba herevadia iboudiai vada o badinadia, bona e haganilaimui karadia iboudiai vada o kara,

<sup>19</sup> una dainai Iehova Sabaota, Israel Diravana, na ini e gwau tomamu: Ionadab Rekab iduhuna na nega ta ai lau vairagu ai iginina taudia ta ai basine dabu.

## 36

*King Iehoiakim ese peroveta pepana e doua*

<sup>1</sup> Iehoiakim, Iuda pavapavana Iosia natuna ena lohia lağanina ihahanina ai, ina hereva Iehova ena amo na Ieremia enai e kau, eto:

<sup>2</sup> Pepa ta avabia, Israel bona Iuda bona bese idau-idau iboudiai ihadikadia herevadia, vada na gwaurai henimu ġaudia, na hereva henimu matama dinana amo, Iosia ena nega ai, ema bona ina dina, vada ba tote.

<sup>3</sup> Readia Iuda iduhuna taudia na ihadikadia karadia iboudiai vada na lalo hata baina kara henidia nato herevadia bae kamonai, bena una dainai iboudiai ese edia dala dikadia bae rakanati, bena lau ese edia kara havara bona edia kara dika baina gwau tao.

<sup>4</sup> Bena Ieremia ese Baruku Neria e boiria; bona Iehova ese vada e hamaorolaia herevadia iboudiai na Ieremia ese e gwaurai, bena Baruku ese pepa ta ai e tote.

<sup>5</sup> Bena Ieremia ese Baruku e haduaia, eto, Vada e g vaugu tao, Iehova ena dubu ilao-henina ai;

<sup>6</sup> una dainai oi hari baola, bena anivaga dinana ta ai Iehova ena hereva, lau ese vada na gwaurai

bona oi ese pepa ai vada o tore ġaudia, na Iehova ena dubu ai e heboumu taudia iboudiai vairadiai ba duahi. Iuda taudia, edia hanua amo vada e raka lasi taudia iboudiai, vairadiai danu ba duahi.

<sup>7</sup> Readia edia noinoi na Iehova enai baine kau, bena iboudiai ese edia dala dikadia bae rakatania, badina be badu bona lalo-siahu Iehova ese ina bese latanai vada e gwaurai na bada herea.

<sup>8</sup> Bena Baruku Neria ese peroveta tauna Ieremia ena hahedua idoinai heğereğerenai ai e karaia, Iehova ena hereva na pepa amo e duahia, Iehova ena dubu ai.

<sup>9</sup> Iehoiakim, Iuda pavapavana Iosia natuna, ena lohia lağanina iha-imana huana ihataurahani-tana ai, Ierusalem taudia iboudiai bona Iuda hanuadiah amo Ierusalem vada ema taudia iboudiai ese anivaga e gwauraia Iehova vairanai.

<sup>10</sup> Bena taunimanima iboudiai vairadiai Baruku ese Ieremia ena hereva na pepa amo e duahia, Iehova ena dubu ai, toretore tauna Gemaria Safana ena daiutu lalonai. Una daiutu na alai maguna ai, Iehova ena dubu ikoukouna, ladana Ikoukou Matamatana, badibadinai.

<sup>11</sup> Mikaia Gemaria Safana natuna, ese Iehova ena hereva iboudiai, pepa amo e duahi ġaudia, na e kamonai negana ai,

<sup>12</sup> ia na pavapava ena rumah diho lao, toretore tauna ena daiutu ai e raka vareai. Lohia iboudiai unuseni ai e heliva: toretore tauna Elisama, Semaia natuna Delaia, Akaboro natuna Elnatan, Safana natuna Gemaria, Hanania natuna Sedekia, bona lohia iboudiai.

<sup>13</sup> Bena Mikaia ese e kamonai herevadia iboudiai, Baruku ese taunimanima vairadiai pepa amo e duahi herevadia, na e hamaorolaidia.

**14** Bena lohia iboudiai ese lehudi (ia na Netania natuna, Netania na Selemia natuna, Selemia na Kusi natuna) e siaia lao, Baruku baine hamaoroa, baineto, Hari taunimanima vairadai o duahia pepana na imamu ai bavabia, vada baoma. Taunabunai, Baruku Neria ese pepa na imana ai e abia, bena dekedia ela.

**15** Idia ese e hamaoroa, eto, A helai diho, ba duahia. Taunabunai, Baruku ese e duahi henidia.

**16** Unu hereva iboudiai e kamonai negana ai, idia na mai garidia ida e heroha heheni. Bena idia ese Baruku e hamaoroa, eto, Ini-hereva iboudiai na hanua pavapavana do baia hamaorolaia.

**17** Bena idia ese Baruku e nanadaia, eto, A hamaoromai, ini hereva iboudiai ede o tore toma? Ia ese e gwaurai bena o tore a?

**18** Bena Baruku ese e haere henidia, eto, Ia ese ini hereva iboudiai e gwaurai henigu, bena lau ese ink amo na tore, pepa ai.

**19** Bena hari lohia ese Baruku e hamaoroa, eto, Aola, a komu, oi bona Ieremia danu, bona tau ta basine diba umui na edesenai ai.

**20** Taunabunai, idia ese pepa na toretore tauna Elisama ena daiutu ai e atoa, bena hanua pavapavana ena mağu lalonai e raka vareai, unu hereva iboudiai na hanua pavapavana e hamaorolaia.

**21** Bena hanua pavapavana ese Iehudi na pepa iabina totona e siaia lao; bena ia ese toretore tauna Elisama ena daiutu lalona amo.e abia. Bena Iehudi ese hanua parapavana bona hanua pavapavana badibadinai e giniva lohiadia e duahi henidia.

**22** Nega na hua ihataurahani-tana; hanua pavapavana na keru negana rumana ai e helaiva, bona

lahi na rahurahu ai vada e ha-araia ia vairanai.

<sup>23</sup> Iehudi ese ere toi eiava hani e duahidia, bena hanua pavapavana ese kaia maragina amo e utudia oho, hari rahurahu ai e arava lahina lalonai e tahodia vareai. Unu mo e kara toma ela bona pepa Idoinai na una rahurahu ai e arava lahina ai e ara ore.

<sup>24</sup> Gau tamona, ini hereva iboudiai e kamonai vaitani murinai, hanua pavapavana eiava ena hesiai taudia ta se gari, eiava edia dabua asie dare.

<sup>25</sup> Ena be Elnatan bona Delaia bona Gemaria ese hanua pavapavana e hereva henia goadagoada, pepa na basine doua, to ia ese se kamonai henidia.

<sup>26</sup> Bena hanua pavapavana ese Ierahamele, hanua pavapavana natuna, bona Seraia, Asriel natuna, bona Selemia, Abdele natuna, na e hağanidia, idia ese toretore tauna Baruku bona peroveta tauna leremia bae dabaidia tao. A Iehova ese e hunidia.

<sup>27</sup> Ieremia ese e gwaurai bena Baruku ese e tore herevadia pepana na hanua pavapavana ese e doua murinai, Iehova ena hereva ta Ieremia enai e kau, eto,

<sup>28</sup> Ma pepa ta bavabia, hereva gunadia, pepa gini-gunana, Iehoiakim, Iuda pavapavana, ese e doua ġauna, ai e tore herevadia ma ba tote lou.

<sup>29</sup> Bona Iehoiakim, Iuda pavapavana, na ini ba herevalaia toma, baoto, Iehova ini e gwau tomamu: Ina pepa vada o doua, oto “Dahaka dainai ia lalonai vada o torea Babulono pavapavana na momokani bainema, ina tano baine habuaia tari bona taunimanima bona ubu-ubu ġaudia na ia lalona amo baine negedia daure?”

<sup>30</sup> Taunabunai, Iehova ese Iehoiakim, Iuda

pavapavana, na ini e herevalaia tomamu: Ia garana ta ese David ena terono ai basine helai kau; bona ia tau-anina masena na murimuri ai bae negea lasi, dina garağarana ai bona hanuaboi parakana ai baine mia.

<sup>31</sup> Lau ese ia bona natuna bona ena hesiai taudia na davadia baina henidia, edia kara havara daidiai. Idia latadiai, bona Ierusalem inoholaina taudia bona Iuda taudia latadiai, dika idoinai, idia latadiai vada na gwauraia ġauna, na baina hadihoa; a idia na asie ura bae kamonai.

<sup>32</sup> Bena Ieremia ese pepa ta ma e abia, itorena tauna Baruku Neria e henia; bena Iehoiakim, Iuda pavapavana, ese lahi ai e doua pepana herevadia iboudiai na Ieremia ese ma e gwaurai bona Baruku ese ma e tore; bona hereva unuhetomadia momo na idia latadiai ma e tore kau.

## 37

### *Ieremia na dibura rumana ai e koua*

<sup>1</sup> Sedekia Iosia, Nebukadresara, Babulono pava-pavana, ese Iuda tanona pavapavana ai e halaoa tauna, na Iuda ai e lohiava, Konia Iehoiakim gabuna ai.

<sup>2</sup> A ia bona ena hesiai taudia bona tano taudia ese Iehova ena hereva, peroveta tauna Ieremia uduna amo e gwaurai ġaudia, na asie kamonaidia.

<sup>3</sup> King Sedekia ese Iehukala Selemia bona ha-helaġa tauna Sefania Maaseia na peroveta tauna Ieremia dekena e siaidia lao, eto, Iehova, eda Dirava, na ai daimai ai ba ġuria.

<sup>4</sup> Una negana ai Ieremia na dounu taunimanima bogaragidiae raka vareaiva e raka lasiva; badina be dibura rumana ai do asie koua.

<sup>5</sup> Farao ena tuari oreana na Aigupto amo vada e raka lasi; bena Kaldea taudia, Ierusalem e daia hegege oreana, ese haridia e kamonai negana ai, idia na Ierusalem amo e raka oho.

<sup>6</sup> Bena Iehova ena hereva na peroveta tauna Ieremia dekenai e kau, eto,

<sup>7</sup> Iehova, Israel Diravana, na ini e gwau tomamu: Iuda pavapavana, dekegu ai e siaimu ba nanadaigu totona tauna, na ini ba hamaoroa toma, baoto, A itaia, Farao ena tuari oreana, oi idurumu totona ema gauna, na be lou laomu, edia tano korikori Aigupto ai.

<sup>8</sup> Bena Kaldea taudia ma bae lou mai, ina hanua bae tuari henia, bae abia, bena lahi amo bae doua.

<sup>9</sup> Iehova na ini e gwau tomamu: Sibomui basio hekoi, basioto “Kaldea taudia na momokani dauhai bae noho”; badina be idia na dauhai basie noho.

<sup>10</sup> Badina be, ena be Kaldea taudia, e tuari hemimuim taudia, edia tuari oreana idoinai boma hadarerea, bona mai berodia taudia sibodia bema noho, ta ta ena kalaga ena kalaga ai, to idia na ben a tore isi, bena ina hanua na lahi ai bema doua.

<sup>11</sup> Kaldea taudia edia tuari oreana na Ierusalem amo vada e raka oho, Farao ena tuari oreana e raka kahira negana ai.

<sup>12</sup> Bena Ieremia na Ierusalem ai e tore isi, Beniamina tanona bainela, unuseni ai ahuna do baine abia, taunimanima bogaragidiai.

<sup>13</sup> Ia na Beniamina Ikoukouna ai, bena hegima tauna ta, ladana Iria, Selemia Hanania natuna, ese peroveta tauna Ieremia e dabaia tao, eto, Oi na Kaldea taudia ediai bo hanaimu.

<sup>14</sup> Ieremia eto, Oi na o koikoimu; lau na Kaldea taudia ediai asina hanaimu. A Iria na se ura baine

kamonai henia; bena ia ese Ieremia e dabaia tao, hanua lohiadia dekedia e laohaia.

<sup>15</sup> Hanua lohiadia ese Ieremia e badu henia lalodika; e dadabaia, bena toretore tauna Ionatan ena rumai e koua, badina be una rumai na dibura rumana ai vada e halaoa.

<sup>16</sup> Ieremia na dibura rumana ai e koua, bena dina hoho unuseni ai e nohova.

<sup>17</sup> Una murinai King Sedekia ese e boiria, bena e abia dae. Hanua pavapavana ese e nanadaia hehuni ena rumai e koua, eto, Hereva ta na Iehova ena amo vada ema a?

<sup>18</sup> Ieremia eto, Oibe. Ma eto, Babulono pavapavana imana ai bae atomu. Ieremia ese danu King Sedekia e hamaoroa, eto, Oi eiava emu hesiai taudia eiava ina bese taudia na ede vada na hadikamui toma dainai dibura rumana ai vada o kougu?

<sup>19</sup> Emu peroveta taudia, e peroveta henimu eto “Babulono pavapavana basinema, oi bona ina tano basine tuari henimui” taudia na edesenai ai?

<sup>20</sup> Pavapava e, egu lohia, mani emu kara a kamonai: egu noinoi, mai hematauraigu ida na gwauraiamu ġauna, na emu ai baine kau; bena toretore tauna Ionatan ena rumai basio siaigu lao lou, unuseni ai baina mase na garina.

<sup>21</sup> Taunabunai King Sedekia e hahedua, bena Ieremia na hegima taudia edia magu ai e koua; bena dina ta ta ai flaoa igabu ta ta e henia, flaoa igabuna taudia edia ariara amo, ela bona hanua flaoana idoinai vada e ore. Taunabunai Ieremia na hegima taudia edia maġu ai e nohova.

*Ieremia na ranu gurina amo e hamauria*

<sup>1</sup> Ieremia ese taunimanima iboudiai e hamaorolaidia herevadia na Sefatia Matan, Gedalia Pasahuru, Iukala Selemia, bona Pasahuru Malkia na e kamonai. Ia eto,

<sup>2</sup> Iehova ini e gwau tomamu: Ina hanua ai baine noho tauna na dare eiava doe eiava daihanai gorerena amo baine mase; a Kaldea taudia dekedia baine raka lasi tauna na baine mauri; ena mauri na kwalimu ahuna ai bainela, bena baine mauri.

<sup>3</sup> Iehova ini e gwau tomamu: Momokani ina hanua na Babulono pavapavana imana ai bae atoa, bena baine abia.

<sup>4</sup> Bena hanua lohiadia ese hanua pavapavana e hamaoroa, eto, Ina tau bae alaia mase be namo, badina be ia ese tuari taudia doini hanua ai e nohomu na imadia e hamanokadiamu, bona tau-nimanima iboudiai imadia danu, unu hereva e hamaorolaidiamu daina. Badina be ina tau ese taunimanima ihanamodia se tahuamu a ihadikadia mo.

<sup>5</sup> King Sedekia eto, A itaia, ia na umui imamui ai; badina be hanua pavapavana ese basine laomui ahu diba.

<sup>6</sup> Taunabunai, idia ese Ieremia e abia, Malkia, hanua pavapavana natuna, ena ranu gurina, hegima taudia edia magu ai, lalonai e tua dobi. Idia ese Ieremia na kwanau amo e tua dobi. Guri na asi ranuna, kopukopu mo; bena Ieremia na kopukopu ai e hepuni.

<sup>7</sup> Ebede-melek, tau Etiopia, hesiai tauna ta pava-pava ena rumai ai, e kamonai idia ese Ieremia na guri lalonai vada e tua dobi. Hanua pavapavana na Beniamina Ikoukouna ai e helava,

<sup>8</sup> bena Ebede-melek na pavapava ena ruma amo ela, hanua pavapavana e hamaoroa, eto,

<sup>9</sup> Pavapava e, egu lohia, ini tatau na vada e kara dika, peroveta tauna Ieremia e kara henia karadia iboudiai lalodiae; idia ese ranu gurina lalonai vada e tua dobi, unuseni ai ia na baine hitolo mase, badina be flaoa taina dia mia hanua ai.

<sup>10</sup> Bena hanua pavapavana ese Ebede-melek, tau Etiopia, e hagania, eto, Ini amo tatau tatoi avabidia, oi ida baola, peroveta tauna Ieremia do se masemu ai na guri amo ba veria dae.

<sup>11</sup> Taunabunai, Ebede-melek ese unu tatau e abidia, bena pavapava ena ruma ela, habou-habou daiutuna ai maua ta lalona amo dabua seadia gunadia bona hahedoki, vada e dika ġaudia, e abi; bena kwanau amo guri lalonai e tudia dobi, Ieremia enai.

<sup>12</sup> Bena Ebede-melek, tau Etiopia, ese Ieremia e hamaoroa, eto, Dabua seadia bona hahedoki na kadidihamu bona kwanau padadiai bavatodia. Ieremia na unu e kara toma.

<sup>13</sup> Bena idia ese Ieremia na kwanau amo e veria dae, guri amo e abia lasi. Bena Ieremia na hegima taudia edia magu ai e nohova.

<sup>14</sup> King Sedekia ese peroveta tauna Ieremia e boiria, Iehova ena dubu iraka-vareaina ihatoina ai e abia dae. Hanua pavapavana ese Ieremia e hamaoroa, eto, Aina nanadaimu, ġau ta egu ai basio hunia.

<sup>15</sup> Ieremia ese Sedekia e haere henia, eto, Bama hamaoromu bena boma alagu mase ani? Bona bama hahealo henimu bena basioma kamonai henigu.

**16** Bena King Sedekia ese Ieremia e gwau henia hamata hehuni, eto, Iehova, laumada e karadia Diravana, na e maurimu heğereğeren, lau ese basina alamu mase eiava emu mauri iabi-ohona dalana e tahuamu taudia imadia ai basina atomu.

**17** Bena Ieremia ese Sedekia e hamaoroa, eto, Ğaubada Iehova Sabaota, Israel Diravana, na ini e gwau tomamu: Babulono pavapavana ena lohia taudia ediai boma hahemanau, bena idia ese bae hamaurimu; ina hanua danu lahi amo basie doua, bona oi bona emu rumा taudia na ba mauri.

**18** A hari Babulono pavapavana ena lohia taudia ediai basioma hahemanau, bena ina hanua na Kaldea taudia imadia ai baine heato; bena idia ese lahi amo bae doua, bona oi na idia imadia amo basio roho mauri.

**19** King Sedekia ese Ieremia e hamaoroa, eto, Iuda taudia Kaldea taudia ediai vada e hanai na garidia na garimu, idia imadia ai bae atogu bena idia ese bae hadikagu na garina.

**20** Ieremia eto, Idia imadia ai basie atomu. Iehova gadona hari na hamaorolaimumu na ba badinaia, bena ba namo, emu mauri na basie abia oho.

**21** A hahemanau basioma ura, Iehova ese ina mata-hanai vada e henigu:

**22** A itaia, Iuda pavapavana ena rumা ai doini e nohomu hahinedia na e hakaudia lasimu, Babulono pavapavana ena lohia taudia dekediai; bena hahine na e tomu:

Turamu, o abidadama henidia taudia, ese vada e koimu,  
 bona vada e hadareremu;  
 oi aemu na kopukopu ai vada e hepuni dainai,  
 idia na emu amo e raka ohomu.

<sup>23</sup> Adavamu bona natumu iboudiai na Kaldea taudia dekedia bae hakaudia lasi; bona oi danu idia imadia amo basio roho mauri, a Babulono pavapavana ese baine dabaimu tao; bena ina hanua na lahi amo bae doua.

<sup>24</sup> Bena Sedekia ese Ieremias e hamaoroa, eto, Ini hereva na tau ta basio hadibalaia, bena basio mase.

<sup>25</sup> Hanua lohiadia bema kamonai lau na oi ida vada ta hereva-hereva, bena bae vasi, bae nanadaimu, baeto “A hamaoromai, hanua pavapavana ede o hamaoroa toma bona hanua pavapavana ese ede e hamaoromu toma; ġau ta emai ai basio hunia, bena basia alamu mase”.

<sup>26</sup> Bena oi ese ba haere henidia, baoto “Hanua pavapavana na noia mai manaugu ida, ia ese Ionatan ena rum a basine siaigu lao lou, unuseni ai baina mase na garina”.

<sup>27</sup> Bena hanua lohiadia iboudiai na Ieremias dekena ela, e nanadaia; bena ia ese e haere henidia, hanua pavapavana ese vada e hagania heğereğerena. Taunabunai, idia ese ia ihereva-henina e hadokoa; badina be tau ta ese unu hereva asie kamonai.

<sup>28</sup> Bena Ieremias na hegima taudia edia mağu ai e nohova, ela-bona Ierusalem e abia dinana.

## 39

### *Iereusalem e daea*

<sup>1</sup> Sedekia, Iuda pavapavana, ena lohia lağanina ihataurahani-tana huana ihagvautana lalonai, Nebukadresara, Babulono pavapavana, bona ena tuari oreana idoinai ese Ierusalem e daea bona e koua heğeğe;

<sup>2</sup> bena Sedekia ena lohia lağanina ihagwaut-tana huana ihahanina dinana ihataurahani-tana ai, hanua maguna e gwadaia uru.

<sup>3</sup> Ierusalem e abla negana ai, Babulono pava-pavana ena lohia taudia iboudiai ema, bogaragi ikoukouna ai e helai: Neregala-saresere, Samagara-nebo, Sarasekimi (ena dagi be Rab-sarisi), Neregala-saresere (ena dagi be Rabmaga), bona Babulono pavapavana ena tuari lohiadia oredia iboudiai.

<sup>4</sup> Sedekia, Iuda pavapavana, bona tuari tau-dia iboudiai ese e itadia negana ai, idia na e heau; hanuaboi ai hanua e rakatania pavapava ena uma-uma bogaragina amo, bena magu ruaosi padadia ikoukouna amo e raka lasi, Araba dalana ai ela.

<sup>5</sup> A Kaldea tuari oreana ese e hahavadia; bena idia ese Sedekia e lasia tao Ieriko taoradia ai. E abia mauri, bena Nebukadresara, Babulono pava-pavana, dekena e laohaia, Ribla ai, Hamat tanona ai; bena ia ese ena kerere ahuna e gwauraia.

<sup>6</sup> Bena Babulono pavapavana ese Sedekia natuna mamaruanedia na ia vairanai e aladia mase, Ribla ai; Babulono pavapavana ese danu Iuda lohiadia iboudiai e aladia mase.

<sup>7</sup> Bena ia ese Sedekia matana e hakepuludia, bona auri gadeadia ai e ġuia, Babulono baine lao-haia totona.

<sup>8</sup> Kaldea taudia ese pavapava ena rum a doua, bona taunimanima edia rum a danu e dou, bona Ierusalem maguna e ġiġia dobi.

<sup>9</sup> Bena Nebusaradana, hegima oleana biaguna, ese taunimanima oredia dounu hanua ai nonoho na e laohaidia, Babulono ai e hanohodia, ienai e

hanai taudia bona taunimanima oredia danu.

<sup>10</sup> Nebusaradana, hegima oreana biaguna, ese ogōgami taudia haida, asi edia kohu taudia, na Iuda tanona ai e rakatanidia, bona una negana ai vine imeadia bona biru tanodia e henidia.

*Nebukadresara ese Ieremia e bogaia hisi*

<sup>11</sup> Nebukadresara, Babulono pavapavana, na Nebusaradana, hegima oreana biaguna, ena amo e hahegani, Ieremia dainai, eto,

<sup>12</sup> Avabia, ba naria namonamo, basio hadikaia, a ia ese baine hamaorolaimui hegeregerena ai ba kara henia.

<sup>13</sup> Taunabunai, Nebusaradana, hegima oreana biaguna, bona Nebusasabana, Rabsarisi tauna, bona Neregala-saresere, Rabmaga tauna, bona Babulono pavapavana ena tuari lohiadia badadia iboudiai na

<sup>14</sup> e hesiai, Ieremia na hegima taudia edia magu amo e abia. Idia ese Gedalia, Ahikama Safana natuna, imana ai e atoa, iena rum a baine laohaia totona. Taunabunai ia na taunimanima bogaragidai e nohova.

*Iehova ese Ebede-melek e hanamo*

<sup>15</sup> Ieremia na hegima taudia edia magu ai e hekouva negana ai, Iehova ena hereva na ienai e kau, eto,

<sup>16</sup> Aola, Ebede-melek, tau Etiopia, ba hamaoroa, baoto, Iehova Sabaota, Israel Diravana, na ini e gwau tomamu: A itaia, egu hereva baina hamomokanidia, ina hanua ihadikana ai, baina hadikaia, basina hanamo. Una dina ai egu hereva anidia do bae vara oi vairamu ai.

<sup>17</sup> A Iehova na e tomu: Una dina ai lau ese baina hamaurimu, o gari henidiamu taudia imadia ai basio heato.

<sup>18</sup> Badina be momokani lau ese baina hamaurimu, dare ai basio mase; a emu mauri bavabia, kwalimu ahuna ai bainela, badina be lau vada o abidadama henigu. Iehova na e herevamu.

## 40

### *Ieremia bona Gedalia*

<sup>1</sup> Nebusaradana, hegima oreana biaguna, ese Ieremia na auri gadeadia ai e ġuia, Ierusalem ai bona Iuda ai e abidia mauri Babulono baine laohaidia totona taudia ida; bena Rama ai ma e ruhaia nege. Una murinai, ina hereva Iehova ena amo na Ieremia enai e kau.

<sup>2</sup> Hari hegima oreana biaguna ese Ieremia e abia, e hereva henia, eto, Iehova, emu Dirava, ese ina dika vada e gwauraia ina gabu latanai;

<sup>3</sup> Iehova ese anina vada e havaraia, ena hereva heġereġerena ai vada e karaia. Badina be umui na vada o kerere Iehova enai, bona ia gadona asio kamonai, una dainai ina kara na latamui ai vada e kau.

<sup>4</sup> A harihari, auri gadeadia na imamu amo na kokidia ohomu, na ruhamu nege, ina dina ai. Boma laloa lau ida Babulono baitala be namo, baitama lao, bena lau ese bama narimu namonamo. A boma laloa lau ida Babulono baitala na dia namo, basitama lao. A itaia, tano idoinai na vairamu ai; edena gabu ilao-henina o haeroamu namo bona maoro na unu baola.

<sup>5</sup> Bema ba-noho, Gedalia, Ahikama Safana natuna, Babulono pavapavana ese vada e dua-naia Iuda hanuadia ikwaradia tauna ai bainela

tauna, dekena ba lou lao, bena ia ida ba noho, taunimanima bogaragidiai; eiava, edena gabu ilao-henina o haeroamu namo na unu baola. Taunabunai, hegima oreana biaguna ese dala lak-wana e henia, bona harihari ġauna ta danu, bena e kahua nege.

<sup>6</sup> Bena Ieremia na Gedalia Ahikama dekena ela, Mispa ai, bena ia ida e nohova, una tano ai dounu nohodia taudia bogaragidiai.

<sup>7</sup> Tano paka ai e nohova oreadia biagudia iboudiai bona edia orea taudia na e kamonai, Babulono pavapavana ese Gedalia Ahikama na tano ikwarana tauna ai vada e halaoa, bona tatau bona hahine mai natudia ida, una tano ogogami-herea taudia Babulono asie laohaidia, na iena heregu ai vada e atodia.

<sup>8</sup> Bena idia na Gedalia dekena ela, Mispa ai: Ismael Netania; Iohanan Karea; Seraia Tanahumete; Efai tau Netofa natuna mamaruanedia, bona Iesania, tau Maakata natuna maruanena; idia bona edia orea taudia danu.

<sup>9</sup> Bena Gedalia, Ahikama Safana natuna, ese idia bona edia orea taudia na e gwau henidia hamata, eto, Kaldea taudia isiaidia ilao-henina basio garillaia. Tano ai ba noho, Babulono pavapavana isiaina ba lao hen, bena vada ba namo.

<sup>10</sup> Lau na Mispa ai baina noho, bena umui daimui ai Kaldea amo dekedai baema taudia vairadiai baina gini. A umui ese vine ranuna bona au-huahua bona dehoru ba habou, emui tohe ai ba baladia hen; bona vada o abi hanuadia ai ba noho.

<sup>11</sup> Una heġereġerena ai, Iuda taudia iboudiai

Moab ai bona Amono taudia bogaragidiai bona Edom ai bona tano haida ai e nohova na e kamonai, Babulono pavapavana ese kwabukwabudia vada e rakatanidia Iuda ai, bona Gedalia, Ahikama Safana natuna, vada e duanaia, idia ikwaradia tauna ai bainela;

<sup>12</sup> bena Iuda taudia iboudiai na vada e luludia lao gabudia iboudiai amo ma e lou mai, Iuda tanona ema, Gedalia dekenai, Mispa ai. Bena idia ese vine ranuna bona au-huahua momo herea e habou.

*Ismael ese Gedalia iala-masena dalana e tahua*

<sup>13</sup> Una negana ai lohanan Karea bona tano paka ai e nohova oreadia biagudia na Gedalia dekena ela, Mispa ai,

<sup>14</sup> e hereva henia, eto, Oi mai dibamu Baalisi, Amono pavapavana, ese Ismael Netania vada e siaia mai oi iala-masemu totona a? A Gedalia Ahikama ese edia hereva se abia dae.

<sup>15</sup> Bena Iohanan Karea ese Gedalia e hereva henia hehuni Mispa ai, eto, Mani ainala, Ismael Netania baina alaia mase, bena tau ta basine diba. Anina be dahaka ia ese oi baine alamu mase, bena Iuda taudia oi dekemu ai vada e hebou na bae heau karoho, bena Iuda kwabukwabudia bae mase ore?

<sup>16</sup> A Gedalia Ahikama ese Iohanan Karea e haere henia, eto, Una na basio karaia, badina be Ismael o herevalaia koikoimu.

## 41

<sup>1</sup> Hua ihahituna ai, Ismael, Netania Elisama natuna, pavapava iduhuna tauna bona hanua pavapavana ena heitatao tauna badana ta, na

tatau gwauta ida Gedalia Ahikama dekena ema, Mispa ai. Bena Mispa ai e aniani hebouva lalonai,

<sup>2</sup> Ismael Netania bona hari tatau gwauta ia ida na e tore isi; bena idia ese Gedalia, Ahikama Safana natuna, Babulono pavapavana ese tano ikwarana tauna ai e halaoa tauna, na dare amo e tutua gwada, e alaia mase.

<sup>3</sup> Ismael ese Iuda taudia iboudiai Gedalia ida Mispa ai e nohova danu e aladia mase, bona Kaldea tuari taudia hahidaosi unuseni ai danu.

<sup>4</sup> Gedalia iroromana dinana murina dinana ai, tau ta ese sivaraina do se kamonai negana ai,

<sup>5</sup> tatau taurahani-ahui na Sekem bona Silo bona Samaria amo ema. Auki-huidia vada e abi, edia dabua vada e dare, bona kopidia vada e gasidia. Idia ese flaoa boubou ġaudia bona muramura mai bonadia e mailaidia, Iehova ena dubu ai bae her-ahialai totona.

<sup>6</sup> Bena Ismael Netania na Mispa amo e raka lasi mai taina ida, idia ihedavari-henidia totona. Idia ida e hedavari negana ai, ia ese e hamaorodia, eto, Gedalia Ahikama dekenai ba raka vareai.

<sup>7</sup> Bena hanua lalonai e raka vareai negana ai, Ismael Netania mai bamona ida ese e aladia mase, bena ranu habou gurina ta ai e tahodia dobi.

<sup>8</sup> A tatau gwauta idia bogaragidia amo-ese Ismaele hamaoroa, eto, Basio alamai mase, badina be ai na mai emai uit bona bali bona dehoro bona bada-ranuna, uma ai a huni. Taunabunai, ia ese kara e hadokoa, idia mai bamodia ida se aladia mase.

<sup>9</sup> Hari ranu habou gurina, Ismael ese e aladia mase taudia tau-anidia na lalonai vada e tahodia dobi gurina, na guri badana, King Asa ese Baasa,

Israel pavapavana, ena kwalimu ilao-ahuna totona e ġeia ġauna. Ismael Netania ese mase taudia tau-anidia amo e hahonua.

<sup>10</sup> Bena Ismael ese taunimanima oredia Mispa ai na e abidia mauri, hanua pavapavana natuna hahinedia bona Mispa ai e nohova taudia kwabukwabudia iboudiai, Nebusaradana, hegima oreana biaguna, ese Gedalia Ahikama ena heregu ai e atodia taudia iboudiai. Ismael Netania ese e abidia mauri, bena e tore isi, Amono taudia dekediai bae hanai eto.

<sup>11</sup> A Iohanan Karea bona orea biagudia iboudiai ia ida ese Ismael Netania ena kara dikadia iboudiai sivaraidia e kamorlai negana ai,

<sup>12</sup> idia ese edia orea taudia iboudiai e abidia, Ismael Netania ituari-henina ela; bena gohu badana Gibeon ai badibadinai e lasia tao.

<sup>13</sup> Bena Ismael ida ela taudia iboudiai ese Iohanan Karea bona orea biagudia iboudiai ia ida, e itadia negana ai na e moale.

<sup>14</sup> Taunabunai, Ismael ese e abidia mauri Mispa amo e laohaidia taudia iboudiai na e raka lou, Iohanan Karea dekena e lou lao.

<sup>15</sup> A Ismael Netania na Iohanan ena amo e roho mauri, tatau taurahani ida, bena Amono taudia dekedia ela.

<sup>16</sup> Bena Ismael Netania ese Gedalia Ahikama e alaia mase murinai Mispa amo abi-mauridia ai e laohaidia taudia oredia iboudiai na Iohanan Karea bona orea biagudia iboudiai ia ida ese e abidia: tuari taudia, hahine, memero kekeni, bona hesiai taudia, lohanan ese Gibeon amo e hakaudia lou taudia.

<sup>17</sup> Idia na ela, Gerutu Kimuhamu ai e noho, Betelehem kahana ai. Edia lalo-hadai be Aigupto

baela eto,

<sup>18</sup> Kaldea taudia daidiae; badina be e gari henidia, badina be Gedalia Ahikama, Babulono pava-pavana ese tano ikwarana tauna ai e halaoa tauna, na Ismael Netania ese vada e alaia mase.

## 42

### *Ieremia ena gwaukau Iohanan enai*

<sup>1</sup> Tuari oreadia biagudia bona Iohanan Karea bona Asaria Hosaia, bona taunimanima iboudiai, asi dagidia bona mai dagi-badadia taudia, na e raka kahira,

<sup>2</sup> peroveta tauna Ieremia e hereva henia, eto, Emai noinoi bavabia dae; bona Iehova, emu Dirava, ba noia, ini kwabukwabumai daimai ai, badina be ai na orea badana taumai to, o itamaimu, gadoimai mo e rakatanimai.

<sup>3</sup> Iehova, emu Dirava, ese baia rakalaia dalana bona baia karaia karana na baine hadibalaimai.

<sup>4</sup> Peroveta tauna Ieremia ese e haere henidia, eto, Emui hereva vada na kamonai; a itaia, lau ese Iehova, emui Dirava, baina ġuria, emui noinoi heġereġerena, bena Iehova na ede baine haere toma, una na baina hamaorolaimui; ġau ta emui ai basina hunia.

<sup>5</sup> Bena idia ese Ieremia e hamaoroa, eto, Bema Iehova, emu Dirava, ese ai daimai ai baine henimu herevana idoinai heġereġerena ai basia karaia, Iehova ese baine habadelaimai mai maoromaorona bona mai momokanina ida.

<sup>6</sup> Bema hereva namona eiava hereva dikana, to ai ese Iehova, eda Dirava, dekena a siaimumu Diravana, gadona baia badinaia, Iehova, eda Dirava, gadona ibadinana ai baia namo helaoreana.

<sup>7</sup> Dina gwauta e ore ai Iehova ena hereva na Ieremia enai e kau.

<sup>8</sup> Bena ia ese Iohanan Karea bona tuari oreadia biagudia iboudiai, ia ida e nohova taudia, bona taunimanima iboudiai, asi dagidia bona mai dagibadadia taudia, na e boiridia, e hereva henidia,

<sup>9</sup> eto, Iehova, Israel Diravana, dekena o siaigu, daimui ai baina noia totona, Diravana, na ini e gwau tomamu:

<sup>10</sup> Ina tano ai boma noho, bena lau ese baina haginiimui, basina gigimui dobi; baina hadomui, basina ragamui oho; badina be na hadikalaimui karana na helalo kerehailaiamu.

<sup>11</sup> Babulono pavapavana, o gari heniamu tauna, na garina basio gari. Iehova na e tomu, Basio gari henia, badina be lau na umui ida, baina hamaurimui bona ia imana amo baina harohomui mauri totona.

<sup>12</sup> Lau ese baina bogamui hisi; unu amo ia ese danu baine bogamui hisi, bona emui tano korikori ai baine hanohomui.

<sup>13</sup> A boma toma “Ina tano ai basia noho”; Iehova, emui Dirava, boma gwau edeede henia,

<sup>14</sup> boma toma “Lasi, Aigupto tanona baiala, unuseni ai tuari basia itaia, bona kibi ređena basia kamonai, bona basia hitolo, bena unuseni ai baia noho”;

<sup>15</sup> Iuda kwabukwabumui e, Iehova ena hereva ba kamonai. Iehova Sabaota, Israel Diravana, na ini e gwau tomamu: Lalomui boma ha-auka Aigupto ai boma raka vareai bona unuseni ai boma noho,

<sup>16</sup> bena o garilaiamu darena ese unuseni ai, Aigupto tanona ai, baina lasimui tao, bona o gar-

ilaiamu doena ese baine gavamui havara-havara  
ela bona Aigupto; bena unuseni ai ba mase.

**17** Lalodia bae ha-auka Aigupto baela unuseni ai  
bae noho taudia iboudiai na dare eiava doe eiava  
dai-hanai gorerena amo bae mase; asi kwabuk-  
wabuna, asi tauna ta, na lau ese latadiai baina  
hadihoa dikana amo baine roho mauri.

**18** Badina be Iehova Sabaota, Israel Diravana,  
na ini e gwau tomamu: Egu badu bona egu  
badu-garagara na Ierusalem inoholaina taudia  
latadiai na bubu dobi heğereğerenai ai, egu badu-  
garağara na umui latamui ai danu baina bubua  
dobi, Aigupto baola negana ai. Heihi-ihirai, hahe-  
gari, heuduguirai, hegonağonalai ġaudia ai baola.  
Ina gabu na ma basio itaia lou.

**19** Iehova ese vada e hamaoromui, eto, Iuda  
kwabukwabumui e, Aigupto basiola. Ba diba  
momokani, hari ina dina ai vada na sisiba hen-  
imui,

**20** vada o raka siri davana na emui mauri. Bad-  
ina be o siaigu, Iehova, emui Dirava, dekenai, oto  
“Iehova, eda Dirava, ba fiuria ai daimai ai, bena  
Iehova, eda Dirava, ede baine gwau toma na ba  
hamaoromai, bena baia karaia”.

**21** Bena hari dina ai vada na gwaurai henimui, to  
e siaigu baina hamaorolaimui ġauna ta ai Iehova,  
emui Dirava, gadona asio badinaia.

**22** Taunabunai, ba diba momokani, ilao-henina  
bona inoholaina o uramu gabuna ai dare eiava  
doe eiava dai-hanai gorerena amo vada ba mase.

## 43

*Kwabukwabudia na Aigupto ela*

<sup>1</sup> Ieremia ese taunimanima iboudiai e hereva henidia waitani, unu Iehova, edia Dirava, ena hereva iboudiai, Iehova, edia Dirava, ese vada e sialaia herevadia, e gwaurai ore murinai,

<sup>2</sup> Asaria Hosaia bona lohanan Karea bona asi edia hemataurai taudia iboudiai ese Ieremia na e hamaoroa, eto, Oi na o koikoimu. Iehova, eda Dirava, ese se siaimu, seto “Aigupto basiola, unuseni ai basio noho”,

<sup>3</sup> a Baruku Neria ese lalomu vada e hadikaia ai emai ai, Kaldea taudia imadia ai bavatomai totona, bena bae alamai mase, eiava Babulono bae laohaimai, unuseni ai bae hanohomai.

<sup>4</sup> Taunabunai, Iohanen Karea bona tuari oreadia biagudia iboudiai bona taunimanima iboudiai ese Iehova ena hereva, Iuda tanona inoholaina herevana, na asie badinaia.

<sup>5</sup> A Iohanen Karea bona tuari oreadia biagudia iboudiai ese Iuda taudia kwabukwabudia iboudiai, bese idau-idau iboudiai bogaragidiae luludia lao bena ma e lou, Iuda tanona ai ma e nohova, taudia, na e abidia:

<sup>6</sup> tatau, hahine, memero, kekeni, hanua pava-pavana natuna hahinedia, bona Nebusaradana, hegima oreana biaguna, ese Gedalia, Ahikama Safana natuna, dekenai e rakatanidia taudia iboudiai; bona peroveta tauna Ieremia bona Baruku Neria danu.

<sup>7</sup> Bena Aigupto tanona ai e kau; badina be Iehova gadona asie badinaia. Bena Tapanese ai e kau.

<sup>8</sup> Bena Iehova ena hereva na Ieremia enai e kau, Tapanese ai, eto:

<sup>9</sup> Nadi badadia haida imamu ai bavabi, Iuda taudia vairadiai raro-kaka ai ba hunidia, Farao

ena ruma raka-vareaina ariarana ai, Tapanese ai.

<sup>10</sup> Bena ba hamaorodia, baoto, Iehova Sabaota, Israel Diravana, na ini e gwau tomamu: A itaia, lau na baina hesiai, Nebukadresara, Babulono pavapavana, egu hesiai tauna, baina abia; bena ia ese ena terono baine atoa, ini vada na hunidia nadidia latadiai, bona pavapava hahekerukeruna na idia daediai baine haginia.

<sup>11</sup> Ia na bainema, Aigupto tanona baine havahuraia, dai-hanai gorerena enai vada e revadia taudia na dai-hanai gorerena amo baine hamasedia, bona abi-mauri enai vada e revadia taudia na abi-mauri ai baine siaidia lao, bona dare enai vada e revadia taudia na dare amo baine aladia mase.

<sup>12</sup> Ia ese lahi ta baine ha-araia, Aigupto diravadia edia dubu ai; baine doudia bona abi-mauri ai baine laohaidia. Ia ese Aigupto tanona baine hāgoevaia, mamoe iregudia tauna ese ena dabua mai darurana e hagoevaiamu na heto. Bena unu amo ma baine raka oho mai mainona ida.

<sup>13</sup> Heliopolisi, Aigupto tanona hanuana ta, ena nadi-gini pupudia na baine hamakohidia; bona Aigupto diravadia edia dubu na lahi amo baine doudia.

## 44

*Ieremia ese Iuda taudia na*

*Aigupto ai e peroveta henidia*

<sup>1</sup> Ieremia enai e kau herevadia, Iuda taudia iboudiai Aigupto tanona ai e nohova herevadia, bini. Idia na Migdol ai bona Tapanese ai bona Memefisi ai bona Pataro tanona ai e nohova.

<sup>2</sup> Iehova Sabaota, Israel Diravana, na ini e gwau tomamu: Dika idoinai Ierusalem latanai bona

Iuda hanuadiah iboudiai latadiai vada na hadihoa na vada o itaia. A itaia, ina nega ai idia na vada e vahu, asi tauna ta idia lalodiae e nohomu,

<sup>3</sup> edia kara dikadia daidiae. Unu kara amo idia ese e habadugu; badina be idia na ela, muramura mai bonadia e gabu, bona dirava idaudia, idia asi dibadia, umui asi dibamui, bona senemui asi dibadia diravadia, isiaidia e lao hen.

<sup>4</sup> Ģau tamona, egu peroveta hesiae taudiae na siaidia havara-havara dekemui ai, nato, Mani ina kara dika-rohorohona, na inai heniamu ġauna, na basio karaia.

<sup>5</sup> A idia na asie kamonai, taiadia asie kirara, edia kara dika asie rakanaria, bona muramura mai bonadia igabudia dirava idaudia ediae na asie hadokoa.

<sup>6</sup> Taunabunai egu badu-garagara bona egu badu na bubudia dobi, Iuda hanuadiah ai bona Ierusalem ariaradia ai e ara; bena vada e ġaġae bona vada e vahu, ina dina ai heġereġerena.

<sup>7</sup> Harihari Ģaubada Iehova Sabaota, Israel Diraviana, na ini e gwau tomamu: Dahaka dainai ina dika badana o karaiamu, umui sibomui ihadikamui, bena tau bona hahine, mero karukaruna bona meromero, na emui amo eme henege daure, Iuda bogaragina amo, bona kwabukwabumui ta basine noho.

<sup>8</sup> Badina be dahaka imamui ġaukaradia amo o habadugumu? Dahaka dainai muramura mai bonadia o gabudiamu dirava idaudia edia, ina Aigupto tanona, vada o mai henia bona o noholaiamu tanona, lalonai; bena unu amo vada ba henege daure, heuduguirai bona hegonagonalai ġauna ai ba hahelao, tanobada besedia iboudiae

bogaragidiai.

<sup>9</sup> Senemui edia kara dika, Iuda pavapavadia mai adavadia ida edia kara dika, bona umui mai adavamui ida emui kara dika, Iuda tanona ai bona Ierusalem ariaradia ai e karava ġaudia, vada o lalodia boio a?

<sup>10</sup> Ema bona ina dina idia na asie hahemanau, bona asie gari, bona egu taravatu bona egu hia-hedua herevadia, umui bona senemui vairamui ai na ato ġaudia, lalodai asie raka.

<sup>11</sup> Taunabunai, Iehova Sabaota, Israel Diravana, na ini e gwau tomamu: A itaia, vairagu baina ha-aukaia emui ai, ihadikamui totona; Iuda idoinai baina negea daure.

<sup>12</sup> Iuda taudia kwabukwabudia, vairadia vada e ha-aukadia Aigupto tanona baema bona bae noholaia taudia, na baina abidia, iboudiai baina ha-oredia; Aigupto tanona ai bae hekida diho, dare bona doe amo bae mase ore; asi dagidia bona mai dagibadadia taudia na dare bona doe ese bae hamasedia; idia na heihi ihirai bona hahe-gari bona heuduguirai bona heġonaġonalai ġaudia ai baela.

<sup>13</sup> Aigupto tanona ai e nohomu taudia na edia dika davana baina henidia, Ierusalem davana na henia heġereġerena, dare bona doe bona dai-hanai gorerena amo;

<sup>14</sup> taunabunai, Iuda taudia kwabukwabudia Aigupto tanona inoholaina totona; ema taudia, na ta basine heau mauri eiava basine roho mauri eiava Iuda tanona, harihari e uramu bae lou henia, na basine lou lao; badina be basie lou lao, a heau mauri taudia ta ta mo.

<sup>15</sup> Bena dibadia adavadia ese muramura mai bonadia na duava idaudia ediai vada e gabu tau-

dia iboudiai, bona badibadidiai e giniva hahinedia iboudiai, hebou bada-hereana, Pataro ai, Aigupto tanona ai, e nohova taudia iboudiai, ese Ieremia e haere henia, eto,

<sup>16</sup> Hereva ta vada o hamaorolaimai Iehova ladana ai, to ai na basia kamonai henimu.

<sup>17</sup> A vada a gwaurai hamata karadia iboudiai baia kara, muramura mai bonana baia gabua guba pavapavana hahinenen ena, bona inuinu bouboudia baia bubu nege ia ena, a karaia guna heğereğerenen, ai bona senemai, bona emai pava-pava bona emai lohia, Iuda hanuadia ai bona Ierusalem ariaradia ai. Badina be una negana ai, amai aniani na momo, bona namomai na e bada e laova, dika ta asia itaia.

<sup>18</sup> A guba pavapavana hahinenen ena muramura mai bonana igabuna bona ena inuinu bouboudia ibubudia a hadokoa murinai, ai na ġau iboudiai vada e dabu bona dare bona doe ese vada e haoremai.

<sup>19</sup> Hahine ma eto, Ai na muramura mai bonana a gabua, guba pavapavana hahinenen ena, bona inuinu bouboudia a bubu nege ia ena, negana ai, adavamai asie gwau maoro bena ai ese ena ataga a kara latadiai na mai ia laulauna bona inuinu bouboudia a bubu nege ia ena danu a?

<sup>20</sup> Bena Ieremia ese taunimanima iboudiai, tatau bona hahine, unu e haere henia toma taudia iboudiai, na e hereva henidia, eto,

<sup>21</sup> Hari muramura mai bonadia, Iuda hanuadia ai bona Ierusalem ariaradia ai o gabu ġaudia, umui bona senemui, emui pavapava bona emui lohia, bona tano taudia, Iehova ese se laloa tao a? Ia ese se helalolaia une a?

**22** Iehova ena haheauka emui kara havara bona emui kara dika-rohorohodia ediai vada e ore; taunabunai emui tano na vada e ġagae bona vada e vahu, heuduguirai ġauna ai vada ela, asi inoholaina tauna ta, ina dina ai e miamu heġereġerena.

**23** Muramura mai bonadia o gabu dainai, bona Iehova o kara dika henia bona Iehova gadona asio badinaia bona ena taravatu bona ena hahedua herevadia bona ena haheġani lalodaias asio raka dainai, ina dika na latamui ai vada e kau, ina dina ai heġereġerena.

**24** Ieremia ese taunimanima iboudiai bona hahine iboudiai e hamaorodia, eto, Iuda taumui Aigupto tanona ai o nohomu iboumui ai, Iehova ena hereva ba kamonai.

**25** Iehova Sabaota, Israel Diravana, na ini e gwau tomamu: Umui bona adavamui ese udumui amo vada o gwauraia bona imamui amo vada o karadia, oto “Ai na momokani emai gwauhamata karadia baia kara, guba pavapavana hahinenen ena muramura mai bonaula baia gabua bona inuinu bouboudia baia bubu nege”. Benaini, emui gwauhamata ba hamomokanidia bona karadia ba kara.

**26** Taunabunai, umui Iuda taumui Aigupto ai o nohomu iboumui ai, Iehova ena hereva ba kamonai. Iehova na e tomu: A itaia, lau ladagu herea-daena bagunai vada na gwau hamata auka, Aigupto tanona idoinai Iuda tauna ta ese uduna amo lau ladagu basine hahanea, basinetu “Gaubada Iehova e maurimu heġereġerena”.

**27** A itaia, lau ese na itadia taomu, dika ihavarana dainai, dia namo ihavarana dainai. Iuda taudia iboudiai Aigupto tanona ai na dare

bona doe ese bae ha-oredia, ela bona bae ore vaitani.

<sup>28</sup> Bena dare amo bae roho mauri taudia na Aigupto tanona amo bae lou lao, Iuda tanona baela, a gadoidia mo; bona Iuda taudia kwabuk-wabudia iboudiai, Aigupto tanona ema bena e noholaia taudia iboudiai, na bae diba daika ena hereva baine gini, lauegu eiava idia edia.

<sup>29</sup> Iehova na e tomu: Toana binai emui ai, emui dika davana baina henimui ina gabu ai, bena ba diba lauegu hereva na bae gini, umui ihadikamui totona.

<sup>30</sup> Iehova ini e gwau tomamu: A itaia, lau ese Farao Hofra, Aigupto pavapavana, na inaina imadia ai bona ena mauri iabi-ohona dalana e tahuamu taudia imadia ai baina atoa, Sedekia, Iuda pavapavana, na Nebukadresara, Babulono pavapavana, ana inai tauna bona ena mauri iabi-ohona dalana e tahuava tauna, imana ai na atoa heğereğerena.

## 45

### *Ieremia ena gwaukau Baruku enai*

<sup>1</sup> Iehoiakim, Iuda pavapavana Iosia natuna, ena lohia laginanina ihahanina lalonai, Ieremia ese ini hereva e gwaurai, bena Baruku Neria ese buka ta ai e toredia. Una negana ai peroveta tauna Ieremia ese Baruku Neria ini e hereva henia toma, eto,

<sup>2</sup> Baruku e, Iehova, Israel Diravana, ese ini e hereva henimu tomamu:

<sup>3</sup> Oi oto “Madi ihabaigu, badina be Iehova ese egu hisihisi latanai lalo-hisihisi ma vada e atoa

kau; vada na ġanaġana ema bona name hesiku, bona laġa-ani taina asiname davaria”.

<sup>4</sup> Ini ba hereva henia toma, baoto, Iehova ini e gwau tomamu: A itaia, vada na haginia ġauna na ġigja dobimu, bona vada na hadoa ġauna na ragaia ohomu: ġauna be tano idoinai.

<sup>5</sup> A oi ese ġau hereadia o tahudiamu sibomu emu a? Iehova na e tomu: Basio tahudia; badina be lau ese dika na havaraiamu, taunimanima iboudiai latadiai; a emu mauri baina herumu, kwalimu ahuna ai bainela, ba lao heni gabudia iboudiai lalodliai.

## 46

### *Peroveta herevadia Aigupto latanai*

<sup>1</sup> Iehova ena hereva na peroveta tauna Ieremia enai e kau, bese idauidau daidiae.

<sup>2</sup> Aigupto herevana, Farao Neko, Aigupto pavapavana, ena tuari oreana dainai; Karakemisi ai e taruhava, Eufrate sulavaina isena ai, bena Nebukadresara, Babulono pavapavana, ese e hadarerea, Iehoakim, Iuda pavapavana Iosia natuna, ena lohia laġanina ihahanina lalonai.

<sup>3</sup> Keme aurina bona kesi avabi hata,  
tuari baola!

<sup>4</sup> Hosi kohudia a kwatu;  
hosí-gui taumui e, a gui!  
Ta ta ena gabu ena gabu ai ba gini,  
mai emui auri kwara ġaudia ida;  
emui io ba hakimore-kimoredia,  
emui auri hahedokidia ba hedokilai!

<sup>5</sup> Iehova na e tomu,  
Dahaka dainai vada na itaia?  
Kudoudia vada e hetaha,

- vada e raka lou.  
 Edia tuari taudia vada e darere,  
     vada e heau haraga-haraga;  
 asie roha murimu,  
     gari na gabu iboudiai.\*  
 6 Heau haraga taudia na asi heau mauri dibadia,  
     tuari tauna na asi roho mauri dibana;  
 mirigini kahana ai, Eufrate sinavaina badibadi-  
     nai,  
     vada e hetutuhi, vada e hekida diho.
- 7 Ina be daika, Nilo sinavaina na heto e daemu,  
     abatadia e lasimu sinavaidia na heheto?  
 8 Aigupto na e daemu, Nilo sinavaina na heto,  
     abatadia e lasimu sinavaidia na heheto.  
 Ia eto, Aina tore isi, tanobada baina habubunia,  
     hanua badadia baina habuadia tari,  
     mai inoholaidia taudia ida.  
 9 Hosi e, a heau vaira!  
     Kariota e, a heau lalo-dika!  
 Tuari taudia na bae raka lasi,  
     Etiopia bona Put taudia, mai kesidia,  
     Lud taudia, peva ai mai diudia.  
 10 Una dina na Ģaubada Iehova Sabaota ena dina,  
     dika davana ihenina dinana,  
     inaina davadia baine henidia totona.  
 Dare ese baine anidia, bogana baine kunu,  
     raradia baine inu lalo-dika.  
 Badina be Ģaubada Iehova Sabaota ese boubou  
     karana e karaiamu,  
     mirigini kahana tanona ai, Eufrate sinavaina  
     badibadinai.  
 11 Aigupto hane-ulato rami-hebouna e!

---

\* **46:5** Apisi na Aigupto taudia edia dirava ta, ita-itana na boro-makau maruanena na heto.

Gilead baola, dahudahu muramurana bavia.

Muramura momo o gaukaralaidia kava,  
a asi ihanamomu dalana ta.

<sup>12</sup> Bese idau-idau ese emu hemarai sivaraina vada  
e kamonai,

tanobada na emu tai ai vada eme honu.

Badina be tuari tauna ta na tuari tauna ma ta ida  
e hetata heheni,  
bena raruosi e keto bou.

<sup>13</sup> Iehova ese peroveta tauna Ieremia e hereva  
henia, Nebukadresara, Babulono pavapavana,  
ese Aigupto tanona ituari-henina bainema here-  
vana, eto:

<sup>14</sup> Aigupto ai ba herevalaia, Migdol ai ba gwauraia,  
Memefisi ai bona Tapanese ai ba gwauraia  
hedinarai;  
baoto “Ba gini hata, ba hegaegae,  
badina be dare ena ala-ala ese baine ha-  
hegegemu dae”.

<sup>15</sup> Dahaka dainai Apisi vada e heau?

Dahaka dainai emu boromakau maruanena  
na se gini?

Badina be Iehova ese e doria dobi dainai.

<sup>16</sup> Emu hutuma na e hetutuhi, e keto,  
e hereva heheni, eto

“A tore isi, eda bese korikori bona eda vara tanona  
baita lou henidia,  
dağedağe tauna ena dare dainai”.

<sup>17</sup> Farao, Aigupto pavapavana, ladana ba hatoa  
“Hereva momo tauna, nega e reiamu tauna”.

<sup>18</sup> Pavapava badana, ladana Iehova Sabaota, na e  
tomu:

Lau na maurimu heğereğerena, ta bainema,

Taboro ororona ororo badadia bogaragidiai na  
heto,  
bona Karamele ororona, davara badibadinai,  
na heto.

<sup>19</sup> Aigupto inoholaina taumui e!  
Emui abikau kohudia ba habou hegaegae,  
dauhai bae laohaimui dainai.  
Badina be Memefisi baine vahu,  
hanua ahutuna ai bainela, asi inoholaina ta.

<sup>20</sup> Aigupto na boromakau hahinena matamatana  
mai hairaina,  
a kahuhu ta mirigini kahana amo na ia la-  
tanai vada e kau.

<sup>21</sup> Ena tuari taudia, e vatudia taudia, na  
boromakau natudia, ubu-ubu ġaudia, na  
heheto,  
ia bogaraginai.

Oibe, vada e kerehai, vada e heau hebou, asie gini,  
badina be edia hahehisidinana na ediai vada  
e kau,  
edia dava-abi negana.

<sup>22</sup> Ia reġena na gaigai e rau ohomu reġena na heto,  
badina be ia inaina na mai goadadia ida e  
raka e maimu;  
idia na mai iradia ida ia ihadikana totona e mai  
nu,  
au e hagaridiamu taudia na heheto.

<sup>23</sup> Iehova na e tomu:  
Ena be ena uda na basie tuia hanai diba, to  
bae segaia;  
badina be idia na hutuma herea, kwadi edia  
hutuma e hereadiamu,  
ta basine duahidia diba.

<sup>24</sup> Aigupto hane-ulatona na bae hahemaraia,

mirigini kahana amo baema besena imadia ai  
bae atoa.

<sup>25</sup> Iehova Sabaota, Israel Diravana, eto: A itaia,  
Amon, Tebe diravana, bona Farao, bona Aigupto  
tanona mai diravana bona pavapavana iboudiai  
ida, edia dika davadia baina henidia, Farao la-  
tanai bona ia e abidadama heniamu taudia lata-  
dai.

<sup>26</sup> Edia mauri iabi-ohona dalana e tahuamu tau-  
dia imadia ai baina atodia, Nebukadresara, Bab-  
ulono pavapavana, bona ena lohia taudia imadia  
ai. Gabeamo Aigupto na bae noholaia, nega guna-  
dia ai heğereğerena. Iehova na e herevamu.

<sup>27</sup> Egu hesiai tauna Iakob e, basio gari!  
Israel e, kudoumu basine hetaha!  
A itaia, dauha amo baina hamaurimu,  
bona garamu danu iğui ai e nohomu tanodia  
amo baina hamauridia.  
Iakob baine lou, asi reğeregena baine lağā ani,  
bona ta ese basine hagaria.

<sup>28</sup> Iehova na e tomu:  
Egu hesiai tauna Iakob e, basio gari!  
Badina be lau na oi ida.  
Bese iboudiai baina ha-oredia vaitani,  
hari dekedia na lulumu lao besedia;  
a oi na basina ha-oremu vaitani.  
Dika davana korikorina baina henimu;  
momokani, matamu ihakanina basina reaia.

## 47

*Peroveta herevana Filistia taudia latadai*

<sup>1</sup> Farao ese Gasa do se habuaia tari negana ai,  
Iehova ena hereva

na peroveta tauna Ieremia enai e kau, Filistia  
taudia daidiae.

<sup>2</sup> Iehova ini e gwau tomamu:

A itaia, mirigini kahana amo ranu na e  
daemu,

bena abata na baine lasi;

tano na baine utua dae, bona latana ġaudia  
iboudiae danu,

hanua badana danu, mai inoholaina taudia  
ida.

Taunimanima na bae lolo,

tano inoholaina taudia iboudiae na bae tai  
lolololo.

<sup>3</sup> Ena hosi mamaruanedia aedia e pana dagumu  
reġedia daidiae,

ena kariota edia heau bona ava-keikeidia  
reġedia daidiae,

tama ese natudia asie roha kerehai henidiamu,  
imadia e manoka-manoka hereamu dainai;

<sup>4</sup> badina be hahebua-tari dinana na e maimu,  
Filistia taudia iboudiae ihabua-taridiae;

bona Turo bona Sidono ikahadia taudia orediae  
iboudiae na bae negedia daure.

Badina be Iehova ese Filistia taudia e habuadiae  
tarimu,

Kaftoro konena taudia kwabukwabudiae.

<sup>5</sup> Gasa kwarana e naua,

Askelono vada e mase.

Anakimi taumui kwabukwabumui e!

Sibomui ba heiva ela bona edena nega ai?

<sup>6</sup> Iehova ena dare e!

Edena nega ai asi regeregemu ba noho?

Pauamu ai ba heuda,

ba laġa ani, basio marere-marere.

<sup>7</sup> Iehova ese e haduaimu negana ai,

asi reğereğena baine noho dalana be edena?  
 Ia ese vada e duanaia,  
 Askelono bona kone kahadia baine hadikadia.

## 48

### *Peroveta herevadia Moab latanai*

<sup>1</sup> Moab herevana. Iehova Sabaota, Israel Diravana, na ini e gwau tomamu:  
 Nebo madi ihabaina, badina be vada e havahua!  
 Kiriataimi vada e hahemaraia, vada e abia;  
 kohoro vada e hahemaraia, vada e ġigia dobi;  
<sup>2</sup> Moab harina namona vada e boio.  
 Hesebon ai ia ihadikana e henegalaia, eto,  
 “Aoma, basileia dagina amo baita negea  
 daure”.  
 Oi danu, Madmene, udumu bae koua,  
 dare ese baine hahavamu.

<sup>3</sup> A hakala! Taitai Horonaimi amo:  
 “Hahevahu bona hahebua-tari bada-herea!”  
<sup>4</sup> Moab vada e habuaia tari;  
 taitai na e hekamonaimu ela bona Soara.  
<sup>5</sup> Badina be Luhiti e dae heniamu dalana ai,  
 idia na mai taidia ida e dae laomu,  
 bona Horonaimi e hekei heniamu dalana ai,  
 hahebua-tari taitaina vada e kamonai.  
<sup>6</sup> A heau, sibomui maurimui ba tahua!  
 Tano ġaġaena ai ba noho, uda donikina na  
 heto!  
<sup>7</sup> Badina be, emui gabu aukadia bona emui kohu o  
 abidadama henidia dainai,  
 umui danu bae abimui.  
 Kemoso\* danu bainela, dauhai bae hanohoa,

---

\* **48:7** Kemoso na Moab taudia edia dirava.

mai ena hahelaḡa taudia bona ena lohia tau-dia ida.

<sup>8</sup> Hahebua-tari tauna na hanua iboudiai latadiai baine kau,  
hanua ta basine roho mauri.

Koura na baine vahu,  
bona taora na baine hahebua tari,  
Iehova vada e hereva heḡereğerena.

<sup>9</sup> Moab na hanina ba henia,  
badina be e uramu baine roho lao;  
ena hanua loḡora bae vahu,  
asi inoholaidia bae mia.

<sup>10</sup> Iehova ena ġaukara na mai Iahedona ida e karaiamu tauna bae uduguiraia; ena dare na rara ihahebubuna amo e ruamu tauna na bae uduguiraia.

<sup>11</sup> Moab na merona negana amo vada e noho namonamo,  
vine ranuna asi nurinurina na heto;  
hodu ta amo hodu ta ai asie vedaa,  
bona dauhai asie hanohoa;  
taunabunai ia mamina na doini lalonai e miamu,  
bona bonana na se idaumu.

<sup>12</sup> Taunabunai Iehova na e tomu: A itaia, dinana be maimu lau ese ihaegena taudia na ia dekena baina siaidia lao; bena idia ese bae haegea, ena hodu anidia bae bubu ore, bona ena hodu bae hamakohidia.

<sup>13</sup> Bena Moab ese Kemoso hemaraina baine hemarai, Israel iduhuna ese Betele, edia heabidadama, hemaraina e hemaraiva heḡereğerena.

<sup>14</sup> Dahaka dainai o tomu “Ai na haheauka taumai bona tuari taumai mai goadamai” a?

**15** Pavapava badana, ladana Iehova Sabaota, na e  
tomu:

Moab mai ena hanu logora ida ihabua-taridia  
tauna vada e dae ema,  
bona ena eregabe taudia herea-daedia na  
mase ai vada e diho lao.

**16** Moab ena hahehisu vada eme kahikahi,  
bona ena hisi-ani e mai haragamu. q1

**17** Ia taina ba tai, o nohoa hegegemu taumui  
iboumui ai,  
bona ia ladana mai dibamui taumui iboumui ai,  
baoto “Dagi auna herea-daena, au mai  
hairaina,  
madi vada e kwaidu”.

**18** Dibon inoholaina taumu e!

Hairaimu amo a diho, tano haura-haurana ai  
ba helai.

Badina be Moab ihabua-tarina tauna vada ema, oi  
ihadikamu totona;  
emu gabu aukadia vada e habuadia tari.

**19** Aroere inoholaina taumu e!

Dala isena ai ba gini, ba gima,  
heau tauna bona roho-mauri hahineni ba  
nanadaidia,  
baoto “Edeheto?”

**20** Moab vada e hahemaraia, badina be vada e  
makohi.

A lolo, a tai!

Aranon badibadinai ba gwauraia, baoto  
“Moab vada e vahu”.

**21** Hahemaoro na atai taorana ai vada e kau,  
Holon, Iahasaha Mefata,

**22** Dibon, Nebo, Bete-diblataimi,

**23** Kiriataimi, Bete-gamulu, Bete-meono,

<sup>24</sup> Kerioto, Bosra, bona Moab tanona hanuadia iboudiai, daudaudia bona kahikahidia, latadiai.

<sup>25</sup> Moab ena doa vada e utua oho, bona imana vada e kwaidu. Iehova na e herevamu.

<sup>26</sup> Ba hakekeroa; badina be ia na sibona e hahebada, Iehova e hamarağıa. Taunabunai, Moab na sibona ena mumuta ai baine hekui-hekui; taunimanima ese bae kirihrlaia.

<sup>27</sup> Israel na so kirikirilaia a? Henao taudia bogaragidai o davarria, bena o herevalaia negadia iboudiai kwaramu o haladoladoa a?

<sup>28</sup> Moab inoholaina taumui e!

Hanua ba rakatanidia, haga nadina ai ba noho,

koura dobudobu hagahagadia ai ena rumu e karaiamu punena na heto ba noho.

<sup>29</sup> Moab ena heağı sivaraina vada ta kamonai;

ia na e heağı dikadikamu;

ena heabi-isi, ena heağı, ena hekokoroku, na dibada,

bona lalona ena hedadarai danu.

<sup>30</sup> Iehova na e tomu:

Ena ere-dağedage dibagu;

ena hekokoroku herevadia na kokoikoi,

ena kara danu kokoikoi.

<sup>31</sup> Taunabunai, Moab taina na taimu,

Moab idoinai dainai na tai lolomu,

Kuri-here taudia daidiae na taimu.

<sup>32</sup> Sibma vinena e!

Oi na tailaimu badamu, lasere na tailaia marağımu.

Oi rigimu ese davara e hanaia,

ela bona lasere ai e kau;

emu au huahuadia bona emu vine huahuadia na vada e habuadia tari.

<sup>33</sup> Moab tanona, huahua momo tanona, amo  
lalo-namo bona moale vada e abi oho.

Lau ese vine ranuna vada na hadodoa, vine itao-  
laina gabuna ai;  
asi tauna ta ese e moimoilaiamu mai moale  
lolona ida,  
lolo na dia moale lolona.

<sup>34</sup> Hesebon bona Eleale e taimu; gadodia e  
daemu ela bona Iahaha, bona Soara amo ela bona  
Horonaimi bona Eglata-selisia. Badina be Nimiri-  
imi ranudia vada e kororo.

<sup>35</sup> Iehova na e tomu: Moab ai atai gabuna ai  
boubou karadia e karamu bona muramura mai  
bonana na ena dirava e gabu heniamu tauna na  
baina hadokoa.

<sup>36</sup> Taunabunai lalogu na e taimu ivilikou na  
heto, Moab dainai; bona lalogu na e taimu ivilikou  
na heto Kiri-here taudia daidiae; una dainai e  
habou kohudia na vada e ore.

<sup>37</sup> Badina be kwara iboudiai bae nau, bona auki  
iboudiai huidia bae abi; ima iboudiai bae hegasi,  
bona koekoe ai puse dabuadiah bae herio.

<sup>38</sup> Moab rumadia iboudiai guhidia ai bona  
hanua ariaradia ai e herohe ahumu, badina be  
Moab vada na huaria, ta ese se balaia henimu  
hoduna na heto. Iehova na e herevamu.

<sup>39</sup> Madi, vada e makohi! Madi ihabaidia, e tai  
lolololomu! Moab madi, ena hemarai dainai vada  
e gini muri! Taunabunai Moab na e kirikirilaiamu  
bona e garilaiamu ġauna ai vada e hahelao, e noho  
hetabiramu taudia ediae.

<sup>40</sup> Badina be Iehova ini e gwau tomamu:  
A itaia, ta baine roho haraġa-haraġa, ugava na heto,

hanina baine toi roro, Moab ihadikana tottona;

**41** hanua na bae abidia,  
bona gabu aukadia bae dadi.

Una dina ai Moab ena tuari taudia lalodia na  
e hekamonaimu hahinena lalona  
heğereğerena ai baela.

**42** Moab na bae habuaia tari, basie gwauraia lou  
bese ta;  
badina be ia sibona e hahebada, Iehova e  
hamarağıa.

**43** Moab inoholaina taumu e!  
Lağaga bona hedai-dobi gurina bona idoa na  
vairamu ai.

Iehova na e herevamu.

**44** Mai lağagana ġauna amo baine heau oho tauna na  
hedai-dobi gurina lalonai baine moru,  
bona guri lalona amo baine hekamo dae tauna na  
idoa ese baine idoaia.

Badina be lau ese ini ġau na Moab latanai baina  
hadihoa,  
edia dika davarta iabina lağanina ai.  
Iehova na e herevamu.

**45** Hesebon ikerukeruna ai  
heau taudia na e ginimu,  
edia goada na vada e ore;  
badina be lahi na Hesebon amo vada e lasi,  
lahi hururu-hururuna Sihon ena rumu amo;  
Moab baguna vada e huaria,  
bona heloġo-heloġo taudia kwaradia tubuadia  
danu vada e huaridia.

**46** Moab e, madi ihabaimu!  
Kemoso ena orea taudia vada e baia;  
badina be natumu mamaruanedia vada e ġuidia,

bona natumu hahinedia na iǵuidia ai vada e  
laohaidia.

**47** Moab ena noho ma baina hanamo lou,  
dina gabedia ai.

Iehova na e herevamu.  
Hahemaoro Moab latanai herevadia bunu.

## 49

*Peroveta herevadia Amono taudia latadiai*

**1** Amono taudia herevadia. Iehova ini e gwau  
tomamu:

Israel na asi natuna maruanena a?  
Ia na asi dihina a?

Matona, badina be dahaka Milkom\* ese Gad vada  
e lahea oho,

bona iena taunimanima ese hanuadia vada e  
noholaidia?

**2** Taunabunai, Iehova na e tomu:

Negana be maimu,  
lau ese haida baina hagoadadia, bena bae hone,  
Raba, Amono taudia edia hanua, bae hare  
henia.

Ia na senu ǵaǵaena ai bainela,  
bona ena hanua maraǵidia na lahi amo bae  
doudia;

bena Israel e lahea oho taudia na  
Israel ese ma baine lahedia oho.  
Iehova na e herevamu.

**3** Hesebon e, ba tai, badina be Ai vada e havahua!  
Raba hahinemui e, a tai!

Puse dabuadia ba rio,  
ba herohe ahu, ba tai hekakasi.  
Badina be Milkom na bae laohaia, tano  
idauna ai bae hanohoa,

---

\* **49:1** bona Milkom be Amono taudia edia dirava ladana.

mai ena hahelaḡa taudia bona ena lohia taudia  
ida.

<sup>4</sup> Kara hebeatai kekenimu e!  
Emu taḡa o abidadama henia, oto  
“Daika na lau ihadikagu bainema?”  
O, badina be dahaka emu koura o heāgilaidiamu?

<sup>5</sup> Gaubada Iehova Sabaota na e tomu:  
A itaia, laḡaḡa na latamui ai baina hadihoa,  
e ġeġemui dae taudia iboudiai edia amo;  
bae lulumui lasi, ta ta ena dala ena dala ai bae  
heau,  
bona ta ese heau taudia basine gogodia lou.

<sup>6</sup> Iehova na e tomu: A gabeamo Amono taudia  
edia noho-namo baina havaraia lou.

*Peroveta herevadia Edom latanai*

<sup>7</sup> Edom herevana. Iehova Sabaota ini e gwau  
tomamu:  
Aonega vada e ore Teman ai a?

Lalo-parara taudia ediai hahealo vada e doko  
a?

Edia aonega vada e boio a?

<sup>8</sup> Dedan inoholaina taumui e!  
A heau, a lou, dobu gabudia ai ba noho.  
Badina be Esau ena hisihisi na ia latanai baina  
hadihoa,  
bona ena dika davana iabina negana danu.

<sup>9</sup> Vine huahuadia ihaboudia taudia bema vasi,  
idia ese vine abitanidia bema rakatani ani?  
Henao taudia na hanuaboi ai bema mai,  
idia ese edia ura ġaudia mo bema abi ani?

<sup>10</sup> A lau ese Esau ena vada na dadi ore,  
ena komu gabudia vada na hulalai;  
ia na asi ena komu dalana.  
Ia natuna vada e aladia ore,

tadikakana bona dekena taudia danu;  
ia na vada e ore.

**11** Emu ihareha ba rakatanidia, lau ese baina  
hamauridia;  
emu vabu ese lau bae abidadama henigu.

**12** Badina be Iehova ini e gwau tomamu: Bema  
basiema inua taudia ese kehere bae inua, oi na  
dika davana basio abia a? Dika davana basio  
reiaia, a vada ba inua.

**13** Iehova na e tomu: Badina be sibogu ladagu  
ai vada na gwau hamata, Bosra na hahegari bona  
hegonāgonalai bona hahevahu bona heuduguirai  
ḡauna ai bainela; bona ena hanua iboudiai na bae  
vahu hanaihanai.

**14** Hari ta Iehova ena amo vada na kamonai,  
bona gwaukau tauna ta vada e siaia lao,  
bese idau-idau bogaragidiai, e tomu  
“A hegogo, ia ihadikana totona baoma,  
a tore isi, ba tuari”.

**15** Badina be lau ese bese idau-idau bogaragidiai  
baina hamaraḡimu,  
taunimanima ese bae dadaraimu.

**16** Emu hahegari karadia ese vada e koimu,  
bona lalomu ena heaḡi danu.

Haga nadidia kohuadia ai o nohomu taumu,  
ororo dorina o gimaiamu taumu,  
ena be emu noho gabuna na atai ai o karaiamu,  
ugava ena heḡereġerena,  
to unu amo baina verimu dobi.  
Iehova na e herevamu.

**17** Edom na hahegari ḡauna ai bainela; e rakaia  
hanaimu taudia iboudiai na bae gari bona bae si  
dagу, enai vada e kau dikadia iboudiai daidiae.

**18** Iehova na e tomu: Sodoma bona Gomora bona edia hetabira hanuadia e heğigi dobi heğereğerena ai, tau ta ese basine noholaia; tau ta na ia lalonai basine taruha.

**19** A itaia, leona na Ioridane isena udana amo mamoe mağuna aukana ihadikana totona e maimu heğereğerena ai, lau ese iena amo baina haheaudia karoho, bona egu abi-hidi tauna baina duanaia, ia ese baine biagua. Badina be daika na lau heğereğeregu? Daika ese baine boirigu? Mamoe ireğudia tauna be daika lau vairagu ai baine gini diba?

**20** Taunabunai, Iehova ese Edom ihadikana dalana vada e haerolaia herevana na ba kamonai, bona Teman inoholaina taudia ihadikadia dalana e uralaiamu danu. Mamoe-mamoe na seri bogaragina amo bae dabuidia oho; edia seri mamoe dia na bae gari taku, ediai baine vara ġauna dainai.

**21** Edia moru reğena dainai tanobada na baine heude-heude; edia tai reğena na Davara Kakakakana isenä ai bae kamonai.

**22** A itaia, ta baine roho isi, baine roho harağaharaga, ugava na heto; hanina baine toi roro, Bosra ihadikana totona; bena Edom ena tuari taudia lalodia na e hekamonaimu hahinena lalona heğereğerena ai baela.

### *Peroveta herevana Damasko latanai*

**23** Damasko herevana.

Hamat bona Arapada vada e baia;  
 badina be hari dikadia vada e kamonai.  
 Gari ese e gugubadiamu;  
 e hekwarahimu, davara na heto,  
 asi vea dibana davarana na heto.

- 24** Damasko vada e manoka-manoka,  
e raka muri, baine heau eto,  
lagaga ese e butua tao;  
hisi-ani bona lalo-hisihisi ese vada e gugubaia,  
e hekamonaimu hahinena na heto.
- 25** Hanua mai harina, hanua mai moalena, madi  
ihabaina!  
Vada e rakatania.
- 26** Taunabunai, ena eregabe taudia na ena ariara  
ai bae hekida diho,  
bona ena tuari taudia iboudiai na bae habua-  
dia tari una dina ai.  
Iehova Sabaota na e herevamu.
- 27** Damasko maġuna ai lahi ta baina ha-araia,  
ia ese Damasko maguna ai lahi ta baina ha-  
araia,  
ia ese Ben-Hadad ena gabu aukadia baine  
aradia ore.

### *Peroveta herevana Kedara*

#### *bona Hasoro latadiae*

- 28** Kedara bona Hasoro basileiadia,  
Nebukadresara, Babulono pavapavana, ese e  
hadareredia basileiadia, herevadia. Iehova ini e  
gwau tomamu:  
A tore isi, Kedara ihadikana baola;  
mairiveina kahana taudia ba habuadia tari.
- 29** Edia dabua kalagadia bona edia mamoe seridia  
bae heabi oho,  
edia seseahu dabuadia bona edia kohu  
iboudiai danu;  
edia kamelo na edia amo bae hakaudia oho,  
bona taunimanima ese bae boi henidia, baeto  
“Kaha iboudiai hahegari mo”.
- 30** Hasoro inoholaina taumui e!

A heau, dauha baola, dobu gabudia ai ba  
noho.

Iehova na e herevamu.

Badina be Nebukadresara, Babulono pavapa-  
vana, ese  
oi ihadikamu dalana vada e haeroa,  
oi ihadikamu karana vada e uralaia.

**31** Iehova na e tomu: A tore isi!

E lağ-a-animu besena, e noho namonamomu  
besena,  
ihadikana totona baola;

ia na asi ena ikoukou, bona asi ena auri,  
ia na sibona e noho edeamu.

**32** Iehova na e tomu:

Edia kamelo na bae dadidia,  
edia boromakau seridia bae abidia oho.

Bagudia huidia e abimu taudia na  
baina hakarohodia, kaha iboudiai baela;  
bona ihahisidia ġaudia na  
kaha iboudiai amo baina mailaidia.

**33** Hasoro na uda sisiadia edia noho gabuna ai  
bainela,  
baine vahu hanaihanai;  
tau ta ese basine noholaia,  
tau ta ia lalonai basine taruha.

### *Peroveta herevana Elam latanai*

**34** Iehova ena hereva peroveta tauna Ieremia  
enai e kau Elam dainai, Sedekia, Iuda pavapa-  
vana, e lohia matama negana ai.

**35** Iehova Sabaota ini e gwau tomamu: A itaia,  
lau ese Elam ena peva, edia goada badina, baina  
hakwaidua;

**36** bona lai haniosi, guba kahana haniosi amo,  
na Elam latanai baina mailaidia, bona baina

hakarohodia roho-roho,unu lai kahadia iboudiai baela; bona Elam amo bae luludia lasi taudia na bese iboudiai bogaragidiai bae kau.

<sup>37</sup> Iehova na e tomu, Lau ese Elam baina hagaria inaidia vairadai, bona edia mauri iabi-ohona dalana e tahuamu taudia vairadai danu; dika na idia latadai baina hadihoa, bona egu badu ġaraġara danu. Dare baina siaia, baine ġavadia, ela bona baina ha-oredia;

<sup>38</sup> egu terono baina haginia Elam ai, bona edia pavapava bona edia lohia baina habuadia tari. Iehova na e herevamu.

<sup>39</sup> Iehova na e tomu: A dina gabedia ai Elam ena noho-namo baina havaraia lou.

## 50

### *Peroveta herevana Babulono latanai*

<sup>1</sup> Ina na Iehova ena hereva, peroveta tauna Ieremia uduna amo e gwauraia, Babulono latanai, Kaldea taudia edia tano latanai.

<sup>2</sup> Bese bogaragidiai ba gwauraia bona ba herevalaia hedinarai;  
pepe ta ba duduia isi, ba herevalaia hedinarai.

Basio hunia, baoto:

Babulono vada e abia,  
Bel vada e hahemaraia,

Merodak\* vada e baia.

Ena dirava laulaudia vada e hahemaraidia,  
ena kaivakuku vada e baia.

<sup>3</sup> Badina be mirigini kahana amo bese ta vada ema, ia ihadikana; una bese ese ena tano baine

---

\* **50:2** Bel bona Merodak na Babulono taudia edia dirava.

havahua, tau ta ese basine noholoia; taunimanima bona ubu-ubu ġaudia na bae heau karoho.

<sup>4</sup> Iehova na e tomu, Unu dinadia ai bona una nega ai, Israel bona Iuda taudia bae hegogo, mai taidia ida baema, Iehova, edia Dirava, bae tahua.

<sup>5</sup> Siona dalana bae henanadailaia, bae vaira henia, baeto, Aoma, Iehova ida baita hegwauhamata heheni, baine hesiriu hanaihanai gwauhamatana, ta ese basine laloa boio ġaina.

<sup>6</sup> Egu bese taudia na boio mamoedia; ireġudia taudia ese vada hakaudia kerere, ororo ai vada e harakadia siri; ororo badana amo ela bona ororo maraġina vada ela, edia maġu vada e reaia.

<sup>7</sup> E davaridia taudia iboudiai ese e ha-oredia; inaidia eto, Ai na asi emai kerere, badina be idia ese Iehova, edia noho gabuna korikorina, Iehova, senedia edia helaro, vada e kara dikha helua.

<sup>8</sup> Babulono bogaragina amo ba heau lao, Kaldea taudia edia tano ba rakatania, nani mamaruandia na edia seri matana ai e rakamu na heto.

<sup>9</sup> Badina be lau ese bese badadia mirigin ikahana amo na hatoredia isimu, Babulono ihadikana totona na hakaudia laomu. Idia ese bae tuari henia, bena unu amo ia na baine hahedarere. Edia hakore na tuari mai dibana tauna na heto, dia imana kavakava se lou maimu.

<sup>10</sup> Kaldea tanona bae dadihai; enai bae dadi-dadi taudia iboudiai ese kohu bae abi dorokadoroka. Iehova na e herevamu.

<sup>11</sup> Lau ahugu idadina taumui e!

Ena be ba moale, ena be ba heaġi,  
ena be ba lebulebu boromakau hahinena mata-matana rei gabuna ai na heto,

eiava ba tubebe hosi mamaruanedia na  
 heheto,  
 12 to sinamui na bae hahemaraia vaitani,  
     e havaramui hahinena sivaraina baine dika.  
 A itaia, ia na bese gini-gabena ai bainela,  
     bese idau-idau bogaragidiai;  
 tano āgāena ai bainela,  
     kaukauna bona deđedeđena rahu.  
 13 Iehova ena badu dainai ta ese basine noholaia,  
     ia na baine vahu vaitani;  
 Babulono bae rakaia hanai taudia na bae hoa mai  
     garidia ida,  
     bona bae si dagu, ia berona iboudiai daidiae.  
 14 Emui peva o maremu taumui iboumui ai,  
     Babulono ba tuari henia, ba ginia heđeđe;  
 ba tarakia, emui diba bae ore na basio laloa,  
     badina be ia ese Iehova vada e kara dika  
     henia.  
 15 Ba loloa heđeđe,  
     ia na vada e baia;  
 ena gabu aukadia vada e makohi,  
     ena mađu vada eme heđigđi dobi.  
 Badina be Iehova ena dava-heni binai:  
     ena dika davana ba henia;  
     ia e karava heđeređerena ai ba kara henia.  
 16 Hadohadu tauna na Babulono amo ba negea  
     daure,  
     bona taboro negana ai uit e utuamu tauna  
     danu;  
 hahehisu tauna ena dare dainai  
     iboudiai ese edia bese korikori taudia bae lou  
     henidia  
     bona iboudiai na edia tano korikori bae heau  
     lao.

<sup>17</sup> Israel na leona ese vada e luludia karoho mamoena ta. Guna Asuria pavapavana ese e ania, ma harihari, ina nega dokona ai, Nebukadresara, Babulono pavapavana, ese ia turiana e kwarurudia.

<sup>18</sup> Taunabunai, Iehova Sabaota, Israel Diravana, na ini e gwau tomamu: A itaia, Babulono pava! pavana bona ena tano na edia dika davadia ba henidiamu, Asuria pavapavana ena dika davana na henia heğereğerenä.

<sup>19</sup> Israel na ena rei gabuna baina henia lou; ia na Karamele ai bona Basan ai baine aniani, bona Efraim ororodia ai bona Gilead ai bogana baine kunu.

<sup>20</sup> Iehova na e tomu: Unu dinadia ai bona una nega ai, kara havara bae tahua Israel ai, to asi ġauna; bona kara dika bae tahua Iuda ai, to basie davaria; badina be kwabukwabudia, baina rakatanidia taudia, na edia dika baina gwau tao.

<sup>21</sup> Merataimi tanona ba tuari henia,  
bona Pekodo inoholaina taudia danu.  
Iehova na e tomu: Bawala-ala,  
ba habuadia tari vaitani,  
vada na haganilaimui karadia iboudiai na ba  
kara.

<sup>22</sup> Tuari reğedia na tano ai e reğemu,  
bona hahebua-tari badana danu.

<sup>23</sup> Tanobada idoinai ibotalaina lavuna,  
madi, vada e utua gari, vada e hamakohia.  
Babulono madi ihabaina!

Ia na hahegari ġauna ai vada ela,  
bese idau-idau bogaragidiai.

<sup>24</sup> Babulono e! Idoa na otoa, oi iabimu totona;  
bena na idoamu, to asi dibamu.  
E davarimu bona e abimu,

badina be Iehova o tuari henia.

<sup>25</sup> Iehova ese ena tuari ġaudia iħaboudia rumana  
vada e kehoa,

ena badu tuari ġaudia vada e abidia lasi;

badina be Ġaubada Iehova Sabaota na mai ena  
ġaukara ta,

Kaldea taudia edia tano ai baine karaia.

<sup>26</sup> Kaha iboudiai amo ba tuari henia;  
ena roge ba kehodia;

ba hasenua, uit senudia na heheto,

ba habuaia tari vaitani,

ienai sisisisina taina basine mia.

<sup>27</sup> Ena boromakau mamaruanedia iboudiai na  
bavaladia mase,  
iala-masedia gabuna ai do bae diho.

Madi, iħabaidia! Badina be edia dina vada e kau,  
edia dikha davana iabina negana vada e kau.

<sup>28</sup> A hakala, idia na e heaumu, Babulono tanona  
amo e roho maurimu; Siona ai Iehova, eda Dirava,  
ena dava-heni, ena dubu idavalaina, na bae gwau-  
raia hedinarai.

<sup>29</sup> Peva taudia a boiridia, peva e maremu taudia  
iboudiai, Babulono ihadikana totona. Ba taruhaia  
hegeġe; tau ta basine roho mauri. Ena kara dava-  
dia ba henia, ena kara iboudiai heġereġeredia ai  
ba kara henia; badina be mai heagina ida Iehova,  
Israel ena Helaġa Diravana, na vada e hare henia.

<sup>30</sup> Taunabunai, ena erekabe taudia na ena ari-  
ara ai bae hekida diho, bona ena tuari taudia  
iboudiai na bae habuadia tari una dina ai. Iehova  
na e herevamu.

<sup>31</sup> Ġaubada Iehova Sabaota na e tomu:

Heagi taumu e! A itaia, lau na oi inaimu;  
badina be emu dina vada e kau,

emu dika davana baina henimu negana vada  
e gini dae.

**32** Heagi tauna na baine hetutuhi, baine hekida  
dihō,  
asi tauna ta ese baine hatorea isi.  
Lau ese lahi ta baina ha-araia ena hanua iboudiai  
lalodai;  
ia e ġeġea madaimu ġaudia iboudiai na baine  
aradia ore.

**33** Iehova Sabaota ini e gwau tomamu: Israel  
taudia na e hahisidiamu, bona Iuda taudia danu  
idia ida; e abidia mauri taudia iboudiai ese vada  
e dogodia tao tarika-tarika, ikahu-riegedia asie  
uramu.

**34** Ihamauridia Diravana na mai goadana; ia  
ladana na Iehova Sabaota. Ia ese edia gini-kau  
gabuna baine herevalaia, bena tanobada na laġani  
baine henia, a Babulono inoholaina taudia na  
hekwarahi baine henidia.

**35** Iehova na e tomu:  
Dare ta Kaldea taudia latadiai,  
bona Babulono inoholaina taudia latadiai,  
bona ena lohia bona ena aonega taudia lata-  
diai baine kau.

**36** Dare ta bagu-haoro taudia latadiai baine kau,  
kavakava taudia ai bae hahelao helaoreana.  
Dare ta ena tuari taudia latadiai baine kau,  
baine habuadia tari helaoreana.

**37** Dare ta ena hosi bona ena kariota latadiai,  
bona bese idaudia edia tuari taudia iboudiai  
ia lalonai e nohomu na latadiai baine kau,  
hahine ai bae hahelao helaoreana.

Dare ta ena taġa idoinai latanai baine kau,  
bae dadihaia helaoreana.

**38** Medu na ena ranu gabudia ai basine diho,  
bena bae kororo.

Badina be ia na dirava idau-idau laulaudia  
tanona,  
bona kaivakuku na e lalodia badamu.

**39** Taunabunai, uda boromadia bona uda  
sisiadia na Babulono ai bae noho hebou, bona  
kokokoko danu ia lalonai bae noho; tau ta  
ese basine noholaia ela bona hanaihanai, uru  
iboudiai lalodiai tau ta ese basine noho henia.

**40** Dirava ese Sodoma bona Gomora bona edia  
hetabira hanuadia na e habuadia tari negana  
heğereğerena ai, unuheto tau ta na unuseni ai  
basine noho, bona taunimanima natuna ta ese  
basine noho henia. Iehova na e herevamu.

**41** A itaia, bese ta mirigini kahana amo e maimu,  
basileia badana ta bona pavapava hutuma na  
tanobada dokodia amo e tore isimu.

**42** Idia ese peva bona io e abi kaum;  
idia na mai dağedagedia, asi hebogahisidia.

Idia reğedia na davara guruna na heto;  
idia na hosi ai e guimu;

edia tuari ġaudia na e abi kaum,  
oi Babulono kekenimu, ihadikamu totona.

**43** Babulono pavapavana ese haridia e kamonai,  
bena imana e hedabarai;  
his i ese e gugubaia,  
hahine ena hekamonai hisina na heto.

**44** A itaia, leona na mamoe maġuna aukana  
ihadikana totona Ioridane udana amo e daemu  
na heto, lau ese iena amo baina haheaudia  
oho; bona baina abia hidi tauna na ia ikwarana

tauna ai baina halaoa. Badina be daika na lau heğereğeregu? Daika ese baine boirigu? Edena mamoe ireğudia tauna na lau vairagu ai baine gini diba?

<sup>45</sup> Taunabunai, Iehova ena lalo-hadai, Babulono ihadikana totona vada e haeroa, bona ena ura, Kaldea taudia edia tano ihadikana totona vada e laloa, na ba kamonai. Momokani, mamoe marağidia na edia mamoe serina amo bae dabuidia lao; momokani, edia magu mamoedia na bae gari taku, ediai vada e vara ġauna dainai.

<sup>46</sup> Babulono iabina reğena dainai tanobada baine heude-heude, bona ena taitai na bese iboudiai bogaragidiai bae kamonai.

## 51

### *Iehova ese Babulono e revaia*

<sup>1</sup> Iehova ini e gwau tomamu:

A itaia, hahebua-tari tauna baina rohea,  
 Babulono ihadikana totona,  
 Kaldea inoholaina taudia ihadikadia totona;  
<sup>2</sup> bona itapona taudia na Babulono baina siaidia  
 lao,  
 idia ese bae tapoa;  
 bona kaha iboudiai amo bae tuari henia negana  
 ai,  
 idia ese ena tano anina bae ha-oreea,  
 hisihisi dinana ai.  
<sup>3</sup> Peva tauna ese ena peva basine marea,  
 ena tuari dabuana ai basine gini tore.  
 Ena eregabé taudia basio bogadia hisi;  
 ena tuari oreana idoinai ba habuaia tari.  
<sup>4</sup> Kaldea taudia edia tano ai na masedia ai bae  
 hekida diho,

bona edia ariara ai danu bae hekida diho mai  
berodia ida.

<sup>5</sup> Badina be Israel bona Iuda edia Dirava,  
Iehova Sabaota, ese asine rakatanidia;  
a Kaldea taudia edia tano na kerere ai e honu  
honu daemu,  
Israel ena Helaāga Diravana enai.

<sup>6</sup> Babulono bogaragina amo ba heau;  
iboumui ai maurimui ba tahua.

Iena dika davana iabina ai basio hedai uru;  
badina be ina na Iehova ena dava-heni ne-  
gana,  
ahuna binai ia ese e heniamu.

<sup>7</sup> Babulono na *gold* keherena ta Iehova imana ai,  
tanobada idoinai ihakekerona;  
bese idau-idau ese iena vine ranuna e inua,  
una dainai unu bese na e kavadia.

<sup>8</sup> Asi vanahana Babulono na vada e darere, vada e  
makohi;  
ia taina ba tai.

Ena hisihisi muramurana ba laohaia,  
reana baine namo Iou.

<sup>9</sup> Ita ese Babulono na ena hisihisi amo baitama  
hamauria,  
to ena hisihisi amo se mauri,  
A rakanania, aitala,  
ta ta ena tano ena tano baita lou heni;  
badina be ihahemaoro-henina vada e dae guba ai,  
vada e heabi isi atai ai.

<sup>10</sup> Iehova ese igwaurai-maoroda vada e hahedi-  
naraia;  
aoma, Iehova, eda Dirava, ena kara na  
Siona ai baita gwaurai hedinarai.

<sup>11</sup> Diba matadia a nau!  
Kesi avabi isi!

Iehova ese Media pavapavadia vada e rohedia, badina be ena ura Babulono enai na baine habuaia tari e tomu; badina be una na Iehova ena dava-heni, ena dubu idavalaina.

12 Pepe ta ba haginia Babulono maǵudia vairadiai,  
hegima oreana ba ha-aukaia;  
hegima taudia ba duanaidia,  
ibani-henina daladia ba hegaegaelai;  
badina be Babulono taudia e herevalaidia ǵaudia  
na

Iehova ese vada e haero bona vada e kara.

13 Umui, sinavai momo badibadidiai o nohomu  
taumui e!

Taga taumui e, dokomui vada e kau,  
emu mauri varona vada e utua.

14 Iehova Sabaota na ia sibona ladana ai vada e  
gwau hamata, eto:

Momokani, taunimanima ai baina hahon-  
umu,  
bae hoho, kwadi na heheto;  
ben a kwalimu honena bae lololaia,  
oi latamu ai.

15 Ia ese ena siahu amo tanobada e karaia  
bona ena aonega amo tanobada idoinai e  
haginia,  
bona ena lalo-parara amo guba e idia roro.

16 Ia e herevamu negadia ai, ranu e heguruamu  
guba ai;  
ia ese ninoa e hadaeamu, tanobada dokodia  
amo.

Ia ese medu kevarudia e halasidiamu,  
bona lai na ena habou-habou rumadia amo e  
hakaudia lasimu.

- 17** Taunimanima iboudiai na kakavakava bona asi aonegadia,  
 bona *gold* iāukaralaina taudia iboudiai na edia kaivakuku ese e hahemaraidiamu;  
 badina be edia kaivakuku na koikoi ġaudia,  
 bona asi laġadia.
- 18** Idia na asi anidia, haero-kerere ese e havaradia;  
 edia dava-abi negana ai bae mase.
- 19** Iakob ahuna na dia unuheto;  
 badina be ia ese ġau iboudiai vada e karadia.  
 Ia dihina na Israel besena;  
 ia ladana na Iehova Sabaota.
- 20** Oi na egu gahi bona egu tuari ġauna;  
 oiemu amo bese idau-idau baina huaridia,  
 oiemu amo basileia idau-idau baina habuadria tari;
- 21** oiemu amo hosi mai iāguina tauna ida baina huaridia patapata,  
 oiemu amo kariota bona kariota tauna baina huaridia patapata;
- 22** oiemu amo tau bona hahine baina huaridia patapata,  
 oiemu amo iahu bona eregabe baina huaridia patapata;  
 oiemu amo tauhau bona hane-ulato baina huaridia patapata,
- 23** oiemu amo mamoe ireġudia tauna mai ena mamoe serina ida baina huaridia patapata;  
 oiemu amo ruarua tauna mai ena boromakau maruanedia ida baina huaridia patapata,  
 oiemu amo bese ikwaradia taudia bona tuari lohiadia baina huaridia patapata.

**24** Iehova na e tomu: Mata dogadoğamu ai Babulono bona Kaldea inoholaina taudia edia dika davadia do baina henidia, kara dikadia Siona ai vada e kara iboudiai daidiae.

**25** Iehova na e tomu: Hahebua-tari ororona e!

Tanobada idoinai o habuaia tarimu;  
lau ese na inai henimumu.

Lau imagu baina toia roro, oi ihadikamu totona,  
bona haga nadidia amo baina keimu dobi,  
vada e heara ororona ai baina halaomu.

**26** Daiguni nadina ta eiava badi nadina ta na  
oiemu amo basie abia;  
a oi na ba vahu hanaihanai.  
Iehova na e herevamu.

**27** Pepe ba duduia isi tanobada ai,

bese idau-idau bogaragidiai kibi ba hiriria;  
bese idau-idau ba hahegaegaedia, bae tuari henia  
totona,  
basileia idau-idau ba boiridia, ia ihadikana  
totona,

Ararat bona Mini bona Asakena.  
tuari lohiana ba duanaia, ia ihadikana;  
hosu ba hakaudia lasi, kwadi na heheto.

**28** Bese idau-idau ba hahegaegaedia, bae tuari  
henia totona,  
Media pavapavadia, bona edia hekwara tau-  
dia mai ibolodia taudia ida,  
bona idia ese e lohiadia tanodia iboudiai.

**29** Tano na e heude-heudem, hisihisi ai e hekoe-  
hekoemu,  
badina be Iehova ena ura Babulono enai vada  
e ginimu.

Babulono tanona baine havahua,  
asi inoholaina tauna ta baine noho.

30 Babulono ena tuari taudia ese tuari vada e  
       hadokoa,  
       edia gabu aukadia ai e nohomu;  
       edia goada vada e ore,  
       hahine ai ela;  
       rumana vada e aramu,  
       aurina vada e kwaидu.

31 Heau tauna ta ese lava baine heaulaia, ma heau  
       tauna ta baine davaria;  
       bona gwaukau tauna ta ese lava baine lao-  
       haia, ma gwaukau tauna ta baine davaria;  
       Babulono pavapavana na bae hamaoroa,  
       ena hanua na kahadia iboudiai vada e abia;  
 32 turu-hanai gabudia vada e abidia,  
       gabu aukadia vada e doudia,  
       tuari taudia na e gari lalo-dikamu.

33 Badina be Iehova Sabaota, Israel Diravana, na  
       ini e gwau tomamu:  
       Babulono natuna hahinenen a uit ikwadilaina  
       gabuna na heto,  
       e moia tao matama  auna;  
       nega taina bainela,  
       bena itaborona negana baine kau.

34 Nebukadresara, Babulono pavapavana, ese  
       vada e ha-oregu,  
       vada e moigu tao;  
       ia ese tohe asi anina he ere erena ai vada e ha-  
       laogu;  
       ia ese vada e hadonogu, huala badana na  
       heto;  
       ia ese agu aniani  audia namodia amo bogana  
       vada e hakunua,  
       vada e lorigu lasi.

35 Siona inoholaina taudia na baeto:  
 “Dagedage karadia lauegu ai bona  
 varavaragu ediai e kara na  
 Babulono latanai bae mia”.

Ierusalem baineto:  
 “Lau raragu na Kaldea inoholaina taudia lata-  
 diai”.

36 Taunabunai, Iehova na e tomu;  
 A itaia, emu gini-kau gabuna baina  
 herevalaia,  
 bona oi ihadikamu davana baina heni.  
 Ena davara baina hakaukaua,

bona ena ranu lohilohi gabudia baina hako-  
 roro;

37 Babulono na e hegigi dobi hanuana ai bainela,  
 uda sisiadia edia noho gabuna,  
 gari bona si-dagu ihavaradia gauna,  
 asi inoholaina tauna ta.

38 Idia na bae gou hebou, leona na heheto;  
 bae gigi, leona natudia na heheto.

39 Lalodia doini e garağaramu negana ai,  
 aria ta baina hegægaelaia adia;  
 baina hakekerodia ela bona bae mase rea,  
 bae mahuta hanaihanai, basie noga.  
 Iehova na e herevamu.

40 Iala-masedia totona baina hakaudia hekei,  
 mamoe natudia na heheto,  
 mamoe mamaruanedia bona nani mamaru-  
 anedia na heheto.

41 Babulono madi vada e abia,  
 tanobada idoinai ese e imodaiamu gauna na  
 vada e dadia.

Babulono madi, gari ihavarana gauna ai vada ela,  
 bese idau-idau bogaragidiae.

42 Davara ese Babulono vada e ha-utua dae;

- ena hurehure badadia ese vada e habubunia.  
**43** Ena hanua badadia na gari ihavarana ġaudia ai  
 vada ela,  
 tano kaukauna, deġedeġena rahu tanona,  
 tau ta ese se noholiamu tanona,  
 taunimanima natuna ta ese se rakaia  
 hanaimu tanona.
- 44** Lau ese Bel davana baina henia Babulono\* ai;  
 vada e hadonoa ġauna na uduna amo baina  
 abia lasi.  
 Bese idau-idau basie aru henia lou;  
 Babulono maguna vada e heġiġi dobi.
- 45** Egu bese taumui e, ia bogaragina amo a raka  
 lasi!  
 Iboumui ai ta ta ena mauri ena mauri daladia  
 ba tahu,  
 Iehova ena badu ġaraġara amo ba roho mauri.
- 46** Laġani ta ai hari ta e maimu,  
 ma laġani ta ai hari ta,  
 bona daġedäge karadia na tano ai e karamu,  
 bona lohia ta lohia ta ida e heiri-heirimu,  
 negadia ai na kudoumui basie hetaha bona basio  
 gari,  
 tano ai hari o kamonaimu dainai.
- 47** Taunabunai, a itaia, negana na e maimu,  
 lau ese Babulono ena dirava laulaudia dava-  
 dia do baina hen;  
 ena tano idoinai do bae hahemaraia,  
 bona ena mase taudia iboudiai na ia bogarag-  
 inai bae heħda diħo.
- 48** Bena guba bona tanobada bona lalodia ġaudia  
 iboudiai ese

---

\* **51:44** Bel na Babulono taudia edia dirava ta.

- baǵo anedia bae abi, Babulono latanai;  
 badina be mirigini kahana amo  
 hahebua-tari taudia na baema, ia ihadikana.  
 Iehova na e herevamu.
- 49** Babulono na baine moru, Israel ena mase tau-dia daidiae,  
 tanobada idoinai ena mase taudia na Babulono dainai vada e hehda diho heǵereǵerena.
- 50** Umui dare amo vada o roho mauri taumui e,  
 aola, basio gini kava!  
 Gabu daudau ai Iehova ba laloa tao,  
 Ierusalem na ba laloa une, baoto:
- 51** Ai na vada e hahemaraimai, badina be gwaugv-vau herevadia vada a kamonai,  
 bona e dadaraimai dainai a igo dihomu;  
 badina be idau bese taudia na Iehova ena dubu ai,  
 ena gabu helagadia lalodiai vada e vareai.
- 52** Iehova na e tomu:  
 Taunabunai, a itaia, negana be maimu,  
 lau ese ena dirava laulaudia baina hahemaoro  
 henidia,  
 bona ena tano idoinai lalonai mai berodia  
 taudia na bae ǵanaǵana.
- 53** Ena be Babulono bema dae guba ai,  
 ena be ena atai gabudia bema ha-aukadia,  
 to hahebua-tari taudia lauegu amo na ia latanai  
 bae kau.  
 Iehova na e herevamu.
- 54** A kamonai! Taitai ta Babulono amo;  
 hahebua-tari badana reǵena Kaldea taudia  
 edia tano amo.
- 55** Badina be Iehova ese Babulono e havahuanu,

ia gadona bada-hereana e tuiamu.

Edia hurehure na e regemu, sinavai momo na  
heheto;  
gurudia na e bada e laomu;

**56** badina be hahebua-tari tauna na Babulono enai  
vada e kau,  
ena luari taudia vada e abidia,  
edia peva vada e hakwaidudia rohoroho;

badina be Iehova na dava-heni Diravana,  
momokani ia ese dava baine heni.

**57** Ena lohia taudia bona ena aonega taudia baina  
hakekerodia,  
ena hekwara taudia, ena tuari lohiadia,  
bona ena tuari taudia danu;

idia na bae mahuta hanaihanai, basie noga.

Pavapava badana, ladana Iehova Sabaota, na  
e herevamu.

**58** Iehova Sabaota ini e gwau tomamu:  
Babulono maǵuna, lababa-bada ǵauna, na tano  
ai baine helaha tari;  
bona ikoukoudia, atai-herea ǵaudia, na lahi ai  
bae doudia.

Bese idau-idau edia hekwarahi na asi anina;  
basileia idau-idau e ǵaukara lalo-dikamu, lahi  
mo ana.

**59** Ina na peroveta tauna Ieremia ena hereva,  
ia ese Seraia, Neria Mahaseia natuna, e haǵanilaia  
ǵauna, Sedekia, Iuda pavapavana, ida Babulono  
ela negana ai, hari Sedekia ena lohia laǵanina  
ihahanina lalonai. Seraia na kohu ireǵuna tauna.

**60** Ieremia ese dika idoinai Babulono latanai  
baine kau herevadia na buka ta ai e tore.

**61** Bena Ieremia ese Seraia e hamaoroa, eto, Babulono ai ba kau negana ai, mi hereva iboudiai do ba duahidia;

**62** ma baoto, Iehova e, oi na vada o hereva, ina gabu ba negea daure, bena āgau ta ia lalonai basine noho, taunimanima ta eiava ubu-ubu āgauna ta; ia na baine vahu hanaihanai.

**63** Bena ina buka ba duahia vaitani murinai, nadi ta ai ba mataia kau, bena Eufrate sinavaina lalonai ba negea dobi.

**64** Bena baoto, Babulono na unu baine mutu toma, basine keni lou, dika na ia latanai ba hadi-hoamu dainai. Ieremia ena hereva dokona binai.

## 52

### *Ierusalem e darere*

**1** Sedekia e lohia matama negana ai, ena mauri laġanidia na ruahui-ta; ena lohia laġanidia Ierusalem ai na gwauta-ta. Sinana ladana na Hamutala, Ieremia, tau Libna, natuna.

**2** Ia na Iehova vairanai e kara havara, Iehoiakim ena kara iboudiai heġereġeredia ma e kara.

**3** Momokani, Iehova ena badu dainai Ierusalem bona Iuda edia dika na e bada e laova ela bona ia vairana amo e negedia daure.

Bena Sedekia ese Babulono pavapavana e gwau edeede henia.

**4** Ena lohia laġanina ihataurahani-tana ai, hua ihagwautana dinana ihagwautana lalonai, Nebukadresara, Babulono pavapavana, na ena tuari oreana idoinai ida Ierusalem iħadikana ema, e koua heġeġe bona tano e larebaia heġeġe.

**5** Taunabunai, hanua e koua heġeġe ela bona King Sedekia ena lohia laġanina ihagwauta-tana.

**6** Bena hua ihahanina dinana ihataurahani-tana ai, hanua lalonai doe vada e bada herea, bona tano idoinai taunimanima na asi adia.

**7** Una negana ai, hanua maguna e hamaurua. Ena be Kaldea taudia na hanua vada e koua hegege, to tuari taudia iboudiai na hanuaboi ai e heau, magu ruaosi padadia ikoukouna amo, hanua pavapavana ena uma-uma badibadina; bena Araba kahana ela.

**8** A Kaldea taudia edia tuari oreana ese hanua pavapavana na e gavaia, ela bona Ieriko taorana ai Sedekia e lasia tao; bena ena tuari oreana idoinai na iena amo e karoho rohoroho.

**9** Bena idia ese hanua pavapavana e abia mauri, Babulono pavapavana dekena e laohaia, Ribla ai, Hamat tanona ai. Ia ese e revaia.

**10** Bena Sedekia natuna mamaruanedia na ia vairanai e aladia mase; bona Iuda lohiadia iboudiai danu Ribla ai e aladia mase.

**11** Ia ese danu Sedekia matana e hakepuludia, auri gadeadia amo e ġuia. Bena Babulono pavapavana ese Babulono e laohaia, unuseni ai dibura rumana ai e koua ela bona ena mase dinana.

### *luda e abia mauri*

**12** Hua iha-imana dinana ihahituna ai (una na King Nebukadresara, Babulono pavapavana, ena lohia laġanina ihagwauta-taurahani-tana ai), Nebusaradana, hegima oreana biaguna, Babulono pavapavana ena hesiai tauna ta, na Ierusalem ai e raka vareai.

**13** Bena ia ese Iehova ena dubu bona pavapava ena rumu bona Ierusalem rumadia iboudiai e doudia; rumu badadia iboudiai e doudia vaitani.

**14** Bena Kaldea tuari oreana taudia iboudiai, hegima oreana biaguna ida ema taudia, ese

Ierusalem heğeğemadai mağudia iboudiai e ha-hegigidia dobi.

<sup>15</sup> Bena ogogami dikadika taudia haida, bona hanua taudia kwabukwabudia dounu hanua ai e nohova, bona Babulono pavapavana enai e heau hanai taudia, bona ima karakara dibaka taudia oredia, na Nebusaradana, hegima oreana biaguna, ese e ġuidia, bena dauha e laohaidia.

<sup>16</sup> A Nebusaradana, hegima oreana biaguna, ese ogogami dikadika taudia haida e rakatanidia, vine imeadia ireġudia bona tano iruana taudia ai baela.

<sup>17</sup> Auri labora-labora au-tubuadiah Iehova ena dubu ai, bona rerue bona auri labora-labora nauna badana Iehova ena dubu ai, na Kaldea taudia ese e hamakohidia, bena auri labora-laborana idoinai na e laohaia Babulono.

<sup>18</sup> Bona uro bona gaga bona lamepa ihaġoevadia ġaudia, bona nau, bona muramura mai bonadia urodia, bona auri labora-labora ġaudia, kara helagadia ai e ġaukaralaiva ġaudia, na iboudiai e laohai;

<sup>19</sup> bona bia bona gida keberedia bona dihu bona uro, bona lamepa patadia, bona muramura mai bonadia urodia, bona udu-ahudia keheredia. *Gold ġaudia bona silver ġaudia na hari hegima oreana biaguna ese e laohai.*

<sup>20</sup> Hari au-tubua ruaosi, bona nau badana, bona boromakau mamaruanedia laulaudia gwautaruaosi, auri labora-labora amo e kara bona nau badana henunai e ato ġaudia, bona rerue, hanua pavapavana Solomon ese e kara Iehova ena dubu ena, auri labora-labora idia lalodiae metauna na asi ihahetohona.

<sup>21</sup> Hari au-tubuadiah ta ena lata na kiubit gwautaurahani; ena kuboro-heğeğe na kiubit gwauta-

rua; kopina udunana na ima-kwakikwaki hani e haheboudia udunana heğereğerena; ia na auri kuborona lalona kohua.

<sup>22</sup> Ia latanai na kwarana ikorona, auri laboralabora ġauna; hari kwarana ikorona ta ena lata na kiubit ima; bona reke-hetomana bona rimono huahuadia laulaudia, iboudiai na auri laboralabora amo e kara, na auri au-tubua kwarana ikorona ġauna e gegelaia. Au-tubua iharuana danu unuheto, mai ena rimono huahuadia laulaudia.

<sup>23</sup> Rimono huahuadia laulaudia na taurahanitahui tauratoi ohena ohena ai; rimono huahuadia laulaudia reke-hetomana e gegelaia iboudiai na sinahu-ta.

<sup>24</sup> Bena hari hegima oreana biaguna ese haheläga tauna badana Seraia, bona hahelaäga tauna iharuana Sefania, bona dubu iduarana inaridia taudia tatoiosi, e abidia.

<sup>25</sup> Hanua amo danu tuari oreana biaguna ta bona hanua pavapavana ena kaunsil taudia hahitu hanua lalonai e davaridia na e abidia; bona tuari biaguna ena toretore tauna, ena ġaukara betano taudia ihagaudia, bona tano taudia tauratoi-ahui hanua lalonai e davaridia danu,

<sup>26</sup> Nebusaradana, hegima oreana biaguna, ese e abidia, Babulono pavapavana dekena e laohaidia Ribla ai.

<sup>27</sup> Bena Babulono pavapavana ese e rahudia mamase, Ribla ai, Hamat tanona ai, e aladia mase. Taunabunai, Iuda taudia na e ġuidia, edia tano amo e abidia oho, dauha e laohaidia.

<sup>28</sup> Nebukadresara ese iġuidia ai e laohaidia taudia ihagaudia bini: laġani ihahituna ai, Iuda taudia daha-toi ruahui-toi;

**29** Nebukadresara ena lohia lağanina ihagwautaurahanina a ai, ia ese taunimanima sinahaurahani toi-ahui rua Ierusalem amo iğuidia ai e laohaidia;

**30** bona Nebukadresara ena lohia lağanina iharuahui-toina ai, Nebusaradana, hegima oreana biaguna, ese Iuda taudia sinahu-hitu hari-ahui ima na iğuidia ai e laohaidia; e laohaidia taudia iboudiai na daha-hani sinahu-tauratoi.

### *Iehoiakini e ruhaia nege*

**31** Iehoiakini, Iuda pavapavana, ena iğui ai e nohova lağanina ihatoiahuihituna ai, hua ihagwautaruana dinana iharuahui-imana ai, Evil-merodak, Babulono pavapavana, e lohia matama. Bena ena lohia lağanina gini-gunana ai ia ese Iehoiakini, Iuda pavapavana, e hagagaia isi, dibura rumana amo e hakaua lasi;

**32** ia ese e hereva namo henia, bona helai ġauna hereana e henia, pavapava iboudiai ia ida Babulono ai e nohova daediae.

**33** Taunabunai, Iehoiakini na ena dibura ruma dabuadia e doki oho. Una murinai ena mauri dinadia iboudiai lalodiai ia na hanua pavapavana ena pata ai e aniani hanaihanaiava;

**34** bona hanua pavapavana ese ahuna e henia, dina ta ta amo, ena mauri dinadia iboudiai lalodiai, ela bona ena mase dinana. mi dikadika taudia haida, bona hanua taudia kwabukwabudia dounu hanua ai e nohova, bona Babulono pavapavana enai e heau hanai taudia, bona ima karakara dibaka taudia o

**Buk Baibel long tokples Motu  
The Holy Bible in the Motu language of Papua New  
Guinea**

Copyright © 1959-1973 Bible Society of Papua New Guinea

Language: Motu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-10-09

---

PDF generated using Haiola and XeLaTeX on 28 Dec 2024 from source files dated 31 Aug 2023

35028c04-b277-5da3-8163-bb2fd39b90ca